

# NOCAA TEHUE CANAJE ESOHUI QUEA BAME NEE JESOSA QUITOJA LUCAS

<sup>1</sup> Eyaya mi que tehuenaje Teopino achajja Jesosa ebajji. Quea dejja huisohua Jesosaja ehuohui'yo cuanajo tehue sa aca cua, huohui mee sa aca cua pea'ai. <sup>2</sup> Ojaya epeejji cuaa, ojaya esohui huohujji cuaa, Jesosa ba neinei ca cua. Ohuaya ecuanaya huohui neinei ca cua. <sup>3</sup> Jamajjeya eyaya catehue'yahua onaa huohui ca'yoqui Jesosajo. Jjeya eyaya mi que tehuenaje, Teopino. Jiquio esohui e'e jojo nei Jesosajo. Eyaya shajja'ajja neineinaje onaa huohui ca'yoqui Jesosajo. Majoya jjashahuaba neineiquinaje jiquio etehuejji, jamajjeya e'e jojo nei jiquio esohui. <sup>4</sup> Tehuenaje eyaya miquea Jesosa eba neineijji. Mi jjashahuaba neineiquijji eyaya tehuenaje, de. Jamajjeya jba neineicue jiquio esohui ecue tehue'yo!

*Oe esohuidojijiya Sacania huohui ca cua bacuajji cuajo, Huani ona besameejji epojji cuaje*

<sup>5</sup> Yahuajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiiya aje ba'ya cua Eyacuiñajji nijje mimiani yohua bajjani ba'a: Sacania. Oya chacochacoania cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni.

Isamenija etiiquiana cuana Eyacuiñaggi nijje mimiani pea'ai cua. Anoni dejja bajjani cua. <sup>6</sup> Sacania Eyacuiñajji epeejji nei nei cua, oja huanase o jayojja nei neiya cua. Oya cuaa shajja'ajja neinei ca cua Eyacuiñajji esohui. <sup>7</sup> Jamatii bacuama' cua; ojaya ehuanase jjamejoqui ajja neinei cua. Ehuanase epona tii cua; oya edejja tii pea'ai cua.

<sup>8-9</sup> Pea pojajo Sacania jjachichaquia cua Eyacuiñaggi nijje emimijji cuana nijje. Pea cuaa oya jama aca cua ba'a: —Sacania, ijjeya jiquio pojajo Eyacuiñaggi nijje mimicue! ijjeyahua nei mee nei dobiquicue Eyacuiñajji equi yasijje, equi quecuayijji sisi yasijje! ¡DobiQUI majje acui shaa dahua huichachajeacue huichacha shiye epoji! ¡Ma ojjañaa aca cua jayojjaya oe acue!

DobiQUI majje Sacaniaa jamaya aca cua Eyacuiñajji equijo nequiya. <sup>10</sup> Beca cuana aje oe esecuejo nequia cua Eyacuiñaggi nijje emimijji pea'aiya. <sup>11</sup> Sacaniaa aje oe acui shaa quea shiye dahua huichachajea canequia cua acui shaa edahuajeajji biajje iya ani. Majoya aje oe Eyacuiñajji esohuidojiji jjanequija'aquia cua, edahuajeajji ebañeí mijijje nequia cua. <sup>12</sup> Sacania esohuidojiji ba majje piopio neinei'ya cua esohuidojiji ba po jjima jjejojoya. <sup>13</sup> Majoya aje oe esohuidojijiya jama aca cua ba'a: —Sacania, ja'a piopiojji! Miya Eyacuiñaggi nijje mimi majamajanaje ebacua yajjijo. Jamajjeya miya Eyacuiñajji shajja'ajja canaje miquea esohui ebacua yajjijo. Miquea ehuanase aje oe jjamejoquije. Majoya jebacua cuayajo Huani bajjani acue! <sup>14</sup> Miya o cuayajo quea bihui nee nee cuaje. Pea dejja cua-

naya queabihui nee nee cuaje ebacua cuayajo. <sup>15</sup> Oya Eyacuiñajjija epeejji nei nei cuaje, jama-jjeya miquianaya quea bihui nee cuaje. Oya acuujjajja na sese ishi ajja cuaje, ecahuishi ishi ajja pea'ai cuaje. Edojjoshahua Bameya jaahuana caje'yo oya cuayajo. <sup>16</sup> Ohuaya Eyacuiñajjija esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajjija esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. <sup>17</sup> Huaniya ebionei esohui huohui caje, majoya aje Quitohua, Eyacuiñajjija huoojea'yohua esohui huohui caje. Huani Enia jayojja cuaje. Enia ma etiiquiana cua; Eyacuiñajjija esohui huohuijji nei nei cua. Huani Eyacuiñajjija esohui huohui po nequije. Shajjama' cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acaje.

<sup>18</sup> Sacaniaa huohui'ajja ca cua esohuidojiji jama ba'a: —De, ¿achajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

<sup>19</sup> Esohuidojijiya jama tecueame aca cua ba'a: —Eya bajjani Jamieni, eya Eyacuiñajjija esohuidojiji nei nei cueyanaje. Ohuaya eya huoojea canaje minijje mimiya. Ecuea esohui quea bame miyaya shajja'ajjanaje. <sup>20</sup> Miya jjashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaya cua esohuidojiji.

Majoya aje Sacania mimi ajja po mee ca'ya cua.

<sup>21</sup> Pea cuaa esecuejo nequia ishoa'ajja ca nequia cua Sacania. Jama huohui'ajjame aca cua ba'a: — ¿Yajjajje shai Sacania eyiyedojo tii nequi?

<sup>22</sup> Majoya Sacania esecue yasijje cuaya'yo majje mimi'yo ajja cua. Eme nei ca ca oe huo canequia cua Sacaniaa. Sohuimajojo jama aca cuaa cua ba'a: — Ohuaya pojja'a ba canaje esohuidojojji nei eyiyedojo nequi, de.

<sup>23</sup> Sacania Eyacuiñajjiya equijo chacojeyo majje poquia cua oja equi yasijje. <sup>24</sup> Quijje pishana Sacaniaa ehuanase bacua jea ca cua, o'ejji po majje. Isameni me oejje ba'ime cuayaqui'yo jjima; ania cua oja equijo tii. Oya jjashahuabaquia cua jama ba'a: <sup>25</sup> —Eyacuiñajjiya eya jjamejoqui meesahua canaje queabihui epoji. Jjeya pea cuana mimijaji'yo ajja e bacuajjiyo —jamaya Isameni cua.

### *Esohuidojjiya Mania huohui ca cua quijke ojuya ebacula ecuayajjiyo*

<sup>26-27</sup> Janinea meshijo oe epona ahuema'ani ania cua, Mania bajjani. Oya Nasanena cuiñajjiyo ania cua. Isameni Maniaja enene mese cua. Isameni me oejje oe ba'ime o'ejji anijo Eyacuiñajjiya ma esohuidojji huoojea ca o'oya cua Mania que. Mania jjahuaqui jjima cua; dejja ba po jjima ania cua. Oya ca jjahuaqui sa cua dejja yohua bajjanijo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuajo nei nei cua. <sup>28</sup> Esohuidojji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquijji. Eyacuiñajji miquea

Emeshi Mese nei, miya ohuaya jaahuana cani – jamaya cua esohuidojoojji.

<sup>29</sup> Mania quea mete cuanaje esohuidojoojji esohuijo. Majoya oya jama jjashahuabaquime cua ba'a: –¿Apiojji shai oya jama mimime cuani enijje?

<sup>30</sup> Esohuidojoojjiya jama aca cua ba'a: –Mania, ja'a quea mete pojji! Eyacuiñajjiya miya quea jea nee acani. <sup>31</sup> Jjeyahua nei miya o'ejji anije, ebacuajje dejja cuaje. ¡Yohua bajjani acue ba'a: Jesosa! <sup>32-33</sup> Oya quea bame nee nee ba'eje. Pea cuaa bajjani caje Eyacuiñajjiya Bacua Ejja nei oya. Eyacuiñajjiya oya po mee caje'yo ojjañaja Emeshi Mese nei epojji; Dabi emeshi mese jayojja oya cuaje. Jodio dejjaja Emeshi Mese po tiitiije'yo – jamaya cua esohuidojoojji. <sup>34</sup> Maniaa esohuidojoojji huohui'ajja ca cua jama ba'a: –¿Achajja jjamejoquime acuae po cajji so'o, ca dejja ba po jjima?

<sup>35</sup> Esohuidojoojjiya jama aca cua ba'a: – Edojjoshahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'e mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. <sup>36</sup> Ecuea esohui e'e jojo nei, mique nene Isameni esho'yahua bacuama' tii cua. Jjeya ca ca oe jjamejoquinaje. Me oeje oe ba'ime ejjamejoqui ani. Jamajjeya ecuea esohui e'e jojo cuanaje. <sup>37</sup> E'e, Eyacuiñajjiya camaja'ama po mee caje'yo ojjaña –jamaya esohuidojoojji cua.

<sup>38</sup> Jamajjeya Mania jama cua ba'a: –Eya Eyacuiñajji nijje jjapee neineiqui sa cuani. Miquea esohui jayojja jama ca'a cahua Eyacuiñajjiya – jamaya cuanaje Mania.

Majoya esohuidojojji poqui'yonaje.

*Mania poquia cua e'a'i meseja equi yasijje anicuaa*

<sup>39</sup> Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuajinaje, eyiyojo ba'eca huasijje. <sup>40</sup> Isamenija equi yasijje dobiqui majje Mania jama cua ba'a: —Eya mi que cueyanaje anicuaa.

<sup>41</sup> O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya mimi mee ca cua. <sup>42</sup> Jamajjeya Isameni jjanobajjima nei mimia cua Mania ni-jje jama ba'a: —Mania, miya Eyacuiñajjija quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. <sup>43</sup> E'e, miya cueyanaje e que anicuaa, jamajjeya eya quea bihui nee cuani miya Eyacuiñajjija Bacua ba'e meejojo. <sup>44</sup> Mi ecue equi yasijje dobiajo ecuea ebacua moquiquinaje teejo ba'e. <sup>45</sup> E'e, miyaya Eyacuiñajjija esohui shajja'ajja neineinaje, jamajjeya jamaya acaje'yo —jama mimimeya Isameni cua.

<sup>46</sup> Majoya aje Mania jama mimime cua ba'a: —Jjeya eya quea bihui nee nee Eyacuiñajji ni-jje. <sup>47</sup> Eyacuiñajji ecuea Emeshi Mese nei cuani. Ohuaya ecuea mimishi cuijea ca'yonaje. <sup>48</sup> Jamatii eya epona, ahuema'ani. Eya ba'e sa cuani Eyacuiñajjija yajjijo. ¿Yajjajo shai Eyacuiñajjija eya bacaca canaje? Jamatii ojjaña cuana aje oe mimi titiije'yo ejo jama ba'a: "Mania quea bihui nee nee. Eyacuiñajjiya oya bacaca canaje". <sup>49</sup> Eyacuiñajji

quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. <sup>50</sup> Eyacuiñajjiya ojaya epee-jji cuana jaahuana cani. E'e, ojjaña joya onijje jjapeequiani Eyacuiñajjiya jaahuana cani eti-quiana yahuajo nei ba'ya cua, esho'iquiana jjeya nei ba'yani pea'ai. <sup>51-52</sup> Beca cuana onijje jjapeequi jjima ohuaya ca'a'ama po mee ca'yani. Dejja mimishi cuana ca'a'ama po mee ca'yani, emeshi mese mimishi cuana ohuaya ca'a'ama po mee ca'yani. Ojaya epeejjji ca ca oe ohuaya quea ca'a po mee ca'yani. <sup>53</sup> Ojjaña cuana oja esohuijo jjashajja'ajjaqui sa cuanijo ohuaya jjashajja'ajjaqui mee caje'yo. Beca cuana ca ca oja esohuijo jjashajja'ajjaqui sa po ajjajo ohuaya jjashajja'ajjaqui mee jjima acaje'yo; jeajea caje'yo cuaqui yasijke jjashajja'ajjaqui sa po ajjajojo. <sup>54</sup> Eyacuiñajjiya Jodio dejja cuana jaahuana caje. Jamajjeya ohuaya oja Bacua Ejja huoojea caje Jodio dejja jaahuanajji epoji. Ohuaya pajea'yo jjima acaje'yo. <sup>55</sup> Jamaya ohuaya esejaya etiiquiana Amajama jaahuana ca cua. Oja bacua cuana pea'ai jaahuana ca cua. Oja osecua cuana jaahuana tiitii ca cua. Jjeya nei ohuaya eseuya jaahuana cani pea'ai –jama bihuiameya Maniaa Eyacuiñajji aca cua.

<sup>56</sup> Majoya Mania pea beca peejiima ba'ime ania cua oja nene nijje. Majoya aje Mania poqui'ya cua oja equi yasijke.

### *Huani cuaya cua ona besameejji epoji*

<sup>57</sup> Quijje Isamenija bacua cuaya cua; yahue cua. <sup>58</sup> Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua

Isamenija ebacua cuayajo. <sup>59</sup> Me oejje pea beca peejjima cahuime po majje ojjaña cue o'oya cua ebacua bajjaniya; oja cuiishasha jehuisejjajea pe'a'i. Ojjañaa bajjani sa aca cua ejeajjiya bajjani. <sup>60</sup> Isameniya ca jama aca cua ba'a: —Chojja, ¡yohua bajjani oe acue ba'a: Huani!

<sup>61</sup> Pea cuaa jama aca cua ba'a: —¿Apiojji acuaeaya ma bajjani aje? Chama' aje jja che pea bajjani Huani.

<sup>62</sup> Jamajjeya aje jja oe ojjañaa Sacania huohui'ajja ca cua: —¿Ae bajjani acuae jja cuaje so'o?

<sup>63</sup> Majoya Sacaniaa mimi aijja jjejojo jama tehueme aca cua ba'a: —¡Huani bajjani oe acue!

Ojjaña jama cua ba'a: —E'e, ¿apiojji shai?

<sup>64</sup> Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. <sup>65</sup> Ojjaña cuana ca jja ca jama cua ba'a: —De, Sacania mimi'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya. <sup>66</sup> Ojjañaa shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee nee cuaje; Eyacuiñajjiya quea bame nee nee ba'e meesahua caje Huani.

### *Sacania sohuicuaya cua*

<sup>67</sup> Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: <sup>68</sup> —Eseyaya oe Eyacuiñajji ejjabihuiaqui, ojjañaa. Oya esejaya Emeshi Mese nei, Jodio dejjaja Emeshi Mese nei, de. Ohuaya esejaya mimishi cuana cuijea ca'yani. <sup>69</sup> Ohuaya Quito huoojea caje ese que. Ma ehuoojea'yo Quito quea sohui

poja nee nee cuaje'yo. Quitohua eseya quea ca'a po mee caje'yo. Ojaya etiiquiana Dabi emeshi mese cua yahuajo nei iye ca'a ca'a cua, Quito ca ca oe ojjañaja Emeshi Mese cuaje ese jaahuana-jji. <sup>70</sup> Jamaya yahuajo tehue ca cua Eyacuiñajjiya esohui huohuijji cuaa. Tehue majamaja ca cua Quitojo. <sup>71</sup> Jama tehueme aca cua ba'a:

“Yani dejja cuana ecuana nijje mimijaji neineiani. Ecuana boti'ama cuani, cuiajea sa acani. Jamajjeya aje oe ecuanaya Eyacuiñajjiya jaahuana cani”.

Jamaya esohui etehue'yo cuana cua.

<sup>72-73</sup> —Eyacuiñajji yahuajo mimia cua ecuanaja etiiquiana nijje, Amajama nijje jama ba'a: “Eyaya Quito huoojeaje'yo miquiana ojjaña jaahuanajji”. Jamaya aca cua ohuaya ojaya epajea'yojji pojjeamajojo. <sup>74-75</sup> Jamajjeya eseyaya Eyacuiñajji ejjabihuaqui; Quitoqua dejja mimishi cuanajo mete'ama po mee cani. Eseya jaahuana caje'yo. Quea bame ba'e mee caje'yo mimishi'ama epo'yojji —jama sohuicuayameya Sacania cua.

<sup>76</sup> Majoya Sacaniaa oja bacua jama aca cua ba'a: —Miya ecue bacua oe nei. Miya Eyacuiñajjiya esohui huohuijji cuaje'yo. Ohuaya miya huoojea caje ebionei. Huohuicue jama ba'a: “¡Oya shajja'ajjacue! Oya Quito, Eyacuiñajjiya huoojea'yo ojjaña jaahuanajji cueje”. <sup>77</sup> Huani, miyaya ojjaña cuana huohuicue jiquio esohui jama ba'a: “Eyacuiñajjiya ojjaña cuanaja mimishi cuijea caje'yo onijje jjapeequianija”. <sup>78</sup> Jamaya eseya Eyacuiñajjiya quea jea nee nee acaje'yo. <sup>79</sup> Jamajjeya ecuana mete'ama cuaje onijje jjapee-

qui majje. Poquije eyahuasijje onijje eba'e titii'yojji. Ohuaya eseya quea bihui po mee caje'yo —jamaya Sacania cua.

<sup>80</sup> Majoya ebacua tii majje quea ca'a nee nee cua; Eyacuiñajija epreeji nei nei cua. Oya oe nei ba'ya cua quimajo. Majo tiiya aje Huaniya esohui huohui ca cua Jodio dejja cuana huasijje.

## 2

### *Jesosa cuayanaje (Mateo 1.18-25)*

<sup>1</sup> Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacojji cuana huohui ca cua jama ba'a: — ¡Sicoquicue ecue meshijo ba'e cuana! ¿Ache huiso ba'ajja'yo socue? ¡Huohuicue ojjaña dejja cuana jama ba'a: “¡Poquicue mi cuayacula meshi yasijje mique bajjani tehueya; jamaya emeshi mese cuanaje!” acue! —jamaya Sesaa aca cua.

<sup>2</sup> Emeshi meseya Sesaa jama sico coome aca cua. Ma shejo tiiya pea emeshi mese Sineño bajjani cua; ojaya meshi Sania bajjani cua. <sup>3</sup> Jamajjeya aje oe ojjaña poquia cua o cuaya cua meshi yasijje.

<sup>4-5</sup> Jose, Maniaja ejajiba cua. Jose Nasanenajo ba'eja jajiba cua, Janinea meshijo. Oja etiiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea huesha poquia cua. Mania ebacua cuayajea'yo pana nei poquia cua. <sup>6</sup> Majoya aje Benena bañaqui majje Maniaja bacua cuayañaquinaje. <sup>7</sup> Quea dejja

huiso ania cua Benenajo jjabajjani tehue mee-quiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya ebacua cojjasobo cuaya cua jomajo. Cuayajo ohuaya bebo ca cua daqui oshejo.

*Ñajjaja jaahuanajji cuaa esohuidojiji ba ca cua*

<sup>8</sup> Ma mecajje aje Benenajo chipi nei pishana ñajjaja jaahuanajji cuana ñajjaja cuiña po aña cua.

<sup>9</sup> Majoya aje esohuidojiji jjaja'aquia cua. Majoya aje oe o chipi nei jeajahuajahua ca cua esohuidojijiya. Mête neinei'ya cua ñajjaja jaahuanajji cuana. <sup>10</sup> Esohuidojiji jama cua ba'a: —¡A'a quea mete pojji! Eyaya esohui quea bame nee huohuiaña ojjaña dejja cuana quea bihui nee po meejjji. <sup>11</sup> Jjeya nei cuayanaje oe ebacua Dabija meshijo. Ma ebacua Eyacuiñajjiya huoojea'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. <sup>12</sup> ¡Miquianaya poquicue ebacua baa Benena huasijke! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojiji.

<sup>13</sup> Majoya aje quea huiso esohuidojiji cuana jjaja'aquia cua. Sohuicuayanaje ojjaña esohuidojiji cuana Eyacuiñajji bihuijiji. Jama sohuicuayame cua ba'a:

<sup>14</sup> “Eyacuiñajji quea ca'a nee nee. Eyajo ba'e, quea ao nee nee. Eyacuiñajjiya ojjaña ojaya epee-jji cuana ojjaña meshijo ba'e quea bihui po mee caje”.

<sup>15</sup> Majoya esohuidojiji ba'esohuaqui'ya cua eyahuasijke. Ñajjaja jaahuanajji cuana jama mimime cua ba'a: —De, cue'ajja Benena huasijke.

Ma esohuidojijiya huohui canaje jayojjaya aje  
seya aje.

<sup>16</sup> Majoya poqui cuajicuajia cua ebacua sa'ajja. Majoya ana'ai jaajji equijo jaa ba cañaquia cua ebacua, Mania, Jose pea'ai. <sup>17</sup> Majoya ba maje huohui'ajja cañaquia cua esohuidojijiya esohuijo ebacuajo. Pea cuana huasijje huohui ca cua pea'ai. <sup>18</sup> Beca cuana shajja'ajja maje jjashahuabaquia cua ñajjaja jaahuanajji cuanaja esohuijo. Quea bame cua. <sup>19</sup> Mania jjashahuabaquia cua pea'ai. Pajea'yo jjima aca cua ñajjaja jaahuanajji cuaa huohui canaje esohui. <sup>20</sup> Majoya ñajjaja jaahuanajji cuana poqui'ya cua ñajjaja jaahuan'a'yohua. Poquije'yohua Eyacuiñajji bihuia nei nei ca poqui'ya cua. Esohui quea huiso sohuicuaya cua: —Esohuidojijiya esohui e'e jojo nei —cuanje.

*Ebacua Jesosa dojodobia cooqui ca cua Eyacuiñajjiya equiyasijke*

<sup>21</sup> Me oejje pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojijiya esohui jayojja Mania jjamejoqui jjimahuajo bajjani ca cua. Jesosaja cuiishasha jehuisejjajea ca cua pea'ai, ojjaña Jodioja ebacua jayojjaya jama aca cua.

<sup>22</sup> Ba'i oe cuajo Maniaa Joseya pea'ai Jesosa dojo ca cua Eyacuiñajjiya equi yasijke Jenosanena huasijke. Maniaa Eyacuiñajjiya equi yasijke dobiqui jjimahuua Moisesija etehue'yo jayojja aca cua. Majoya Jesosa dojodobiaqui canaje Eyacuiñajjiya equi yasijke huohuiya. <sup>23</sup> Jamaya aca cua Moisesija etehue'yojo ba'a:

“¡Ebacua cojjasobo dejja huohuicue Eyacuiñajji yasijke! <sup>24</sup> ¡Becanejjiji pealai huia' quiacue Eyacuiñajji nijje mimiani yasijke equiyo jeyojeyo'yojji cuaqui pohui pojji epo'yojji! Jamaya miya ajo Eyacuiñajjiya mimishi cuijea caje'yo. ¡Jamaya Eyacuiñajji sosequiajji acue!”

Jamaya Moisesija etehue'yo cua.

<sup>25</sup> Oe Jodio etii Simeoni bajjani Jenosanenajo ba'ya cua. Oya Eyacuiñajjiya epeejji nei quea bame nee nee cua. Ohuaya Quito ishoa'ajja ca ania cua Eyacuiñajjiya huoojea'yo ojjaña jaahuanajji. Jamatii jjashahuabaquiani Eyacuiñajjiyo, jamajjeya Edojjoshahua Bame ojo nequia cua. <sup>26</sup> Jamaya Edojjoshahua Bame onijje cua ba'a: –Miya emano'yojji pojjeama Eyacuiñajjiya huoojea'yo cue jjimahuajo.

<sup>27</sup> Jamajjeya Edojjoshahua Bameya Simeoni poqui mee ca cua Eyacuiñajjiya equi yasijke. Simeoniya Jose, Mania Jesosa bishamijji nequi ba ca cua Eyacuiñajjiya equijo. <sup>28</sup> Simeoniya ebacua Jesosa aña majje ba ca cua. Eyacuiñajji bihuia ca cua Jesosa ohua ba mee cajje. Jama cua ba'a: <sup>29-30</sup> –E'e de, jjeya nei Eyacuiñajjiya huoojea canaje ma ohua huoojeapana ca cua; jamajjeya ohuaya eya ba mee canaje. Jjeya eya poquije'yo Eyacuiñajji yasijke quea jaji nee eba'e tiitii'yojji. <sup>31</sup> Ojjaña meshijo ba'e cuaa Jesosa ba caje, Eyacuiñajjiya huoojea'yo ojjañaja mimishi cuijea'yojji. <sup>32</sup> Jesosaa ojjaña dejja cuana quea jjashahuabaqui ja'a nee po mee caje'yo Eyacuiñajjiya esohuijo. Jesosa Emeshi Mese nei epojjijojo, Jodio dejja cuana quea bihui cuaje'yo –jamaya Simeoni cuanaje.

<sup>33</sup> Majoya Jesosaja chii, enaese pea'ai jjashahuabaquia cua Simeonija esohuijo jama ba'a: —E'e de, Simeonija esohui quea bame nee nee Jesosajo.

<sup>34</sup> Majoya aje Simeoniya Mania, Jose pea'ai jama aca cua ba'a: —Miquianaya aje Eyacuiñajjiya quea bame acaje'yo. Mique bacua quea ca'a po mee caje. Jaahuana caje'yo. Mania, miya Jesosaja enaese. Mique bacuua Jodio cuana jjashahuabaqui mee caje'yo Eyacuiñajji quea huiso nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. <sup>35</sup> Mimijajije Jesosa nijje cuana. Oya quecuia caje'yo cuaa. Majoya aje oe miquianaya quea yeno cuaje ma cuanajoya — jamaya Simeoni cuanaje.

<sup>36</sup> Jomajo oe epona tii ania cua; Ana bajjani. Eyacuiñajji ja epeejji nei nei cua; Panoaneja bacua piona. Ojaya huapa pojjeama Asene bajjani cua. Yahuajo oya jjahuiquia cua. Oja yahue nijje ba'ya cua me oejee beca, 7 shequajame. Majoya aje ojaya yahue mano'ya cua. <sup>37</sup> Jamajjeya quea huiso nee nee shequajame, 84 shequajame ania cua. Etii nojinoji nei e'ahuemano'yo ania cua. Eyacuiñajji ja equijo jjeya ani, cuayaqui ajja neinei ania cua. Jamatii mimiania cua Eyacuiñajji nijje, bihuiabihuia tiitidiania cua ojjaña pojajo.

<sup>38</sup> Anaa ba ca cua Jesosa. Quea bihui nee cua. Jamajje dejja cuana nijje mimia cua joya Eyacuiñajji ja huoojea'yo ishoa'ajja po ani nijje jama ba'a: —E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo

Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

*Jose poqui o'oya cua oja meshi yasijke Nasanena huasijke*

<sup>39</sup> Ojjaña Moisesija etehue'yo acua ajeyo'yo mاجje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijke poqui o'oya cua, Nasanena huasijke. <sup>40</sup> Jomajo Jesosa tiia cua; quea ca'a nee nee, quea jjashahuabaqui ja'a nee cuanaje. Eyacuiñajjiya oya jaahuana ca cua; quea bei nee nee ojo cua.

*Jesosa etii shacuima' nequi epo oja naeya oja chiiya pea'ai dojo ca cua Eyacuiñajjiya equi yasijke*

<sup>41</sup> Jesosaja chii oja nae nijje poqui nequia cua Jenosanena huasijke pea Jodio cuana nijje ojjaña shequiajajo. Pascua pohua poquia cua Eyacuiñajji bihuiaa. Yahuajo nei Jodio etiiquinanaja bacua cuana esohuidojijiya cuia'yo jjima aca cua shejo poquia cua ojjaña nijje ijija'ijjiaa. <sup>42</sup> Jesosa etii shacuima' nequi po majje, 12 shequiajame po majje poqui pea'aiya cua. <sup>43</sup> Oe semana Jenosanenajo aniya ojjaña cuaa Eyacuiñajji bihuia ca ania cua. Majoya Pascua jjayejjequiajo ojjaña cuana poqui ca'ya cua. Jesosa ca ca poqui'yo jjima cua. Jamatii ojaya enaeseja ba'yo jjima cua, oja chiija pea'ai. Jesosa pea cuana nijje pojebe'yani poso aca cua. <sup>44</sup> Majoya aje oe cahuime cuajo Jesosaja enaeseya niñeba ca'ya cua: —¿Aecue jiquio Jesosa so'o?

<sup>45</sup> —Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosanena huasijke Jesosa sa'ajja'yohua. <sup>46</sup> Majoya

pea beca peejjima cahuime epo ba ca'ya cua Jesosa Eyacuiñajjija equijo nequi. Jesosaa Eyacuiñajjija esohui huohujji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. <sup>47</sup> Ojjaña jjashahuaba neineiquinaje Jesosaja esohuijo: —E'e de, Jesosa quea ja'a nee nee jjashahuabauiani, de —pea cuana cua.

<sup>48</sup> Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya acuae mi po nequinaje so'o? Ecuanajaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

<sup>49</sup> Jesosaa jama aca cua ba'a: —¿Apiojji acuae iña sa'ajja'yaña so'o? ¿A'a mi quea ba jjima eya ecue Chiija equijo enequijji, Eyacuiñajjija equijo?

<sup>50</sup> Jose Mania pea'ai oja esohuijo jjabahuejjaqui jjima cua yajja cuani poso aca cua.

<sup>51</sup> Majoya aje Jesosa oja chii nijje oja nae nijje Nasanena huasijke poqui o'oya cua, ma o ba'e yasijke. Jamatii Jesosaa shajja'ajja ca cua Jose, Mania pea'ai. Queabihui ba'ya cua. Mania jjashahuabauquia cua Jesosaja esohuijo; pajea'yo jjima aca cua. <sup>52</sup> Jesosa tiiya cua quea ca'a nee nee; quea ja'a nee nee cua. Eyacuiñajji queabihui nee cua Jesosajo; dejja cuana queabihui cua pea'ai.

### 3

*Huaniya Eyacuiñajjija esohui huohui ca cua  
(Mateo 3.1-12; Macoso 1.1-8; Huani 1.19-28)*

<sup>1</sup> Quije nei mahuiso emeshi mese cuana cua ba'a: Shomano dejja cuanaja emeshi mese Time-neo bajjani. Quea huiso shequiajame, 15 shequiajame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua. Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininajia emeshi mese Nisania bajjani cua. <sup>2</sup> Eyacuiñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiiya aje Huani Sacaniaja bacua ejja nequia cua meshi quimajo. Onijje mimi majje Eyacuiñajjiya Huani huoojea ca cua esohui huohuijji epojji. <sup>3</sup> Jamajjeya Huani po'ayequie nequia cua Eyacuiñajjiya esohui huohuiya Jodana cueijje. Ohuaya pea cuana jama huohuime aca cua ba'a: —jjashahuabaquicue Eyacuiñajjiyo; miquea mimishi pajea'yocue! ¡Miquea mimishiyo quea yeno pocue! ¡A'a mimishi maja sa po'yojji! Miya mimishi pajea'yajo, aje Eyacuiñajjiya miquea mimishi cuijea caje'yo. Eyaya miya besa meeje enajje pea cuanaja ebajji miya Eyacuiñajjiya epeejji nei nei cuanijo.

<sup>4</sup> Jamaya Isaiaa yahuajo nei Huanijo tehue ca cua. Isaia Eyacuiñajjiya epeejji, esohui huohuijji cua. Oya etiiquiana nei nei cua. Jama tehuemeya aje yahuajo aca cua ba'a:

“Oe dejja quimajo nequi taaani jama ba'a: ¡Acua pocue! ¡jjashajja'ajjaquicue Eyacuiñajjiya huoojea'yo ojjaña jaahuanajjiyo!

<sup>5</sup> Eyacuiñajjiya dejja quea mimishi cuana jeajea caje cuaqui yasijke jjashajja'ajjaqui ajja-

jojo. Ojjañaa joya Eyacuiñajjija esohui ojaya ehuoojea'yo ojjaña jaahuanajjijo shajja'aῆja cani ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. <sup>6</sup> Ojjaña meshijo nequica dejja shajja'aῆja caje Eyacuiñajjija esohui. Joya onijje jjapeequije Eyacuiñajjija mimishi cuijea caje'yo".

Jamaya cua Isaiaja etehue'yo Huanijo.

<sup>7</sup> Majoya dejja quea huiso cueya cua Huani que mimishi pajea'yohua nisho, oja besa mee yohua nisho pe'aīiya. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jjashahuaba taiquiani jama ba'a: "Eyacuiñajjija eya jeajea jjima acaje cuaqui yasijje Huanija enajje ebesa meejojo". Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'aῆjacue Eyacuiñajjija esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuiñajjija epeeiji nei epoji. <sup>8</sup> Miquianaya Eyacuiñajjija epeeiji nei ba'yanijo, mimishi epo beca'yojjji pojjeama. ¡Jama jjashahuabaquimeya oe pocue enajje ebesaqui cuahuajje! A'a mimijji jama ba'a: "Ecuea etiquiana Amajama cua. Oya Eyacuiñajjija epeeiji nei cua, jamajjeya aje oe ecuanaya Eyacuiñajjija epeeiji pe'aī cuani". Cho, miquianaya ca ca jjapeequi jjima Eyacuiñajji nijje. Miquianaya quea mimishi, de. Eyacuiñajji ojaya epeeiji quea huiso sa cuani jojjemo Amajama jayojja epoji, ohuaya mei pana came. <sup>9</sup> Miquianaya joya acui jjajjama'

jayojja cuani. Jiquio ecua acui jjajja'yo ajja jajajea ca'yojji jayojja jama Eyacuiñajjiya dejja mimishi acaje'yo, jeajea caje'yo cuaqui yasijje. Jamaya aje miquianaya acaje'yo mimishi pajea'yo ajjajojo, onijje jjapeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yani, Eyacuiñajji nijje jjapeequiani jjejojo. Quea bei ba'yani pea cuana nijje, oya Eyacuiñajjiya quea jea nee acani jjejojo.

<sup>10</sup> Majoya aje dejja cuaa jama huohui'ajjame aca cua ba'a: —¿Yajja acuae oe po cajji so'o?

<sup>11</sup> Huani jama cua ba'a: —¡Joya miquea beca yanijo daqui quiacue daquima' cuana huasijke! ¡Miquea bobo yanijo ca bobima' cuana huasijke quiacue!

<sup>12</sup> Emeshi meseja bejjo chichajji cuani cuaa jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

<sup>13</sup> Huani jama cua ba'a: —¡A'a quea mimishi pojji! ¡A'a quea sose huiso ajji! ¡Joya emeshi meseja sosehuiso tiiya jjeshecue! —jamaya cua Huani.

<sup>14</sup> Majoya aje sohuinanohua jama huohui'ajjame aca cua ba'a: —¿Yajja acuae ecuanaya cuaje'yo so'o?

Huani jama cua ba'a: —¡A'a miquiaaya dejja cuana iñajji bejjo esijiji! ¡A'a pea cuana nijje siajje pojji bejjo esijiji! ¡Miquianajaya bejjojo nei jjaja oe quea bihui pocue! —jamaya Huaniya sohuinano aca cua.

<sup>15</sup> Dejja cuaa Huani Eyacuiñajjiya huoojea'yo ojjaña jaahuanajji poso aca cua oja esohui quea bame nee nee cua jojoya. <sup>16</sup> Huani ca ca Eyacuiñajjiya huoojea'yo ojjaña jaahuanajji pojjeama

cua. Oya jama cua ba'a: —Eyaya miquianaya enajje besa meeje'yo Eyacuiñajjija epeeiji jojoya. Eya ca ca Eyacuiñajjija huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuiñajjija Edojjoshahua Bame dobiqui mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaqui yasijke. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijke nequi sa po ajja miquiana ani cojja nei. Quea bicho eya, de.<sup>17</sup> Quito cueje ojaya epeeiji nei chicha'yohua. Pea cuana ca ca cajaa ajea caje'yo. E'e, jiquio ecua seya anoso shaa jea majje equi yasijke iya'yaña jama ojaya epeeiji cuana acaje'yo Quitohua. Jiquio ecua seya anoso cuiahuojo majje shaa jeajeaña jayojja jama Quitohua ojaya epeeiji pojjeama cuana jeajea caje'yo cuaqui quijjo'yo ajja huasijke —jamaya Huaniya aca cua.

<sup>18</sup> Huanija pea esohui jama cua ba'a ojjaña cuanajo: —Eyacuiñajji ojjaña nijje jjapeequi sa cuani, jjeya nei.

<sup>19</sup> Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yojji. Ma epona Enodiasi bajjani cuanaje —jamaya cua Huani.

<sup>20</sup> Jamajjeya Enode ma esohui shajja'ajja majje quea quene nee nee cua. Iña mee ca cua Huani ejeanobiajeajji, Enodeya quea mimishi nee neeya jjejojo.

*Huaniya Jesosa enajje besa mee ca cua  
(Mateo 3.13-17; Macoso 1.9-11)*

<sup>21</sup> Huani jeanobiajea jjimahua poquia cua dejja ojjaña cuana nijje Jodana cuei yasijke enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajji nijje mimianijo, eyatahuatahua capajea ca cua. Edojjoshahua Bame huia' jama o sapabiajje cuabesa ba'ya cua. Japashineijje ba'eoquea cua. <sup>22</sup> Majoya esohui shajja'ajja ca cua ojjañaa eyahuasijke. Eyacuiñajji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bihui nee nee —jamaya cua Eyacuiñajji.

*Jesosaja etiiquiana  
(Mateo 1.1-17)*

<sup>23</sup> Jesosa Jodio dejja nei cua. Jesosaa 30 shequiamje tii majje esohui huohui coo ca cua. <sup>24</sup> Ojaya etiiquiana cuana yohua bajjani cua ba'a: Ebionei Jose nequia cua. Oya Jesosa tii meeiji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. <sup>25</sup> Matati ca Amosoja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. <sup>26</sup> Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. <sup>27</sup> Joana

ca Shesaja bacua ejja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. <sup>28</sup> Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. <sup>29</sup> Jesosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. <sup>30</sup> Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneaja bacua ejja cua. <sup>31</sup> Menea ca Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. <sup>32</sup> Dabi ca Isaija bacua ejja cua. Isai' ca Obedaja bacua ejja cua. Obeda ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. <sup>33</sup> Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. <sup>34</sup> Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Naconija bacua ejja cua. <sup>35</sup> Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua.

<sup>36</sup> Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. <sup>37</sup> Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. <sup>38</sup> Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajjija pana cua. Oya ebionei dejja cua.

## 4

*Edosiquiana etiiya Jesosa quea mimishi po mee  
sa aca cua*  
(Mateo 4.1-11; Macoso 1.12-13)

<sup>1</sup> Jesosa cueyanaje Jodana cuei yasijje Huanija besa meeya. Jomajo Edojoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje oja emeshi mese nei epo'yojji nisho. <sup>2</sup> Jomajo nequia cua quea huiso nee cahuime, 40 cahuime ij{j}ia'ij{j}ia jjima cua. Majoya quea shoe nee nee jjabaquia cua. <sup>3</sup> Edosiquiana etiiya Jesosa jama huohuime aca cua ba'a: —Miya Eyacuiñajjija Bacua jjabaqui majje ca oe jjiquio mei pahui pojji acue! ¡Pahui pojji amajje ij{j}iacue!

<sup>4</sup> Jesosa jama cua ba'a: —Chojja de, eya miquea esohui shajja'ajja sa po ajja. Bacue, Eyacuiñajjija etehue'yo jama cuani ba'a: “Dejja cuana bobijo ca'a po majje pojjeama ba'e tiitije'yo. Ojjaña Eyacuiñajjija esohui jayojja jama añajo ca se ca oe

quea bame nee ba'e tiitiije'yo" —jamaya Jesosa cua.

<sup>5</sup> Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua. <sup>6</sup> Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. <sup>7</sup> ¡Miyaya eya bihuiacue, shajja'ajjacue ecuea esohui! Majoya miya emeshi mese po meeje'yo eyaya —jama siajje ameya aca cua Edosiquiaa Jesosa.

<sup>8</sup> Jesosa jama cua ba'a: —Chojja, ¡poquicue quea huesha, Edosiquiana! Eyacuiñajjija etehue'yo jama cuani ba'a:

“¡Eyacuiñajji oe nei bihuiacue; oya oe nei ojjañaja Emeshi Mese nei nequi! ¡Ojaya ehuohui'yo jama oe acue!” —Jesosaa aca cua.

<sup>9</sup> Majoya aje Edosiquiaa Jesosa dojo ca cua Jenosanena huasijje. Nequia cañaquia cua Eyacuiñajjija equi biajje. Majoya Edosiquiaa Jesosa jama aca cua ba'a: —Miya Eyacuiñajjija Bacua Ejja nei jjabaqui majje jjiquiojo nequi tohuua'a'jja'yo socue meshi yasijke! <sup>10</sup> Eyacuiñajjija etehue'yo jama cuani ba'a:

“Eyacuiñajjiya huoojea caje esohuidojiji cuana mi jaahuanaa. <sup>11</sup> Oquequiajo ohuaya emeya miya iñajjequi caje'yo. Jamajjeya miya ejajiojji quecuasajaquijji pojjeama meijo”.

Jamaya cuani, de —Edosiquiana cuanaje.

<sup>12</sup> Jesosaa jama aca cua ba'a: —Chojja, miya jjashahuaba taiquiani, de. Eyacuiñajjija pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjiya oja esohui e'e jojo nei acaje'yo? ¿A'a eya jaahuana nei caje'yo? Caba'ajjasahua. ¡A'a pojji!”

Jamaya yahuajo nei Moisesiya tehue ca cua — jamaya Jesosa cua.

<sup>13</sup> Edosiquiana jjashahuabaqui jjima cua; pea esohui chama' cua Jesosa quea mimishi po meeiji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

*Jesosaa huohui coo ca cua Janinea meshi yasijke  
(Mateo 4.12-17; Macoso 1.14-15)*

<sup>14</sup> Majoya Jesosa posohuaqui o'oya cua oja meshi yasijke, Janinea meshi yasijke. Edojjosahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijke mimia cua. <sup>15</sup> Jamatii Jesosa po'ayeque nequia cua pea cuiñajji cuana huasijke Eyacuiñajjija esohui huohuiya Jodioja equi ejjachichaquijji cuana huasijke. Ojjaña dejja queabihui cua onijje. Jama cuana cua ba'a: —E'e, ojaya esohui quea ja'a nee, quea bame nee nee.

*Jesosa poquia cua Nasanena huasijke  
(Mateo 13.53-58; Macoso 6.1-6)*

<sup>16</sup> Jesosa poquia cua Nasanena huasijke, oya tii'ya cua jomajo tii. Ojjaña epojja ejomishocajjijo Jesosa dobiqui majamajanaje Jodioja equi ejjachichaquijji yasijke esohui huohuiya. Jamajjeya dobiqui majje oya nequisohua cua Eyacuiñajjija

etehue'yo ajji. <sup>17</sup> Oe dejja, etehue'yo jaahuanajiya Jesosa quia ca cua etehue'yo. Yahuajo Isaiaja etehue'yo cua. Isaia Eyacuiñajjija epeejji nei, etiiquiana cua; Eyacuiñajjija esohui huohujji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

<sup>18</sup> “Edojjosahua Bameya eya jjashahuabaqui mee cani. Ohuaya eya huoojea canaje jama ba'a: —¡Huohuicue ecuea esohui bame dejja aema' cuana huasijke! ¡Huohuicue dejja ejeanobiajaa cuana huasijke ecuayaqui mee'yojji! ¡Huohuicue cojjama' cuana huasijke ejjacojja ja'a meequi'yojji! ¡Huohuicue pea dejja quea yeno ba'e yasijke quea bihui eba'e meeiji!

<sup>19</sup> Huohuicue jiquio esohui: Emeshi Mese neiya ojjaña cuana quea bihui ba'e mee sa acani”. Jamaya Isaiaa tehue ca cua yahuajo nei.

<sup>20</sup> Majoya Jesosaa etehue'yo cami ca'yonaje; quia ca o'oya cua ma dejja huasijke. Jesosa anioquea cua huohui epojji. Ojjaña oya ba ca'ya cua; ishoa'ajja ca cua ojaya esohui ehuohuujji. <sup>21</sup> Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma dejja cuana huasijke esohui huohuuya. Eyaya miquianaya huohui'ajjaña jama ba'a: Eyacuiñajjija quea bihui ba'e mee caje'yo miquianaya —Jesosaa aca cua.

<sup>22</sup> Ojjaña Jesosajo quea bame mimia cua. Jjashahuabaquia cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei,

Eyacuiñajjija Bacua pojjeama —jamaya pea cuana cua Jesosa Eyacuiñajjija Bacua pojjeamajo poso.

<sup>23</sup> Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijjijo ba'a: “Ejjashicuquijji, ¿yajjajje acuae jjia miyaya mi jjashicui'ajjaquiani so'o?” ¿A'a nequiana jamaya pea'ai jjashahuabaquiani? Jama cuani ba'a: “Ecuanaaya miya shajja'ajjanaje, Jesosa. Miyaya jjaajaqui mee'yonaje Capenaomajo ba'e cuana. ¿Yajjajo acuaeaya oe miquea meshijo ba'e cuana jjaajaqui mee'yo jjima aña so'o?” ¿A'a nequiana jamaya jjashahuabaquime cuani? —Jesosa cua—.

<sup>24</sup> E'e jojo nei ecuea esohui, jamatii miquianaya Eyacuiñajjija esohui huohuijji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

<sup>25</sup> —Miquianajaya eba ma etiiquiana Enia bajjani. Yahuajo nei ohuaya huohui ca cua Eyacuiñajjija esohui. Beshahua nei pea beca peejjima shequiajame ena po'yo jjima cua. Bobi tii jjima cua ena chamajoho. Ojjaña quea shoe nee nee cua.

<sup>26</sup> Yahuajo quea huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajjija ehuohui'yojo. Jamajjeya Eyacuiñajjija Enia huoojea ca cua pea meshi yasijke Sinono meshi yasijke, Saneta cuiñajji yasijke, Sinono e'ahuemano que. Jomajo e'ahuemanohua shajja'ajja ca cua Eyacuiñajjija esohui. Jamajjeya Enia bobia ca cua.

<sup>27</sup> —Miquianajaya eba pea etiiquiana Eyacuiñajjija esohui huohuijji Eniseo bajjani ba'ya cua Enia nijje. Quea huiso Jodio dejja batata

epo'yo jomajo ba'ya cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajjiya. Pea meshijo ba'e Sinia meshijo oe dejja Naamani bajjani batata epo'yo nequia cua; oya shajja'ajja sa cua Eyacuiñajjiya esohui. Jamajjeya oya poquia cua Eniseo que, Eniseoja jjaajaqui mee'yohua. Ohuaya shajja'ajja ca cua ojaya esohui. Jamajjeya jjaajaqui mee ca'ya cua Eyacuiñajjiya. Jamaya miquianaya shajjama' cuani miquianajaya etiiquiana jayojja. Jjeya nei shajja'ajja sa po ajja Eyacuiñajjiya esohui, jamajjeya jjaajaqui mee'yo jjima acaje Eyacuiñajjiya—Jesosa cuanaje.

<sup>28</sup> Ojjaña cuana Jodioja equi ejjachichaquijjijo anica Jesosaja esohui shajja'ajja majje quenequene neinei'ya cua Jesosa nijje. <sup>29</sup> Jesosa iña majje jeacuayajea ca cua esecue yasijke. Majoya poqui mee ca'ya cua eyiyo hui yasijke e'iñajeatohuaajea'yoji nisho. <sup>30</sup> Jamatii Jesosa poquia cua, jjayejjequinana cua ona nequi yiyesamajjeya.

*Oe dejaja eshahua nequia cua  
(Macoso 1.21-28)*

<sup>31</sup> Pea pojjaño Jesosa poquia cua Capenaoma huasijke, Janinea meshi yasijke. Ejomishocajji pojjaño oya dobiquia cua Jodioja equi ejjachichaquijjiji yasijke esohui huohuiya. <sup>32</sup> Ojjaña cuaa jama aca cua ba'a: —De, Jesosaja esohui quea ja'a nee. E'e jojo nei pojja'a Eyacuiñajjiya oya huoojea canaje, de.

Jamajjeya ojaya esohui shajja'ajja sa aca cua.  
<sup>33</sup> Oe dejaja eshahua nijje tii ania cua Eyacuiñajjiya

equijo. Eshahuua oya taaa sajasaja mee ca cua Jesosa que jama ba'a: <sup>34</sup>—E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yohua. Ecuana jaya miya eba, Jesosa. Miya Nasanenajo ba'e, miya Eyacuifajija Bacua, miya mimishi'ama, de —jamaya eshahua cua.

<sup>35</sup> Jesosaa eshahua tecueajea ca cua jama ba'a: —¡A'a mimijji; cuayaqui'yocue jiquio dejajo nequi! —Jesosa cua.

Majoya eshahuua ma dejja jeabichajea mee ca cua pea cuana pejjejo. Eshahua nee'ama nei nei cuayaqui'yome cua ma dejjaja eyamijo nequi. <sup>36</sup> Ojjaña jjajjasohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajjajje shai quea sohui poja nee nee? —jamaya cua ojjaña Jesosajo. <sup>37</sup> Jamaya pea cuaa huohui ca cua ojjaña cuiñajjijo ba'e yasijje.

*Jesosaa boeca mee ca'ya cua Simohuija ano  
(Mateo 8.14-15; Macoso 1.29-31)*

<sup>38</sup> Majoya Jesosa cuayaquia cua Jodioja equi ejjachichaquijjijo ani. Cuayaqui majje poquia cua Simohuija equi yasijje. Dobiqui majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuiya Jesosa jama huohui'ajjame aca cua ba'a: —Jesosa, ¿a'a miyaya boeca meeje'yo ecue ano, ecue huanaseja enaese?

<sup>39</sup> Jesosaa Simohuija ano jama aca cua ba'a:  
—E'e, jjeyahua nei mi quiyoquiyo pajaeje'yo —  
Jesosaa aca cua.

Majoya aje epona tii quiyoquiyo pajea'ya cua.  
Boecanana'ya cua. Majoya boeca'yo majje aniso-  
hua'ya cua. Anisohua'yo majje bobí cuacua  
meesahua ca cua epona tiiya.

*Jesosaa quea huiso emanojaa cuana jjaajaqui  
mee ca'ya cua*

(Mateo 8.16-17; Macoso 1.32-34)

<sup>40</sup> Quijje pishana eshequi oquequiajo ojjaña  
emanojaa dojo ca cua Jesosa que jjaajaqui  
mee'yohua. Jesosaa emanojaa cuana emeya  
napa cajje jjaajaqui'ya cua. <sup>41</sup> Eshahua cuana  
pea'ai cuayaqui mee ca'ya cua. Cuayaqui'yo majje  
eshahua cuana taaa cua jama ba'a: —Jesosa, miya  
e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimiji!  
Miquea eba eya, Eyacuiñajjija huoojea'yo ojjaña  
jaahuanajji. Pea cuanaja eya ba jjima, de —jamaya  
Jesosa cua.

*Jesosa po'ayequie nequia cua Eyacuiñajjija eso-  
hui huohuiya*

(Macoso 1.35-39)

<sup>42</sup> Jjapoijaqui jeahuajo Jesosa oe nei poquia cua  
dejjama huasijke. Pea cuanaa sa'ajja ca nequia  
cua: —¿Aecue Jesosa?

Quijje pishana ca ca ba ca'ya cuaa cua Jesosa.  
Mimia cua onijje jama ba'a: —Jesosa, ¡nequicue  
ecuanaja cuiñajjijo! ¡A'a poquijji pea cuiñajji yasi-  
jje!

**43** Jesosaa jama huohuime aca cua ba'a: — Chojja, jiquo cuiñajjijo eya nequi ajja. Eyaya Eyacuiñajjija esohui cahuohuiquiahua pea cuiñajjijo ba'e cuana huasijke. Jamajoya aje oe eya ecue Chiuya huoojea canaje ojaya esohui bame bame huohuiji pea cuana huasijke. Eyaya iyaaje dejja cuana jama ba'a: “ijjashajja'ajja quicue oe! Eyacuiñajjija miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ijmajjeya onijje jjapeequicue!” —jamaya Jesosa cua. **44** Jamaya ohuaya esohui huohui ca ayequi nequia cua Jodioja equi ejjachichaquijji cuana huasijke, ojjaña meshi cuana huasijke.

## 5

*Jesosaja epеejjiya nahuoo cuiashaja ca cua quea huioso nee nee  
(Mateo 4.18-22; Macoso 1.16-20)*

**1** Oe pojajao Jesosa Jenesane bae sahua meshi-jajijo ania cua. Pea cuana huasijke Eyacuiñajjija esohui huohui po ania cua. Quea huioso dejja ojaya esohui shajja'ajja sa aca cua. **2** Quea dejja huiosojo shajja'ajja jjima aca cua pea dejja cuaa. Jamajjeya Jesosaa pea e'anijji sa'ajja ca cua ojjaña eshajja'ajjajji. Majoya becanejjiji bishe ai ba ca cua bae sahuajo ba'e. Ma bishe mese cuana nahuoo cuiashajajji shacua'yo po nequia cua. **3** Oe bishe mese Simohui bajjani cua. Jesosa nequiso-huaquia cua oja bishe yasijke. Jesosaa Simohui huohui'ajja ca cua jama ba'a: —¡Quecuayiyejeacue ena bae pishana huasijke ojjaña ecuea esohui eshajja'ajjajji!

—E'e —Simohui cua.

Majoya bishe quecuayijeja majje Jesosaa bishejo e'anioque aniya tii esohui huohui ca aña cua.<sup>4</sup> Jesosaa esohui huohuijeyo majje Simohui jama aca cua ba'a: —Simohui, ¡bishe yocue ena bae yiyesama huasijke! ¡Majoya jeacue nahuoo cuiashajaji!

<sup>5</sup> Simohuiya jama aca cua ba'a: —Esohui huohuijji, ecuana mecajje poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa aña miquea esohui, jammajjeya eyaya jeaje ena huasijke nahuoo cuiashajaji —jamaya Simohui cua.

<sup>6</sup> Majoya yo ca cua ena bae yiyesama huasijke nahuoo cuiashajaji. Jea ca cua nahuoo cuiashajaji; quea huiso nee nee nahuoo dobiquia cua. Quecuaisaje'ajja ca cua. <sup>7</sup> Majoya Simohuiya ojaya epeejji cuana iyaa ca cua: —¡De, yacua oe yecue bishe pea, che nahuoo jjequijeasoahuahuacue!

Majoya pea bishe ye ca cua; cuio ca cua beca bishe nahuooohua. Beshahua nei bishe jaadobiquia cua. <sup>8</sup> Ma ba miquea aje Simohui ecui'oshajjajo nequia cua Jesosa pejjejo; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijo jjashahuaba taiquinaje, de. ¡Quea huesha nequicue Jesosa, eya quea mimishi cuanaje! —jamaya Simohui cuanaje.

<sup>9</sup> Simohuija epeejji cuana jjajjasohuaquia cua nahuoo quea huiso ohua cuiashaja cajo. O jayojja jjajjasoaquime pea'aiya cua, de. <sup>10</sup> Semeneoja bacua cuana Satiaco, Huani, Simohuija echacosahuajji cuani pea'aiya jjajjasohuaquia cua.

Majoya Jesosaa Simohui jama aca cua ba'a: — ¡A'a jjajjasoaquijji! Miquianaaya banaje ecuea esohui e'e jojo nei nahuoo cuiashajajji. Jjeyahua nei miquianaaya dejja quea huiso jjequije ecuea esohuijo ejjashajja'ajjaquijji, ecuea epeeiji epoiji —jamaya Jesosa cua.

<sup>11</sup> Majoya cuaa bishe yo ca'ya cua etaja huasijke. Aquiana cuana jeana'yo majje poquia cua Jesosa nijje.

*Jesosaa dejja jjajea meequi ca'ya cua batata  
epo'yo ma dejja shicui jjima acani*  
(Mateo 8.1-4; Macoso 1.40-45)

<sup>12</sup> Oe pojajao Jesosa ania cua pea cuiñajji. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jesosa ba majje ecui'oshajjajo nequia cua o bihuajji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjajeaquee mee'yome so'o? —aca cua ohuaya.

<sup>13</sup> Majoya Jesosaa napa'ajja ca cua emeya, quea jeajojo huohui ca cua: —E'e, eyaya miya jjajeaquee meeje'yo batata epo'yo. Quea boejea po meeje'yo.

Jjajeaquee mee'yo majje chama'yo cua ojaya batata epo'yo. Quea boejea ojaya ejee po'yonaje.

<sup>14</sup> Majoya Jesosaa jama huohuime aca cua ba'a: —¡A'a oe pea cuana huohuijji! ¡Eyacuiñajji equi yasijke oe poquicue! ¡Jomajo huohuicue Eyacuiñajji esohui huohuijji: “Jjajeaquee'yonaje mo” acue! ¡Moisesija etehue'yo jama oe acue! ¡Quiaquicue beca huia', beca ijjiacajji pealai, equiajji Eyacuiñajji bihuajji, miya ojaya ejjajeaquee mee'yohua jjejojo! Majoya esohui huohuijji cuana

jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonajejo –Jesosaa aca cua.

<sup>15</sup> Jamatii quea huiso dejja shajja'ajja ca cua Jesosaa jjajeaqui mee ca'yani batata epo'yo. Ohuaya jjaajaqui mee ca'yani emanojaa cuana. Jamajjeya quea dejja huiso nee cueyanaje shajja'ajja, jjaajaqui'yohua pea'ai. <sup>16</sup> Jamatii Jesosa poqui nequia cua dejjama huasijje Eyacuiñajji nijje mimiya.

*Jesosaa jjaajaqui mee ca'yonaje oe dejja jeo'ajjajaa*

(Mateo 9.1-8; Macoso 2.1-12)

<sup>17</sup> Oe pojjajo Jesosa poquinaje onaja equi yasijje esohui huohuiya. Paniseo dejja cuana, Moisesija etehue'yo huohuijji cuana pea'ai cueyanaje Eyacuiñajji esohui shajja'ajja. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jesosaa Eyacuiñajji nijjeya quea huiso emanojaa jjaajaqui mee ca'yonaje. <sup>18</sup> Jamajjeya pea dejja oe dejja jeo'ajjajaa ye ca cua equi yasijje. Dojodobiaqui sa aca cua Jesosa que. <sup>19</sup> Dobiqui meemee ajja cuana cua quea dejja huisojojo. Jamajjeya aje dojosohua ca'ya cua equi jamacoo huasijje. Huejja ca cua eyiyesama neijje. Jesosa nequi cojja nei jea'oquea ca cua. <sup>20</sup> Jesosaa ba ca cua dejja jeo'ajjajaa ojaya epeejji pea'ai. Jjashahuabaquia cua jama ba'a: –E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeya jeo'ajjajaa huohui canaje jama ba'a:  
—E'e ecuea epeejji, jjeya miquea mimishi eyaya cuijeaje'yo.

<sup>21</sup> Majoya Paniseo cuana, Moisesija etehue'yo huohuijji cuana pea'ai jjashahuaba taiquia cua; Jesosa Eyacuiñajji Bacua pojjeama poso aca cua. Jama cua ba'a: —Jesosa quea tai cuani, de. Oya Eyacuiñajji jama cuani. Oe nei Eyacuiñajjiya mimishi cuijea caje'yo. Jesosaja ca ecuijea'yojjii pojjeama — poso aca cua.

<sup>22</sup> Jesosaja eba ojaya jjashahuabaquijji cuana. Jamajjeya huohui ca cua jama ba'a: —Miquianaya jjashahuaba taiquiani, de. <sup>23</sup> ¿Ache esohui camaja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohuacue, poqui'ajja socue!” <sup>24</sup> E'e de, eyaya huohuije jiquio dejja jeo'ajjajaa huasijke jama ba'a: “¡Nequisohuacue; miquea equipajaajji bebo majje poqui'yocue miquea equi yasijke!”

Pea cuana huasijke Jesosa jama cua ba'a: —¡Pea cuana shajja'ajjacue, ejjabahuejjaquijji! Eyaya ojjañaja Emeshi Mese nei cuani. Eyaya miquianajaya mimishi cuijea mee yaña ojjaña meshijo ba'eja —jamaya Jesosa cua.

<sup>25</sup> Majoya aje dejja ejjachichaqui nequijo jeo'ajjajaa nequisohua'ya cua, poqui'ya cua oja equi yasijke. Oya quea bihui cua Eyacuiñajji nijke, Jesosa nijke pea'ai. <sup>26</sup> Pea cuaa Eyacuiñajji bihuria ca cua jama ba'a: —E'e, eseyaya banaje jiquio dejja jeo'ajjajaa jjeya jeojeo'yoqui, mimishi cuijea ca'yonaje pea'ai, de.

Ojjaña cuana Jesosa nijke quea bihui nee nee cuanaje jeo'ajjajaa jjaajaqui mee ca'yajo.

*Jesosaa Nemi iyaa ca cua ojaya epeeiji epoiji  
(Mateo 9.9-13; Macoso 2.13-17)*

<sup>27</sup> Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjeshejji cuani eba'ejji sosejje. Oya equi sisi e'iyajo ani ejiojji cojja sahuajo. Oya siipojji, de, jamajjeya oya ojjañaja boti'ama. Jesosaa oya ba majje jama aca cua ba'a: —Nemi, jcue'ajja; ecuea epeeiji po'yocue!

<sup>28</sup> Jamajjeya Nemi nequisohua cua; ojaya aquiana jeajeanana majje poquia cua Jesosa nijje. <sup>29</sup> Quijje pishana Nemiya iyaa ca cua ojaya epeeiji cuana e'ijjia'ijjiajji Jesosa nijje. Iyaa ca cua ona sosejjeshejji cuana, pea dejja cuana pea'ai. <sup>30</sup> Paniseo dejja cuana Moisesija etehue'yo huohuijji cuana pea'aija boti'ama cua ona sosejjeshejji cuana. Jjashahuaba taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae dejja mimishi cuana nijje ijjia'ijjiani? Quea mimishi epoiji pojja'a.

<sup>31</sup> Jesosaja eba ojaya ejjashahuabaquijji. Jamajjeya huohui ca cua jama ba'a: —¿A'a miquianajaya shajja'ajja jjima jiquio esohui pojja'a? Jama ba'a: “Dejja quea aja eshicuijji bajji yasijje poqui sa po ajja. Emanojaa ca eshicuijji bajji yasijje poquianii”. Jamaya miquianaya joya mimishi'ama poso jjabaquiani. Jamajjeya miquianaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cani ecuea esohui. Jamajjeya eya ijjia'ijjiani mimishi cuana nijje. <sup>32</sup> Eya cue'yonaje dejja mimishi iyaaa. Dejja mimishi'ama cuani poso iyaa sa po ajja iña. Dejja

joya quea mimishi nee nee iyaaje mimishi pajea  
mee'yojji.

*Bobi ij{j}ia jjima yaj{j}ijo huohui'ajja canaje cuaa  
(Mateo 9.14-17; Macoso 2.18-22)*

<sup>33</sup> Paniseo cuaa Moisesija etehue'yo huohui-jji cuaa Jesosa huohui'ajja ca cua jama ba'a: — Esejaya etiiquiana jamaya huohui cani ba'a: “¡A'a ij{j}ia'ij{j}ajji jiquio pojajo! ¡A'a jjashahuabaquijji bobijo; jjashahuabaquicue Eyacuiñajjijo nei! ¡Mimicue onijje, quea yeno pocue!” jamaya esejaya etiiquiaa huohui cani. Huani shajja'ajjajji cuaa jamaya acani pea'ai. Jesosa, mi shajja'ajjajji cuana ca ca ij{j}ia'ij{j}iani tii. ¿Yajjajje shai? Quea mimishi cuani pojja'a.

<sup>34</sup> Jesosaa jama aca cua ba'a: —E shajja'ajjajji cuana enijje ij{j}ia'ij{j}iani. Ecuea eba nei nei Eyacuiñajjija esohui e'e jojo nei. Ma esohui huohuijjji cuanaja esohui ecuanajaya jjeyahua e'ajji pojjeama. Ejjhuanajjiji pojajo ojjaña quea bihui cuani, ij{j}ia'ij{j}iani, quea yeno pojjeama cuani. <sup>35</sup> O huanajji epo mano'yajo ojjaña quea yeno cuaje. Ma pojajo ij{j}ia'ij{j}ia sa po ajja cuaje. Jjashahuabaquije'yo emano'yojo. Eya jiquio ecua yahue mano'yani jayojja cuaje. Jjeya ecuanaya quea bihui cuani ij{j}ia'ij{j}iani. Eya quijje pishana manoje'yo. Majoya ecuea epeejjji cuana quea yeno cuaje; ma pojajoya bobo ij{j}ia jjima acaje —jamaya Jesosa cua.

<sup>36</sup> Majoya ohuaya ojaya esohui huohui ca cua ejjashahuabaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui chii jaca'yojji'yajo,

daqui eyacua ehuosho'yojji pojjeama. Daqui chii ejaca'yojji poqui ajja cuiñajji yasijje daqui chijji jjejojo.

<sup>37</sup> —Ecuea pea esohui jama cuani: Ijjiacajji jee eyacua monsa pojji acajji ena sese nequiajji. Ma ena seseya ejee eyacua shejjee mee cani. Majoya oe huana cani cuaa pea ena sese ejee chijjo cuiapojojea caje'yo shejjee majje. <sup>38</sup> Jamajjeya huana cani cuaa ena sese monsa eyacuajo cuiapojojea jjima yajji.

<sup>39</sup> —Jamaya ecue sohui eyacua cuani. ¡Miquianaya ecuea epeejji nei po sa cuanijo shajja'ajjacue ojjaña ecue sohui! Beca cuana shajja'ajja sa po ajja ecue sohui eyacuajojo. Jjashahuaba taiquiani, de. Etiquianaja esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

## 6

*Jesosa shajja'ajjajji cuaa anoso sejja ca cua ejomishocajji pojjajo*

(Mateo 12.1-8; Macoso 2.23-28)

<sup>1</sup> Oe ejomishocajji pojjajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjiajji quea shoeya jjejojo. <sup>2</sup> Majoya Paniseo cuaa Jesosa o shajja'ajjajji cuana ba ca cua. Jesosa nijje mimijajinaje jama ba'a: —¿Yajjajo acuaeya epojja ejomishocajjijo anoso sejja mee yaña so'o? Moisesija etehue'yo jamaya cuani ba'a: “¡A'a chacojji ejomishocajji pojjajo!”

<sup>3</sup> Jesosaa jama aca cua ba'a: —Miya quea sohui tai cuanaje; Eyacuiñajjija esohui nei pojjeama aña miquianaaya. Miquianaya jjashahuaba taiquiani, de. ¿A'a miquea ba jjima pojja'a ma etiiquiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajjija epeeiji nei. Oe pojjajo oya oja epeeiji cuana nijje poquije, <sup>4</sup> dobiquinana cua Eyacuiñajjija equi yasijje bobo sa'ajja quea shoe neejojo. Ma equijo ani pahui ijzia ca'yonaje; quia ca'yonaje ojaya epeeiji cuana huasijje pe'a'i. Eyacuiñajjija etehue'yo jama cuani ba'a: “Jiquio pahui Eyacuiñaggi nijje mimianija e'ijjajjime”. Jamatii Dabi ca mimishi'ama cuanaje. Oya poquianinaje Eyacuiñajjijo chacochaco neineiya. Jamaya aca cua Dabiya. <sup>5</sup> Ecuana Dabi jayojja cuani. Eya Eyacuiñajjijo chacochaco neineiani. Jamajjeya ecuaaya jiquio anoso ai sejjaña ejomishocajji pojjajo —Jesosa cua.

*Oe dejja meshahuama'yo epo Jesosaa jjameshahuanequi mee ca'ya cua*

*(Mateo 12.9-14; Macoso 3.1-6)*

<sup>6</sup> Pea ejomishocajji pojjajo Jesosa poquia cua Jodioja equi ejjachichaquijji yasijje esohui huohuiya. Oe dejja meshahuama'yo epo ania cua jomajo. <sup>7</sup> Paniseo dejja cuana, Moisesija etehue'yo huohuijji cuana jjashahuaba taiquia cua Jesosajo jama ba'a: —Jesosa shajjama' jayojja ecuanaja esohuijo cuani. Ohuaya chaco caje ejomishicajji pojjajo pojja'a; jjameshahuanequi mee caje'yo dejja meshahuama'yo epo. Jesosa jamaya shajjama' cuajo ecuaaya oya iñaje'yo edojoji ejeadobiajeajji.

<sup>8</sup> Jesosaja onajaya ejjashahuaba taiquijji eba cua. Jamajjeya ohuaya ma dejja meshahuama'yo epo ani huohui ca cua jama ba'a: —Meshahuama'yo epo, ¡nequisohuacue ojjañaja ebajji! —Jesosaa aca cua.

Jamajjeya oya nequisohua cua. <sup>9</sup> Jesosaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epojji ejomishocajji pojjajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yoji mi chi.

<sup>10</sup> Jamajjeya ohuaya pea cuana huasijje ba maje ma dejja huohui ca cua jama ba'a: —¡Eme jeapisa'ajja'yosocue!

Majoya eme jeapisa ca'ya cua. <sup>11</sup> Beca cuana quea quene nee nee cua. Jama mimimimia cua ba'a: —Jesosa shajjama' nei nei cuani ecue esohuijo. Ohuaya jjameshahuanequi mee ca'yonaje ejomishocajji pojjajo. ¿Yajja acuae seja Jesosa aje jjeyahua nei e'iñajji? —jamaya cua Jodio dejja cuana Jesosa iñajji nisho.

*Jesosaa chicha ca cua o shajja'ajjajji cuana 12  
huisome*

(Mateo 10.1-4; Macoso 3.13-19)

<sup>12</sup> Oe pojjajo Jesosa poquia cua eyiyo quibo huasijje mimiya Eyacuiñajji nijje. Ojjaña mecajje mimia cua onijje. <sup>13</sup> Eshequi jaasohuanijo, jjachichaquia cua o shajja'ajjajji cuana nijje.

<sup>14</sup> Oya cuana yohua bajjani cua ba'a: Simohui, quijje Jesosaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a:

Jacobo, Huani, Penipe, Manotonome, <sup>15</sup> Mateo, Tomasi, Apeoja bacua bajjani Satiaco; Simoni, ojaya meshi quea boti nee nee cua, <sup>16</sup> Jacoboja bacua Jode bajjani. Pea dejja yohua bajjani cua ba'a: Jodasa Isicanio, oya Jesosaja epeeiji nisho cua. Mahuiso o shajja'ajjajji cuana e'e jojo nei cua.

*Jesosaa quea dejja huiso huasijke Eyacuiñajjija  
esohui huohui ca cua  
(Mateo 4.23-25)*

<sup>17</sup> Majoya Jesosa o shajja'ajjajji cuana nijje eyiyojo ani jaaoque o'oya cua. Jaaoque majje nequi'ya cua meshi bame bamejo esohui huohuiya. Quea huiso Jesosaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosanenajo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesosa shajja'ajjaa. <sup>18</sup> Ojjañaa shajja'ajja'yo sa aca cua, jjajaqu'iyo sa cua pea'ai. Pea cuanajo nequi eshahua cuayaqui mee ca'ya cua Jesosaa. <sup>19</sup> Ojjañaa Jesosa napa sa aca cua pea jjajaqu'i mee'yojjijojo. Jesosaa emeya napa cajje jjajaqu'i ca'yonaje cuana.

*Jesosaja esohuiya dejja cuana quea bihui po mee  
caje beca cuana ca quea yeno po mee caje  
(Mateo 5.1-12)*

<sup>20</sup> Majoya Jesosaa ba majje o shajja'ajjajji cuana huohui ca cua jama ba'a: –Beca cuana jjashahuabaquiani jama ba'a: “E'e de, eya quea mimishi nee. Eyacuiñajjiya ecuea mimishi cacuijea ca'yahua”. Jamaya jjashahuabaquianijo

Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua!

<sup>21</sup> —Ojaya epeejji cuana Eyacuiñajjiya esohui jayojja jama a sa neinei cuanijo Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeejji cuanaja mimishijo pa neineianijo Eyacuiñajjiya quea bihui nee po mee caje'yo mimishi cuijea ca'yajje.

<sup>22</sup> —E'e, ¡miquianaya ecuea epeejji cuana, quea bihui nee nee pocue! Dejja cuana miquiana nijje mimijajije, miquianaya dejja cuaa cuia caje pea'ai, siajje minijje cuaje pea'ai. Jamatii, miquianaya ecuea epeejji cuanijo, dejja cuaa mimishi po mee'yo sa acani. Eyacuiñajjiya ca ca miquianaya quea bihui nee po mee caje'yo.

<sup>23</sup> Jamajjeya ijjeyahua nei quea bihui nee nee pocue! Eyacuiñajjiya miquianaya eyajo quia caje'yo miquianajaya aquiana quea bame nee nee, quea huiso nee nee. E'e, Eyacuiñajjiya esohui huohuijji yahuajo nei nei ba'ya cua jamaya aca cua mimishi cuaa; napa ca cua pea'ai. Jamajjeya ¡ona jayojja jama pocue, quea bei!

<sup>24</sup> —Joyaya nequiana oe quea aquiana huiso jjejojo, Eyacuiñajjiyo jjashahuabaqui jjima. ¡Bacue! ¡Jjeya miquianaya quea bihui nee nee jjabaquicue! Majoya aje mi oe quijke quea yeno nee nee cuaje'yo cuaqui yasijje poqui majje mano'yo majje.

<sup>25</sup> —E'e de, ¡joyaya nequiana oe bobijo jjashahuabaquiani jjejojo Eyacuiñajjiyo jjashahuabaqui ajja bacue! ¡Jjeya miquianaya quea jejje jjejojo quea bei jjabaquicue! Majoya

aje mi oe quijje quea shoe nee nee, quea yeno nee nee cuaje'yo. Bobima' nei cuaje cuaqui yasijje poqui'yo majje.

—¡Joyaya mi oe quea bihui jjejojo soa ani jjabaquicue! Eyacuiñajji jo jjashahuabaqui ajja, quijje pa neineije'yo; quea yeno nee nee cuaje'yo cuaqui yasijje poqui'yo majje.

<sup>26</sup> —¡A'a oe esohui huohuijji nisho pojji, dejja quea bihui epo meejjii nisho pojji! Ma ecua esohui huohuijji nisho etiiquiaa quea bihui po mee ca cua jama. Jama po majjeya aje mi oe quijje cuaqui yasijje poqui'yo majje quea yeno nee nee cuaje'yo.

*Quea boti nee a'yocue dejja cuana minijke quea quene cuani*

(Mateo 5.38-48; 7.12)

<sup>27</sup> Jesosaa jama aca cua ba'a: — ¡Jjashajja'ajjaquicue oe! ¡A'a oe ona boti'ama pojji! <sup>28</sup> ¡Quea boti a'yocue dejja minijke quea quene cuani! ¡Joya miquiana nijje mimijajianijo mimicue Eyacuiñajji nijje ojo! <sup>29</sup> ¡Onaa shemo cuia cajje shemo mijipeajje cuia mee o'oyacue! ¡Onaa miquianajaya daqui jjequisejjajea cajo dojo mee'yocue miquianajaya pea daqui pea'ai! <sup>30</sup> Onaa: “¡Aquiana che mo quiacue!” acajje, ¡quiacueya oe! Onaa miquianajaya aquiana sii cajo ja'a huohui'ajja'yojjii! <sup>31</sup> Miquianaya mimiani pea cuana nijje jama ba'a: “¡Enijke quea bame nee po tiitii'yocue!” ¡Jamajjeya miquianaya pea cuana nijje quea bame nee po tiitii'yocue!

<sup>32</sup> —Joya miquiana quea jea ajji cuani miquiaaya quea jea nee aña pea'ai; miquiana nijje quea

quene cuani ca ca miquianajaya boti'ama. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡Ojjaña quea jea nee nee acue! <sup>33</sup> Miquianaaya miquianajaya epeejji quea bame aña, pea cuana caya ca oe boti'ama aña. Dejja mimishi cuaa aje oe jamaya acani pea'ai, de. ¡A'a dejja mimishi jayojja pojji; ojjaña quea bame acue! <sup>34</sup> Miquianaaya joya jjaquiaqui'yojji yasijje quiaña. Joya jjaquiaqui'yo aija huasijje quia jjima aña. Dejja mimishi cuana aje oe jamaya cuani pea'ai. ¡A'a dejja mimishi jayojja pojji! ¡A'a quea dejja tai pojji! ¡A'a quea nishehui pojji! <sup>35</sup> ¡Miquianaaya miquianajaya epeejji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miquianajaya aquiana dojo sa cuanijo oe pojji cahuime dojo meecue! ¡Miquianaya a'a jjashahuabaquijji miquianajaya aquianajo, miquianajaya bejjojo! ¡Eyacuiñajjiyo oe jjashahuabaquicue! Majoya miquianaya ojaya epeejji nei cuaje'yo. Eyacuiñajjiya ojjaña cuanaya quea jea nee nee acani. Ojjaña dejja cuana, ojaya epeejji cuana, ojaya epeejji pojjeama cuanaya quea jea nee acani, de. ¡Jamaya oe pocue! <sup>36</sup> E'e de, esejaya Chii eyajo quea bame nee ani, ojjaña cuana Eyacuiñajjiya quea jea nee nee acani. ¡Eyacuiñajji jayojjaya jama po tiitiicue!

*¡A'a pea cuana niñebajji!*  
*(Mateo 7.1-5)*

<sup>37</sup> Jesosaa jama aca cua ba'a: —¡A'a pea niñebajji! Jamaya Eyacuiñajjiya boti'ama. Miquianaya pea cuana niñebajji cuanijo, Eyacuiñajjiya miquianaya

tecuea caje'yo pea'ai. Miquianaya pea nijje jjabeiqui'yajo Eyacuiñajjiya miquianajaya mimishi cuijea caje'yo. <sup>38</sup> Miquianaaya pea cuana huasijje quea huiso nee quiajо, jamaya quea huiso nee nee miquianaya Eyacuiñajjiya oya huisoajjaya quia caje'yo pea'ai. Quea huiso nee nee cuaje, de. Oe pojji quiajо ca ca miquianaya Eyacuiñajjiya oya huisoajjaya quia caje'yo —jamaya Jesosa cua.

<sup>39</sup> Jesosaa pea esohui ejjashahuabaqui meejji jama aca cua ba'a: —E'e de, ¿a'a acuae oe cojjamaa pea cojjama' me pejjejea majje dojo caje so'o? Cho, eme pejjejeajji pojjeama, o pea'ai oquejeaquije mei jjani yasijje, de. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii. ¡A'a cojjama' jayojja pojji! <sup>40</sup> Oe esohui huohuijji quea ja'a nee nee cuani. Ohua esohui huohui coo canijo, o shajja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya ¡ecuea esohui shajja'ajja neineicue quea ja'a epojji! Jamajjeya miquianaaya quea ja'a nee huohuije pea cuana huasijje.

<sup>41</sup> —Jamajjeya ijashahuaba bamebamequicue; a'a pea niñebajji! Jamatii miquianajaya epeeiji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahua'yocue! <sup>42</sup> Oya jayojja yani miquea epeeiji ecojjajo shabo mimishi jayojja. Jamajjeya miya jjashahuabaquiani miquea epeeiji ecojjajo nequi shabojo cuaya mee'yo sa ña jama ba'a: "Epeeiji, shabo biso neiya mi cojja

dobi canaje. Ache ba'ajja; cahuijjia'ajja'yosahua". ¿A'a acuae jja oe miya jjabaquiani acui cojjajji so'o? ¡Ebionei miquea cojjajo nequi acui huijjia'yo socue! ¡Majoya miquea epeejjija shabo huijjia'yocue! —jamaya Jesosa cua.

*¡Acui quea bame nee jayojja jama pocue!*  
*(Mateo 7.17-20; 12.34-35)*

<sup>43</sup> Jesosaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. <sup>44</sup> Oe acui ejjajja nei cuani, pea jjajjame pojjeama cuani. <sup>45</sup> ¡Miquianaya oe jjashahuabaquicue, acui quea bame nee jayojja jama pocue! ¡Quea bame nee jjashahuabaquicue Eyacuiñajjijo! Majoya miquianaya quea bame ba'eje'yo. ¡A'a jjashahuaba taiquijji oe acui quea tai jayojja! Miquianaya jjashahuaba taiquiajo miquianajaya esohui quea tai cuaje'yo ma acuijjajja quea tai jayojjaya. ¡Jamatii jjashahuabaquicue Eyacuiñajjijo, ojaya esohuijo! ¡Quea bame ba'e tiitiicue pea dejja cuana nijje! —jamaya Jesosa cua.

*Oe dejja jjashajja'ajja neinei quia cua pea jjashajja'ajjaqui ajja cua*  
*(Mateo 7.24-27)*

<sup>46</sup> Jesosaa pea esohui huohui ca cua jama ba'a: —Miquianaaya eya huohui nishoaña jama ba'a: "Emeshi Mese, eya shajja'ajja sa cuani miquea esohui". Cho, ecuea esohuijo jjashajja'ajjaqui sa po ajja miquianaya —Jesosa cua—. <sup>47</sup> Eyaya miquianaya huohuije beca dejjajo jama ba'a: Oe dejja equi iya bamebame canaje jayojja jama

miquianaya jjashajja'ajja neineiquiani ecue esohuijo. Dejja equi iya canaje quea bame nee nee.

<sup>48</sup> Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cuei jjayehuequi'yajo jaabichaqui'yo jjima equi cuanaje. Quea ca'a iyame jojoya mi jaabichaqui'yonaje —Jesosa cua—. Jamaya ecuea esohui shajja'ajja majje miquianaya quea ca'a cuaje ma equi jayojjaya.

<sup>49</sup> —Beca cuana jjashajja'ajjaqui ajja ecuea esohuijo jiquio ecua oe dejja iya tai canaje ojaya equi. Cuei sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cuei jjayehuequi'yajo ojaya equi jaabichaqui'yonaje; ca'a'ama equi cuanaje, de. Jamaya miquianaya ca'a'ama cuaje, ecuea esohuijo jjashajja'ajjaqui ajjajo —jamaya Jesosa cua.

## 7

*Jesosaa jjaajaqui mee ca ya'cua esohuinano  
meseja echacojjí*

(Mateo 8.5-13)

<sup>1</sup> Jesosa dejja cuana nijje mimijeyo majje poquia cua Capenaoma cuiñajji yasijje. Oe Shomano esohuinano mese jomajo ba'ya cua. <sup>2</sup> Ojo chacochacoani emanojaa cua. Beshahua nei poquijeyoa cua, de. Ma ojo chacochacoani quea bame chacochaco ania cua. Jamajjeya esohuinano meseya huaquia mee'yo sa aca cua. <sup>3</sup> Ohuaya shajja'ajja ca cua Jesosa yani, Jesosaa pea cuana jjaajaqui

mee ca'yani. Jamajjeya esohuinano mese jama jjashahuabaquime cua ba'a: —¿A'a Jesosaa ejo chacochacoani jjaajaqui mee caje'yo? Caba'ajja.

Jamajjeya ohuaya huoojea ca cua Jodio etii cuana Jesosa huohui'ajja. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! “¡Jjaajaqui meehua'yocue ejo chacochacoani!” acue —jamaya cua esohuinano mese.

<sup>4</sup> Majoya aje Jodio etii cuana poquia cua Jesosa huohui'ajja. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecuana mi que huoojea canaje, jojo chacochacoani jjaajaqui meequei'yocue pa! Esohuinano meseya aje oe quea bame nee nee nequi. <sup>5</sup> Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejachichaquijji ecuanaja meshijo, de —jamaya cua Jodio etii cuana.

<sup>6</sup> Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijke. Equi chipi nei cuajo esohuinano meseya huoojea ca cua ojaya epeejji cuana Jesosa huohuiya. Jama aca cua ba'a: —Jesosa, ja'a miya cuejji! Miquea esohui quea poja nee nee. Jamajjeya ¡ejo chacochacoani miya miquea esohuijo jjaajaqui mee'yocue! Eya esohuinano mese, jamajjeya miya pojja'a dobiqui sa po ajja ecuea equi yasijke. Eya jjashahuabaquiani miya pojja'a enijje mimi sa po ajja. <sup>7</sup> Jamajjeya eyaya ecuea epeejji huoojeanaje minijje mimiya. Jomajo mimicue miquea esohui nei jama ba'a: “¡Ojo chacochacoani jjaajaqui'yocue!” Majoya jiquiojo ejo cha-

cochacoani jjaajaquije'yo. <sup>8</sup> Jamaya ecuea emeshi meseya huohui cajje eya poquije'yo. Ecuea so-huinano cuana eya huoojeajje poquije. Pea so-huinano eyaya iyaajje cueje. Ecuea echacojji eyaya chaco meeajje chaco caje, de. Jamaya miya huohuiajje ecuea echacojji jjaajaquije'yo — jamaya esohuinano mese huoojeameya aca cua Jesosa que.

Jamajjeya ma ohua huoojea ca cua poquia cua, huohui cañaquia cua Jesosa esohuinano meseja esohuijo.

<sup>9</sup> Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijje nequi, jama ba'a: —De, ma esohuinano meseja eba eyaya jiquiojo tii ojo cha-cochacoani jjaajaqui meeje'yo ecuea esohuijo tiyya. Jodio dejja cuana jjashahuabaqui neinei jjima oya jayojja. Oya ca ca oe jjapee neineiquinaje Eyacuiñaji nijje —jamaya Jesosa cua.

<sup>10</sup> Majoya esohuinano meseja epeeiji cuana poquia cua oja equi yasijke. Majoya aje dobiqui majje ejjaajaqui'yo ani ba cañaqui'ya cua, Jesosaja esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

*Jesosaa shequi mee ca'ya cua e'ahuemano'yoja ebacua ejja emano'yojaa*

<sup>11</sup> Quijje pishana Jesosa poquia cua Naini yasijke. O shajja'ajjajji cuana, pea cuana pea'ai poquia cua onijje. Quea huiso poquia cua, de. <sup>12</sup> Jesosaa Naini yasijke poquijeya ba ca cua pea dejja cuaa ebacua ejja emano'yo dojo caje ohuajeaa. Enaese pa neinei poquia cua. Oya quea yeno nee nee

cua oe nei nei oja bacuajojo, e'ahuemano'yo jje-jojoya. Quea dejja huiso nee onijje cueya cua ebacua ohuajea sahuua. <sup>13</sup> E'ahuemano'yohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua ejja. <sup>14</sup> Majoya aje Jesosa poquia cua ebacua ejja emano'yojaa huasijke. Majoya aje ma dejja cuana nequiñaquia cua Jesosa cueje ba majje. Jesosaa emano dojorji napa ca cua. Majoya Jesosaa emano'yojaa jama mimiame aca cua ba'a: —Esho'i, ¡shequi'yocue jjeyahua nei!

<sup>15</sup> Majoya aje ma emano'yojaa anisohua'ya cua. Mimi'ya cua, de. Jesosaa oya jama huohuime aca cua ba'a: —¡Poqui'yocue mique nae nijje!

<sup>16</sup> Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajjiya oya shequi mee ca'yonaje, de. Ohuaya Jesosa huoojea canaje ecuana huasijke. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuana ba'e meesahuaa —jamaya ojjaña cuana cua.

<sup>17</sup> Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuaa cua.

*Huaniya o shajja'ajjajji cuana Jesosa que huoo-jea ca cua*

(Mateo 11.2-19)

<sup>18</sup> Huani Eyacuiñajjiya esohui huohuijijojo ejeanobiajaa cua. Jamatii Huani ejeanobiajaa

o shajja'ajjajji cuaa Jesosaja esohui huohuiqui ca cua Huani que. <sup>19</sup> Huaniya ma esohui shajja'ajja majje beca o shajja'ajjajji cuana huoojea ca cua Jesosa huohui'ajja. Jama huohuime aca cua ba'a: —Huohui'ajjacue Jesosa jama ba'a: “Jesosa, Eyacuiñajjiya ojjaña jaahuanajji huoojea caje'yo ecuana huasijke. ¿A'a miya ma ecuana jaahuanajji cuaniya? E'e pojja'a, pea pojja'a ecuaaya ishoa'ajjaje” jamaya acue —Huaniya aca cua.

<sup>20-21</sup> Jamajjeya Huani shajja'ajjajji cuana poquia cua Jesosa huohui'ajja. Jesosa ba cañaquia cua emanojaa cuana jjaajaqui mee'yo cuequi. Es-hahua cuana cuaya meequi'yo cuequi. Cojjama' cuana jjacojjaja'aqui mee'yo cuequi. Majoya oya cuaa huohui'ajja ca cua Huanija esohuijo.

<sup>22</sup> Jesosaa jama saja'a ca cua ba'a: —E'e, ¡Huani oe huohuiquicue joya miquiaaya shajja'ajjanaje, joya miquiaaya banaje pea'ai! E'e, cojjama' cuana jjacojjaja'aqui mee'yonaje; jio'ajja cuana jeo mee'yonaje; dejja batata epo'yo cuana jja-jaequi mee'yonaje; shajjaqueba jjashajjaja'aqui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijke Eyacuiñajjiya epeeiji epo'yojji. <sup>23</sup> Jamajjeya ¡huohuiquicue Huani que! Jama huohuiquime acue ba'a: ijapee tiitiiquicue Eyacuiñajji nijje, enijke pea'ai; quea ja'a nee ba'ecue! Jama miya ajje queabihui po tiitiije'yo —jamaya Jesosa cua.

<sup>24</sup> Majoya aje Huani shajja'ajjajji cuana poqui o'oyanaje Huani que. Majoya o poqui'yajo, Jesosa pea cuana nijje Huanijo mimia cua:

—E'e de, yahuajo Huani quimajo aninaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. <sup>25</sup> Miquianaaya ¿ae banaje Huani que poqui majje? ¿A'a dejja daqui quea nahue nee ehuosho ba'e banaje? Chojja, dejja daqui quea nahue nee huosho cani equi quea quemodo ba'eya. <sup>26</sup> ¿Achajja acuae Huani ba'enaje? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija pea esohui huohuijjiya quea ja'a pishana huohui ca cua. Huaniya ca ca quea ja'a nee nee huohui canaje. <sup>27</sup> Yahuajo nei Eyacuiñajjija esohui etehue'yo Huanijo jama cua ba'a:

“Jiquio dejja ecuea esohui huohuijji nei cuani. Jamaya eya sa cuani. Eyaya oya huoojeaje ebionei mi hui dojodzi. Ohuaya dejja cuana huasijje huohui caje miquea ecuejjijo”.

Jamaya yahuajo nei nei Eyacuiñajjija ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. <sup>28</sup> Ecuea pea ehuohui a'a pajea'yojji jama ba'a: Huani ma ona besameejji cua oe dejjaya quea bame nee nee pea cuana jayojja jama pojjeama. Jamatii quijje eya Emeshi Mese nei cuaje, ojjaña ecuea epjeejji Huani jayojja jama cuaje'yo quea bame nee nee —jamaya Jesosa cua.

<sup>29</sup> Ojjaña dejja Huanija besamee Jesosaja esohui shajja'ajja majje quea bihui nee nee cua Eyacuiñajji nijje. Ojjaña dejja quea mimishi nee

nee cuani cuaaya Eyacuiñajjija esohui shajja'ajja majje mimishi pajea ca'ya cua. Jamajjeya oya cuana Huanija ebesomee cua. <sup>30</sup> Paniseo dejja cuaa Moisesija etehue'yo huohuijji cuaa pea'ai ca ca Huanija esohui shajja'ajja jjima aca cua. Eyacuiñajjijo quea bihui pojjeama cua, Eyacuiñajjija epjeejji nei po sa po ajja jjejojo. Jamajjeya Huani que enajje pohua poqui jjima cua, mimishi pajea'yo sa po ajja jjejojo.

<sup>31</sup> Majoya aje Jesosa jama cua ba'a: —Dejja cuana mimishi pajea'yo sa po ajja ¿a'ya jayojja cuani? <sup>32</sup> Joya ecua esho'iquiana quebanei jayojja jama cuani. Esho'i cuana quebanei po majje joya pea que taaani jama cuaje pea nijje jjapeequi sa po ajja jjejojo. Jama jjamimihue'equime cuani ba'a: “Eyaya dehue miaña mi quea bihui epoji nisho. Jamatii miya quea bihui po sa po ajja. Majoya eya pa nishoani, emano'yojo pa ani jayojjaya mi quea bihui epoji nisho. Jamatii miya pa nisho ajja. Jamajjeya ecuea ba jjima eyaya miya achajja quea bihui po meeme aje. Miya niñepoqui jayojja cuani, jamajjeya quebanei po ajja” jamaya esho'iquiana quebanei cuani —Jesosa cua—. E'e de, jamaya dejja mimishi cuana jjeya cuani ma esho'iquiana jayojjaya. <sup>33</sup> Yahuajo pishana Huani cue'yonaje. Eyacuiñajji nijje mimi tiitiianijo bobi ijija ajja cuanaje. Acuijjajja na sese ishi jjima aca cua. Ojjaña cuaa ca ca huohui canaje Huanijo jama ba'a: “Huani ca jja ca niñepoqui nei”. <sup>34</sup> Eya ca jja ca ijija'ijjiani dejja mimishi cuana nijje. Oya cuana nijje mimimimiani. Jamatii beca cuana ejo siajje cuani jama ba'a: “¡Bacue jiquio dejja Jesosa! Dejja mimishi cuana nijje jjapeequiani;

bejjo chichajji cuana nijje pea'ai jjapeequiani, de". Jamajjeya beca cuana ca ca jjapeequi sa po ajja enijke, Huani nijje pea'ai. Ecuea ba jjima achajja oya cuana eyaya quea bihui po meeme aje. Oya cuana esho'iquiana quebanei po ani jayojja cuani, de. Niñepoqui jayojja cuani. Oya cuana mimijajiani Huani nijje, enijke pea'ai. <sup>35</sup> Eyacuiñajjija esohui e'e jojo nei. Jamaya ojjaña cuana oja esohuijo jjashajja'ajjaqui majje quea ja'a po mee caje —jamaya Jesosa cua.

*Oe Paniseo dejaja equi yasijke Jesosa anicuua poquia cua*

<sup>36</sup> Oe Paniseo dejja yohua bajjani cua ba'a: Simoni. Ohuaya Jesosa e'ijjia'ijjiajjii iyaa ca cua. Jamajjeya oja equi yasijke poquia cua ijjia'ijjiaa.

<sup>37</sup> Jesosa ijjal'ijjia anijo oe epona dobiquia cua equi yasijkeyaa Jesosa baa. Ma epona quea mimishi ba'ya cua. Tahuoojo shiyeshiye ye ca cua, Jesosa ba majje. <sup>38</sup> Ojaya mimishijo quea yeno nee nee cua. Pa neinei ania cua. Ecojja naa shacula ca aña cua Jesosaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesosaja ejiojji tojjo majje shiyeshiyehaa jiojji sha ca cua.

<sup>39</sup> Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjija esohui huohuijji nei pojjeama pojja'a. Jamajjeya jiquio epona quea mimishi nee nee ohuaya mi huoojea cani. Eyacuiñajjija esohui huohuijji nei nijje mimishi cuana jjanequichipi qui ajja —jamaya e'acaje'yo poso Simoniya aca cua.

<sup>40</sup> Jesosaja eba Simonija ejjashahuaba taiquijji. Majoya jama huohuime Jesosaa aca cua ba'a: — Simoni, ecuea esohui mi que ehuohuuijji yani.  
—¡Ocue mo huohui'ajja socue! —Simoni cua.

<sup>41</sup> Jamajjeya Jesosaa jama huohuime aca cua ba'a: —Oe dejja quea bejjo huiso nee ba'enaje. Majoya aje becamejjiji pea'ai dejja poquinaje o que bejjo sosema' jjesheya, quijje esosequia'yojji nisho. Oe dejja iye huiso jjeshe canaje 500. Pea dejja ca jjeshe canaje ba'a oe pojji nei 50.

<sup>42</sup> Ma dejja cuanaja oya sosequia'yo jjima tii cuanaje. Jamajjeya ma dejja quea bejjo huiso jjapeequi sa cuanaje bejjo jjeshejji cuanaje cuana nijje. Jamajjeya ejjeshejji epo cuanaja ebajjani cuijea ca'yonaje jamatii bejjo sosequia'yo jjimajo tiiya. Majoya oya cuana quea bihui po'yonaje bajjani cuijea ca'yajje. E'e, ¿ache dejja quea bihui nee nee cuanaje oja bejjo sosema'yo tiijojo? Ma dejja quea huiso, 500 sosequia jjima pojja'a. Pea dejja iye huiso, 50 sosequia jjima pojja'a —jamaya huohuui'ajja ca cua Jesosaa.

<sup>43</sup> Simoni jama cua ba'a: —Ma dejja quea huiso bejjo quia canaje, 500.

Jesosaa jama aca cua ba'a: —E'e de, e'e jojo nei.

<sup>44</sup> Jamaya jiquio epona eya mimishi cuijea'yajje quea bihui nee cuani. Eya dobiquinaje miquea equi yasijje. Miya ca mi ca oe ecuea epeeiji pojjeama cuanaje, Simoni. Jamatii beca cuana cueanijo equi meseya ojaya epeeiji cuana jiojji topo cani. Jamaya miquea ajjima. Ma eponaa ca ca ecuea ejiojji topo canaje oja ecojja naa. Oja sao ao'aohua cui ca'yonaje. <sup>45</sup> E'e, miyaya ecuea epeeiji pojjeama jjejojo mi shemo tojjonaje. Jiquio

eponaa ca mo ca ejiojji tojjo tiitii canaje ojaya quea  
jea nee neejojo. <sup>46</sup> Miyaya eya sha jjima anaje  
shiyeshiyejo ejjapeequijji. Jiquio eponaa ca ca  
ecue ejiojji sha canaje shiyeshiyeya ecuea epeejji  
nei sa cuaniya jjejojo. <sup>47</sup> E'e, jamajjeya eyaya  
miya huohuiaña jama ba'a: Ma epona jjapeequi sa  
cuanafe Eyacuiñajji nijje. Jamajjeya aje oe ohuaya  
ecuea ejiojji topo canaje, quea shiye po mee canaje  
pea'ai. Ma epona quea mimishi nee nee cuanafe.  
Jamajjeya eyaya, Eyacuiñajjiya pea'ai oya mimishi  
cuijea'yonaje quea jea nee neejojo —jamaya Jeso  
sosa cua.

<sup>48</sup> Majoya Jesosaa epona jama huohuime aca  
cua ba'a: —Miquea mimishi cuana eyaya cui  
jea'yonaje jjeya nei.

<sup>49</sup> Pea dejja cuaa equijo ijija'ijija aniya Jesosajo  
jama huohuime aca cua ba'a: De, ¿a'ya acuae jja  
che mimishi cuijea'yojji pome so'o?

<sup>50</sup> Jesosaja eba cuanafe ma dejja cuana mimi  
ca'ani. Jamajjeya ohuaya epona huohui ca cua  
jama ba'a: —¡Miquea mimishi cuijea'yonaje, ja  
majjeya quea bame ba'e'yocue mimishi'ama! —  
jamaya Jesosa cua.

## 8

### *Epona cuaa Jesosa yohua sahua ca cua*

<sup>1</sup> Majoya aje Jesosa pea cuiñajji yasijke poquia  
cua Eyacuiñajjiya esohui huohuiya. O shajja'ajjajji  
nei cuana, 12 poquia cua onijje. <sup>2-3</sup> Quea huiso  
epona cuana poquia cua Jesosa nijje, ma ohuaya  
yahuajo jjaajaqui mee ca'yonaje, edosiquiana  
cuaya meequei ca'yonaje pea'ai. Oe epona Sosana  
bajjani; pea epona Mania Madanena bajjani cua.

Maniaja 7 edosiquiana cuana Jesosaa cuaya mee-qui ca'ya cua. Pea epona Huana bajjani cua. Oya Cosaja ehuanase cua. Cosa emeshi meseja, Enode Antipaja echacojji cuana jaahuanajji cua. Quea huiso epona cuaa bobi jjeshe ca cua oja beijojo Jesosa bobiajji, o shajja'ajjajji cuani cuana bobiajji pea'ai.

*Eso'jeaajajji  
(Mateo 13.1-23; Macoso 4.1-20)*

<sup>4</sup> Quea dejja huiso nee nee poquia cua Jesosa shajja'ajjaa. Jjachichaquia cua Jesosa pejjejo. Jesosaa huohui ca cua jiquio esohui. Jama huohuime aca cua ba'a: <sup>5</sup>—Oe dejja poquinaje que yasijje eso'jeaajaa. Oe pojji eso'jeaaja canaje ejiojji yasijje. Cuichoiji cuaa ma eso'ijjia ca'yonaje. <sup>6</sup> Pea eso'jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. <sup>7</sup> Pea eso'jeaaja cajje oquequinaje acuishaa yiye yasijje. Majoya aje jeaaja cajje pohua'yonaje. Majoya aje pohua'yo majje acuishaa mano mee ca'yonaje. <sup>8</sup> Pea eso'ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama'jayojja pojji! —jamaya Jesosa cua.

<sup>9</sup> Quijje o shajja'ajjajji cuana poquia cua Jesosa huohua'ajjaa. Jama huohua'ajjame aca cua ba'a: —¿Yajjajje ma esohui quea quehua cuanaje ecuanaja? —jamaya cua.

<sup>10</sup> Jesosaa jama huohuime aca cua ba'a: —Miquianaya Eyacuiñajjiya ba meesahua caje ojaya

esohui eyacua. Beca cuana shajjama' cuani ca ca ohuaya eba meesahuajji pojjeama. Esohui eba meesahuajjijo huohuiaña beca cuana shajjama' cuanijojo. <sup>11</sup> Jamajjeya eyaya miquianaya huohuije quea ja'a epojji. Ma eso' Eyacuiñajjija esohui jama cuani; meshi dejja jayojja cuani. <sup>12</sup> Meshi ejiojji quea ca'a huasijje eso' oquequinaje, dejja shajjama' Eyacuiñajjija esohui shajja'ajja sa po ajja jayojja. Eyacuiñajjija esohui jjaja'aqui ajja quea sapa ca'a jjejojo. Cuichojiya eso' ijija cani jayojja jama Edosiquiana etiiya Eyacuiñajjija esohui pajea mee ca'yani, jjaja'aqui mee jjima acani. Jamajjeya ohuaya dejja jjapeequi mee jjima acani Eyacuiñajji nijje. <sup>13</sup> Meshi mei biajje anijo eso' pohua'ajja'yani jama jayojjaya dejja cuaa Eyacuiñajjija esohui shajja'ajja cani. Ebioneiya aje ca Eyacuiñajji nijje jjapee nishoquianiya. Majoya aje pea cuana onijje mimijajiajo Eyacuiñajjija esohui pajea ca'yani. Jjapeequi pajea'yani Eyacuiñajji nijje. <sup>14</sup> Pea dejja meshi acuishaa yiyejji jayojja jama. Eyacuiñajjija esohui shajja'ajja cani. Ebioneiya aje ca oe shajja'ajja caniya Eyacuiñajji nijje jjapee nishoquiani. Majoya aje jjashahuabaqui'yani pea aquianajo quea mimishi epo'yojji. Jama jjashahuabaqui'yomeya cuani Eyacuiñajji epajea'yojji. Eyacuiñajjija esohui ebajji nisho cuani. Ma eso' acuishaa mano mee ca'yani jayojjaya ejjashahuaba taiquijjiya aca'yani Eyacuiñajji nijje epo pajea'yojji. <sup>15</sup> Pea dejja meshi quea bame nee nee jayojja cuani. Eyacuiñajjija esohui shajja'ajja neinei cani. Shajja'ajja neinei majje Eyacuiñajjija epeejji tii tii cuani. Ohuaya ojaya esohui ba neinei cani. Jjashahuaba bame-

bamequiani. Ma dejja cuana ecuea esohui ba neineijji epoji —jamaya Jesosa cua.

*Esohui ehuohui'yojji cuaquijiji  
(Macoso 4.21-25)*

<sup>16</sup> Jesosaa jiquio esohui jama huohuime aca cua ba'a: —¿A'a eseya eseja cuaquijijiya jeaja'a came eshajajo capa nequiya? Chojja. ¿A'a eseya ejaaaji quimejjeFFE nequiya jeaja'a came? Chojja, de. ¡Eseyá quea ja'a po mee sa añajo ca eyajo nequia-sohuacue ojjaña quea ja'a epoji! <sup>17</sup> Jama jayojjaya Eyacuiñajjiya ojjaña ecuea esohui onaaya ba mee caje'yo quijje. Quea ja'a nee cuaje'yo. <sup>18</sup> Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Beca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesosa cua.

*Jesosaja nae, oja chahua pea'ai  
(Mateo 12.46-50; Macoso 3.31-35)*

<sup>19</sup> Majoya Jesosaja enaese cue'ya cua equi yasi-jje Jesosa ba'yohua. Ba'yo jjima cua ojaya, quea dejja huisojojo. <sup>20</sup> Oe dejja Jesosa jama huohuime aca cua ba'a: —Mique naeya mi sa'ajja ca'yoqui mique chahuaa pea'ai.

<sup>21</sup> Jamaya Jesosa cua ba'a: —E'e de, ojjaña nei neiya Eyacuiñajjiya esohui shajja'ajja neineijji cuani ecue nae nei nei cuani, ecue chahua nei nei cuani, Eyacuiñajjiya epeejji nei nei cuanijojo —jamaya Jesosa cua.

*Jesosaa beni nequioque meequi ca cua  
(Mateo 8.23-27; Macoso 4.35-41)*

**22** Oe pojajoo Jesosaa o shajja'ajjajji cuana jama aca cua ba'a: —¡Cua'a; bae ojje miji yasijje besa poquicue!

**23** Jamajjeya bishe ai yasijje ojjaña ania cua. Jesosa onaa dojobesa cajje cahuia cua. Majoya aje quea ichi po majje beni quea quemo nee nee cueya cua. Enashajohua bishe nanejea ca cua. **24** Oe dejja majoya Jesosa jama ishe'ame aca cua ba'a: —Esohui huohuijji, ¡shequicue oe! Coya aje se hui'i'ya.

Majoya aje Jesosa shequijeanana cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni nequioquequia cua enashajo pea'ai. Majoya aje enashajo po jjima jayojja po'ya cua. **25** O shajja'ajjajji jama mimimeya cua ba'a: —De, Jesosa quea sohui poja nee nee, de. Miminaje beni nijje; beni po jjima jayojja po mee ca'yonaje, de.

Majoya aje Jesosaa jama aca cua ba'a: —¿Yajjajje acuae jja nequiana metenaje so'o, de? Jjashahuabaqui jjima pojja'a jja nequiana Eyacuuiñajjijo, de —Jesosa cua.

*Dejjaja eyamijo nequi eshahua cuana Jesosaa cuaya meequi ca'ya cua*

*(Mateo 8.28-34; Macoso 5.1-20)*

**26** Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. **27** Jesosa bishejo ani etaja huasijje nequisohuaquiajo, oe dejja cueya cua. Ma dejja quea shahua huiso jjejojo niñepoqui cua. Daquima' nei nei cua; quima' pea'ai. Oya emojeajaaca huasijje ba'ya

cua. <sup>28-29</sup> Jamatii oya quea tai po mee canaje eshahuaa. Jamajjeya oya dejja cuaa jeyo ca cua cadenaa, poqui aija epojji. Jamatii ca ca cadena jjasejjajeaqui mee ca cua eshahuaa. Poqui mee ca'ya cua ma quima huasijje, de. Ma dejja Jesosa ba neinei ca cua. Majoya aje Jesosa nequi cojja nei ecui'oshajjajo nequioqueña cua. Majoya aje Jesosaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesosa, Eyacuiñajjija Bacua Ejja e'e jojo nei. ¡A'a mo miyaya jinapajji so'o! —jamaya cua.

<sup>30</sup> Majoya Jesosa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

<sup>31</sup> Eshahua cuaa Jesosa jama huohuime aca cua ba'a: —¡A'a ecuana huoojeajji cuaqui yasijje!

<sup>32</sup> ¡Ecuana oe cuichi cuanaja yami yasijje dobiqui mee'yocue!

—¡E'e ocuae dobi'ajjaqui socue! —jamaya aca cua Jesosaa.

<sup>33</sup> Majoya aje cuayaqui'ya cua dejjaja eshahua cuana, dobiqui'ya cua cuichi cuana huasijje. Majoya aje cuichi cuana emacojo nequi cuajicuaji jaaoquequinana cua bae yasijje; hui'i'ya cua ojjaña. <sup>34</sup> Cuichi hui'iye'yo ba majje cuichi jaahuanajji cuana poquia cua cuiñajji yasijje ojjaña huohuuya. Jama aca cua ba'a: —De, Jesosaa eshahua cuana cuaya mee canaje dejja niñepoqui meejjji po nequinaje. Dobiqui mee canaje ecuanaja cuichi

yasijje, hui'i'yonaje ojjaña cuichi, de. Cuajicuaji-nananaje bae yasijje, hui'i'yonaje. ¡Chama'yo tii, de!

<sup>35</sup> Majoya ojjaña dejja cueya cua ae Jesosa po ani baa. Onaaya cue majje ba ca cua ma dejja niñepoqui cuanaje Jesosa pejjejo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesosa quea so-hui poja nee neejo ojjaña quea mete po'ya cua. <sup>36</sup> Ma niñepoqui bajji cuanajeya Jesosajo huohui ca nequi'ya cua pea meshijo ba'e yasijje jama ba'a: —Jesosaa eshahua cuana cuaya meequi ca'yonaje.

<sup>37-39</sup> Ojjaña cuana ma meshijo ba'e quea mete nee nee cua. Quea meteya jjejojo Jesosa huoojea-jea ca'ya cua. Ma niñepoqui cuanajeya ca ca Jesosa jama huohua'ajjame aca cua ba'a: —Jesosa, eya minijje poqui sa cuani.

Jesosa jama cua ba'a: —Chojja, ¡miya poquicue miquea huapa pojjeama cuana huasijje! ¡Huohuicue ojjaña ma mi Eyacuiñajjiya jama acanaje! —jamaya Jesosa cua.

Majoya aje ma dejja poquia cua o ba'e yasijje huohuiya. Huohui ca'ya cua Jesosaa eshahua cuayaqui mee ca'ya cua.

*Jainoja bacua piona emano'yojaa pea epona naggi poani tii tii*

(Mateo 9.18-26; Macoso 5.21-43)

<sup>40</sup> Majoya aje Jesosa besajebe'ya cua. Ba'eña'ya cua ojaya meshi yasijje. Ojjaña cuanaja Jesosa quea boti nee cua. Ishoa'ajja ca nequia cuaa cua.

<sup>41</sup> Oe dejja Jaino bajjani Jodioja ejjachichaquijji equi jaahuanajji cua Cesanenajo. Oya cueya cua

Jesosa que. O cojja nei ecui'oshajjajo nequioqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahuema'ani quea mano nee nee cua. <sup>42</sup> Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea dejja huisojojo. <sup>43</sup> Oe pea epona quea mano dejja quea huiso yiyesamajo nequi. Oya quea mano nee nee, ojaya ena' cuayaqui nequia cua 12 shequiajame, de. Oya eshicuijji jjeshejji jjejojo bejjoma'yo cua. Eshicuijji quiajjija epona na' cuaya pajea meequi'yo jjima cua. <sup>44</sup> Jesosa poquianijo ohuaya Jesosaja daqui cuesha iñā ca cua. Ma daqui cuesha iñā cajje aje najji popajea mee ca'ya cua. <sup>45</sup> Majoya aje Jesosaa jama aca cua ba'a: —¿Aya acuae mo iñā canaje so'o?

O shajja'ajjajjiya, Penohua jama aca cua ba'a: —Cua'a, de. Quea dejja huisohua jjejojo mi, ¿aya shai mi iñā canaje Jesosa? Napa jjima ca mi ca ecuanaja —jamaya Jesosa aca cua Penohua.

<sup>46</sup> Jesosa jama cua ba'a: —Cho, ecuea eba Eyacuiñajjiya a'ya shai huaquia mee ca'yonaje e daqui iñā cajo.

<sup>47</sup> Ma epona Jesosaja esohui shajja'ajja majje piopio cua. Ojjaña nequijjo piopiojea cua. Ecui'oshajjajo nequioqueña cua Jesosa nequi yasijje. Ohuaya Jesosa jama huohuime aca cua ba'a: —E'e ee, Jesosa, eyaya nei miquea daqui cuesha iñanaje. Jjashahuabaqui majje che mi daqui iñā majje ena' huosa mee'yojji. Jamajjeya che eyaya jamaya miya anaje —jamaya ma epona cua.

**48** Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjashahuaba neineiquinajejojo. ¡Poquicue, quea bihui po'yocue!

**49** Jesosa epona nijje mimianijo tii Jainoja epeejji cueya cua Jaino que. Jama cua ba'a: —Jaino, miquea ebacua piona mano'yonaje. Chama'yo tii, de. ¡A'a poqui meejji ma esohui huohuijji nei!

**50** Jesosaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡Jjashahuaba neineiquicue oe Eyacuiñajjijo! Miquea bacua jjeya shequije'yo.

**51** Majoya Jainoja equi yasijje poquiña cua. Jesosaa beca cuana dobiqui mee jjima aca cua equi yasijje. Peno, Satiaco, Huani ca ca oe dobiqui mee ca cua. Ma ebacuaja chii enaese pea'ai dobiqui mee ca cua. Mahuiso dobiquia cua emano'yojaa baa.

**52** Dobiqui majje oya cuaa ba ca cua ojjaña pa'ani quea yeno nee nee jjejojo, ebacua emano'yojaajo. Jesosaa jama huohuime aca cua ba'a: —¡A'a paji! Ma epona sho'i mano'yo jjima, ecahuijaa.

**53** Majoya ojjaña soa'ya cua. Ojjañaa jama aca cua ba'a: —Chojja, mano neinei'yonaje jja coma, de —cuana cua.

**54** Majoya aje Jesosaa epona sho'ija eme iña majje janobajjima nei mimia cua jama ba'a: —¡Esho'i, nequisohuacue!

**55** Majoya aje shequi'ya cua, nequisohua'ya cua: —¡Quiacue oya bob! —Jesosa cua.

**56** Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a

huohuijji cuana jiquio eya mique bacua shequi  
mee'yonajejo! —jamaya Jesosaa aca cua.

## 9

*Jesosaa o shajja'ajjajji cuana 12 huoojea ca cua  
esohui huohuiya*

*(Mateo 10:5-15; Macoso 6:7-13)*

<sup>1-2</sup> Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! <sup>3</sup> ¡Aema' oe poquicue! ¡A'a acui ejjaquecuaca'aquijji dojorji; bashosoco pea'ai a'a dojorji! ¡A'a bobi, bejjo pea'ai dojorji! ¡Ma miquea eyamijo ba'e nei oe dojocue! <sup>4</sup> ¡Po'ayequi nequicue oe pea cuiñajji yasijje! ¡Miquianaya oe pea cuiñajji yasijje poqui majje miquianajaya epeejji epojji sa'ajjacue; ojaya equijo anicue! <sup>5</sup> Dejja cuaa pea cuiñajji ba'eya miquianajaya esohui cajaa acaje'yo pojja'a. ¡Huohuicue jja oe ma dejja cuana jama ba'a: “Quea mimishi mi coma” acue! “Eyacuiñajjiya jja miya ba cani. Ohuaya jja miya quea nee nee po mee caje'yo” acue. ¡Ma esohui jama huohui majjeya oe cuayaqui'yocue cuiñajji jo ani! ¡Majoya cuayaqui'yo majje miquianajaya ejiojjijo ani meshi pohui cuiayajajeana'yocue oya cuana jjashajja'ajjaqui ajja cuanajejojo! ¡Jamajjeya oe pea cuiñajji yasijje poquicue! —jamaya Jesosaa aca cua.

**6** Jamajje o shajja'ajjajji cuana po'ayequi nequia cua Jesosaja esohui huohuiya. Onaaya huohui ca cua Eyacuiñajjija esohui; jjaajaqui mee ca'ya cua emanojaa cuana.

*Jesosa emeshi meseya Enode Antipaa Huani poso aca cua*

(Mateo 14.1-12; Macoso 6.14-29)

**7** Emeshi meseya Enode Antipaa shajja'ajja ca cua peaja esohui Jesosajo. Pea cuaa Enode siajje aca cua jama ba'a: —Huani ca jja ca Jesosaya cuanaje. Huani ca jja ca shequi'yonaje —pea cuana cua. Enode quea ajjajja nee nee cua Jesosa Huani poso jojoya. **8** Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiana shequi o'oyanajeya —posoya aca cua.

Pea cuana jama siajje pomeya cua: —Jesosa pojja'a pea etiiquiana shequi o'oyanajeya.

**9** Enode majoya jama cua ba'a: —Eyaya nei ca jjaja ca Huani sapasejjajea meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

*Jesosaa 5.000 dejja cuana bobia ca cua*

(Mateo 14.13-21; Macoso 6.30-44; Huani 6.1-14)

**10** Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana poquia cua Betesaina huasijje. **11** Jomajo o ba majje ojjaña jjachichaquia cua Jesosa que. Ojjaña quea bihui cua Jesosaa Eyacuiñajjija esohui huohui caquijo. Jesosaa jama aca cua ba'a: “Ojjaña joya mimishi pajea'yoiji cuani, onijje e'e

nei jjapeequiani Eyacuiñajjiya jaahuana caje'yo". Ohuaya emanojaa cuana jjaajaqui mee ca'ya cua pea'ai. <sup>12</sup> Jjasinecuaquiaj ojjaña quea shoe nee cua; ye jjima ojaya bobi cua. O shajja'ajjajji cuaa Jesosa jama huohuime aca cua ba'a: —¡Huoojeacue ojjaña, bobi sa'ajja, ecahuijji sa'ajja pealai! Besshhua nei esejaya bobi jiquiojo chama' ba'a, de.

<sup>13</sup> Jesosa jamaya cua: —Chojja, ¡miquianaaya oe bobi quiacue e'ijjiajji!

Jamaya oya cuana cua: —De, oe pojji bobi yani. Beca nahuoo sisi yani, me oejje pahui yani. ¿A'a ecuanaya capoquiahua cuiñajji yasijje bobi jjequija pojja'a, ojjaña dejjaja bobi jjequija; quea bobi huiso epoji? <sup>14</sup> Yani quea dejja huiso nee nee, 5.000 yani, de.

Jesosaa jamaya aca cua ba'a: —Chojja, ja'a poquijji, ojjaña cuana anioque meecue, jjaanichichaqui meecue pea jjocojo, 50 anioque meecue!

<sup>15</sup> Majoya aje o shajja'ajjajji cuaa dejja cuana jama aca cua ba'a: —¡Anioquecue oe nequiana!

<sup>16</sup> Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimijji. Ohuaya Eyacuiñajji bihuia ca cua bobi e'ijjiajji. Majoya Jesosaa miji sisisisi ca cua pahui, nahuoo pea'ai. Majoya ohuaya bobi quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya. <sup>17</sup> Ijjia'ijjia majje ojjaña dejja cuana quea jeffe cua, de. Ojjaña dejja cuana jeffeajo iya ca'ya cua pea eshajajo tiiya iya ca poqui'ya cua; 12 shajame bobi e'ijjiasejjaja ecuatajea cua.

*Penohua Jesosa shahuaba ca'ya cua oya Quito  
(Mateo 16.13-28; Macoso 8.27-9.1)*

<sup>18</sup> Oe pojajao Jesosa oe nei mimia cua Eyacuiñaggi nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejja cuana ejo cuani?

<sup>19</sup> Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejja cuaa Huani poso acani. Pea dejja ca pajja mi ca Enia poso acani, ma etiiquiana, de. Pea dejja ca pajja mi ca pea etiiquiana shequi o'oyanaje poso acani, de.

<sup>20</sup> —De, ¿miquianaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

<sup>21</sup> Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohuijji pea cuana, ecuea bajjani Quito, miquea Emeshi Mese nei! <sup>22</sup> Eya Eyacuiñajjija huoojea'yo. Eya quea nee nee acaje'yo cuaa. Beca cuaa eya cajaa acaje'yo, Jodio etii cuaa, Eyacuiñajji nijje mimiani etii cuaa, Moisesija etehue'yo huohuijjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

<sup>23</sup> Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jjapeequi'yo sa cuani, oya Eyacuiñajjija esohui jayojja caba'yahua. E'e, ¡e jayojjaya pocue;

enijje poqui'yocue! Jamatii onaa napa cajje aje jja mi oe quea nee cuaje'yo. <sup>24</sup> E'e, ojjaña cuana ecuea esohui shajja'ajja sa po ajjajo ba'e tiitii ajja enijje eyajo. Joya ecuea esohui shajja'ajjajji cuani ca ca ba'e tiitiije'yo enijje eyajo. <sup>25</sup> E'e pojja'a dejja quea huiso nee nee aquiana ojaya yajji chicha cani. Jamatii oya cuana cuaqui yasijje jea cajo ojjaña ojaya aquiana cuana edojoji pojjeama. ¿A'a ojjaña ojaya aquiana cuana quea bame cuaje oya cuaqui yasijje poqui majje? Chojja, de. ¿A'a aquiana sosejje cuayaqui mee caje'yo cuaquijo ani? Chojja, de. <sup>26</sup> Oe dejja pojja'a: "Cajaa" cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjañaja Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojoji quea huiso nee nijje cueje o'oya, de. <sup>27</sup> E'e jojo nei miquianaaya jiquiojo nequiya mano'yo jjimahuua Eyacuiñajji epreejji nei quea huiso nee nee baje –jamaya aca cua Jesosaa.

*Jesosa quea coja jiji cua  
(Mateo 17.1-8; Macoso 9.2-8)*

<sup>28</sup> Quijje, jiquio esohui huohui majje oe nomico ani'yo Jesosa poquia cua eyiyo huasijke. Peno, Satiaco, Huani pea'ai poquia cua onijje. Poquia cua Eyacuiñajji nijje mimiya. <sup>29</sup> Eyacuiñajji nijje mimi majje Jesosaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. <sup>30</sup> Beca dejja emano'yo eyajje jjanequija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaya cua. Pea ca Enia etiiquiana

cua, ma yahuajo nei nei ba'ya cua. <sup>31</sup> Quea bame  
nee nee quea jiji nee nee miminequia cua Jesosa,  
Enia, Moisesi pea'ai. Jesosa miminequia cua onaja  
mimishijo emano'yoji jjejojo Jenosanenajo. Jama  
mimimea cua Jesosa. <sup>32</sup> Peno, Satiaco, Huani  
pea'ai quea cojja mano cua. Majoya aje shequi  
nei'ya cua, ba ca cua Jesosa, Enia, Moisesi pea'ai;  
quea jiji nee nee nequi, de. <sup>33</sup> Moisesi Enia mimi-  
jeyo majje poqui o'oya cua eyahuasijje. Poquije'yo  
ba majje Penohua Jesosa jama aca cua ba'a: —De,  
Esohui huohuijji, quea bame nee nee ecuanaya  
jiquiojo ani. Pea beca peejjima equi ejja'iyaqui, oe  
miquea, oe Moisesija, oe Eniaja —jamaya cua Peno  
jjashahuaba bamequi jjima jjejojo.

<sup>34</sup> Peno mimianijo tii bo oshe nee neeya oya  
cuana quehua ca cua. Bo ba majje quea mete  
nee nee po'ya cua. <sup>35</sup> Majoya Eyacuiñajjiya bo  
tejeeya esohui huohui ca cua jama ba'a: —Jiquio  
Jesosa ecue Bacua Ejja, ecuea quea jea nee nee,  
eya ojo quea bihui nee nee. ¡Oya oe oe neiya  
shajja'ajjacue! —jamaya aca cua bo tejjee Ey-  
acuiñajjiya.

<sup>36</sup> Ohuaya cuana ma esohui shajja'ajja majje ba  
ca'ya cua Jesosa oe nei nequi; pea cuana chama'.  
Peno, Huani, Satiaco pea'ai mimi'yo jjima nequia  
cua. Pea o shajja'ajjajji cuana huohui jjima aca  
cua. Quijje nei nei ca huohui ca cua, de.

*Esho'i niñepoqui Jesosaa eshahua huoojea  
ca'yajo niñepoqui pajea mee ca'ya cua  
(Mateo 17.14-21; Macoso 9.14-29)*

<sup>37</sup> Mecahuajje jjapojaquiajo Jesosa eyiyojo  
nequi jaaoque'ya cua. Quea dejja huiso nee neeya

Jesosa ishoa'ajja ca nequia cua. <sup>38</sup> Oe dejaa janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. <sup>39</sup> Eshahuua napa cajje, taaaani jeabichajea canaje meshi yasijje; huapani pea'ai. Eshahuua manojea mee'yo sa acani. Jamatii oya cuani, de. <sup>40</sup> Eyaya huohui'ajjanaje miquea eshajja'ajjajji cuana eshahua cuayaqui mee'yojjii. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquija ejearrijiya.

<sup>41</sup> Jesosaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee? —jama tecueameya Jesosaa aca cua.

Majoya ma dejja Jesosaa huohui ca cua jama ba'a: —¡Miquea ebacua jjequicue!

<sup>42</sup> Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesosaa eshahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesosaa ejearriji nijje esho'i poqui mee ca'ya cua. <sup>43</sup> Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

*Jesosaa huohui ca o'oya cua o manoje'yojo  
(Mateo 17.22-23; Macoso 9.30-32)*

Ma esho'i niñepoqui pajea mee'yo majje ojjaña bihuia ca cua Jesosa, Eyacuiñajji pea'ai. Ohua

bihuia cajje Jesosaa o shajja'ajjajji cuana jama aca cua ba'a: <sup>44</sup> —¡Shajja'ajjacue jiquio esohui! ¡A'a pajea'yoji! Quijje dejja cuaa eya iña caje emano mee'yojji —jamaya cua Jesosa.

<sup>45</sup> O shajja'ajjajji cuanaja ca quea quehua cua Jesosaja esohui. Eyacuiñajjiya quea quehua po mee ca'ya cua. Jamatii oya cuana quea mete cua ehuohui'ajjajji.

*¿Ache dejja quea bame eyajo cuaje'yo?  
(Mateo 18.1-5; Macoso 9.33-37)*

<sup>46</sup> Jesosa shajja'ajjajji cuana jjaniñebaqui ania cua. Jama cua ba'a: —¿Ache oja eshajja'ajjajji acuae eyajo quea bame nee nee nequije so'o? Eya nei emeshi mese cuaje eyajo, pojja'a, miya pojjeama.

Pea aje oe jama cua ba'a: —Chojja, eya, de.

<sup>47</sup> Jesosaa jama tecueame aca cua ba'a: — Miquianaya jjashahuaba taiquiani. ¡Shajja'ajjacue oe! <sup>48</sup> ¡Bacue jiquio esho'i cuana, emeshi mese po sa po ajja! ¡A'a emeshi mese po sa pojji! ¡Jamaya miquianaya pocue esho'i jayojjaya! ¡Jjapeequicue jiquio ecua esho'i cuana jayojja oe pocue, dejja quea bame nee nee epojji! Miquianaya ecuea epeejji nijje jjapeequi majje miya ecuea epeejji cuani, Eyacuiñajjiya epeejji pea'ai. Jamajjeya miquianaya esho'i quea bame jayojja cuani, ma-joya miquianaya quea bame nee nee nequije'yo eyajo —Jesosa cua.

*Oe dejja Edosiquianaja epeejji pojjeama cuani  
jamajjeya oya Jesosaja epeejji nei cuani  
(Macoso 9.38-40)*

<sup>49</sup> Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja eshahua cuana cuaya meequi ca'yonaje miyaya jayojjaya. Miquea epeejji cuani pojja'a, oya ca ca cue ajja tii ecuana nijje. Jamajjeya ecuaa oya jama huohuinaje ba'a: “¡A'a cuayaqui mee'yojji eshahua; miya ecuana nijje poqui ajja!”

<sup>50</sup> Jesosa jama cua ba'a: —Cho, ¡a'a jama pojji! Oya ecuea epeejji nei cuani. Oya Edosiquianaja epeejji pojjeama cuani, jamajjeya oya ecuea epeejji cuani. E'e, ma dejja quea bame cuani, oya quea tai pojjeama. Jamajjeya oya ecuanajaya epeejji cuani pea'ai —jamaya cua Jesosa.

### *Jesosaa Satiaco Huani pea'ai tecuea ca cua*

<sup>51</sup> Beshahua nei acua cua Jesosa emano'yojji, eyahuasijke epoqui'yojji pea'ai Eyacuiñajjija eso-hui jayojja yajji. Jamajjeya jjashahuabaqui majje oya poquia cua Jenosanena huasijke o shajja'ajjajji cuana nijje. <sup>52</sup> Poquijeya Jesosaa beca o shajja'ajjajji cuana huoojea ca cua Samania meshi yasijke ecahuijji sa'ajjaa. <sup>53</sup> Jomajo Samania dejja jama cua ba'a: —Chojja, ¡a'a miquianaya jiquiacua cuejji! Cajaa, miquianaya Jodio dejja jojoya, ecuanaja ca mi ca boti'ama Jodio dejja cuana Jenosanena huasijke poqui majamajajjijojo Eyacuiñajji bihuiaa.

<sup>54</sup> Majoya ma esohui shajja'ajja majje Satiaco, Huani pea'ai poquia cua Jesosa que huohui po-hua. Oya cuana jama cua ba'a: —Jesosa, Emeshi Mese nei, ecuaaya cuaqui oque mee sa aña ma

esohui quea tai miminaje yasijje. ¿A'a acuae quea bame jama epoji so'o, Jesosa?

<sup>55</sup> Jesosaa jama tecueame aca cua ba'a: —Chojja, ja'a miquianaya jama jjashahuabaquime pojji!

<sup>56</sup> Majoya aje poquia cua pea cuiñajji yasijje cahuiya.

*Jesosa nijje jjapeequi majje quea camaja cuaje  
(Mateo 8.19-22)*

<sup>57</sup> Ejiojjije poquijeya, dejjae Jesosa jama huohuime aca cua ba'a: —Jesosa, Emeshi Mese nei, eya minijje jjapeequi sa cuani. Jamajjeya eya minijje e'ejojo nei po'ayequi sa cuani.

<sup>58</sup> Majoya aje Jesosa jama cua ba'a: —E'e pojja'a de, quea camaja cuaje. Eya ojjañaja Edoe Mese cuani. Jamatii ecuea equi chama' ejomishocajji. Samao ca ca jjanijo cahuija, cuichojji cuana ejajo cahuiani. Eya ca ca iña quima' ecahuijji. Jamatii beca cuanaja equi quea nahue cuani e boti'amajojo —jamaya Jesosa cua.

<sup>59</sup> Pea pojjaajo pea dejja Jesosaa jama huohuime aca cua ba'a: —Ijjeyahua nei enijje cuecue ecuea epeejji epoji!

Ma dejja jama cua ba'a: —Emeshi Mese, quijje pishana poquije minijje. Jjeya ecue chii etii nojinoji, manoje'yo pojja'a. Eyaya camojea sahua mano'yajo.

<sup>60</sup> Jesosa jama cua ba'a: —Chojja, pea cuaa Eyacuiñajjija epeejji pojjeama cuaa oe cacuiña cahua. Ohuaya cuaa camojea cahua mano'yajo. ¡Cuecue jjeyahua nei; enijje ejjahuohuiquipi Eyacuiñajjija esohui pea cuana huasijje!

<sup>61</sup> Pea dejja Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebionei oe ecuea huapa pojjeama cuana cahuohuiqui'yo sahua jama ba'a: "Poquia iña Jesosa nijje".

<sup>62</sup> Jesosa jama cua ba'a: —Chojja, ijjeya nei cuecue enijje! ¡Miya enijje jjapeequi sa cuanijo cuecue jjeyahua nei enijje! Miya cue sa po ajjajje miya bame'ama cuaje Eyacuiñajji epjeejjii epojji.

## 10

### *Jesosaa dejja quea huiso huoojea ca cua 72 huisome*

<sup>1</sup> Majoya Jesosaa dejja quea huiso jjequi tepe ca cua, 72 huisome. Ohuaya becamejjiji pe'a'i huoojea ca cua ojjaña meshi cuana huasijje joya o poqui sa cuani yasijjeya. <sup>2</sup> Ohuaya jama huohuime aca cua ba'a: —Dejja cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajji esohui huohuijji yani. Jamajjeya ¡mimicue Eyacuiñajji nijje quea huiso esohui huohuijji epojji, quea huiso anoso sejja'yojji cuana jayojja epojji! <sup>3</sup> ¡Poquicue miquianaya ma dejja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajije minijje; ba'ajja. <sup>4</sup> ¡A'a bashosoco dojodzi; bejjo, ejiojji shejee pea'ai a'a dojodzi! ¡A'a pea nijje mimipoquijji; quea cueiji pashi nee oe poquicue! Quea huiso Eyaciñajji esohui shajja'ajja sa cuani. <sup>5</sup> Equi yasijje dobiqui majje jja ca oe equi mese huohuicue jama ba'a: "Eyacuiñajjiya miya quea bei po mee caje". <sup>6</sup> Ma equi mese

quea bei po sa cuanijo, Eyacuiñajjiya oya quea bei po mee caje. Pea equi meseya miya ca-jaa acanijo, Eyacuiñajjiya oya quea bei pojjeama acaje. <sup>7</sup> ¡Miquianaja epeejji epojji sa'ajjacue; ojaya equijo tiiya anicue! ¡Ojaya bobi ijija anicue ma cuiñajjiyo ani majje! Equi meseya miya cabobia cahua Eyacuiñajjiya esohui huohuiaña sosejje, ojaya echacojji jayojja cuani jojoya. <sup>8</sup> Pea cuiñajji yasijje poquiajo dejja cuaa miquianajaya esohui shajja'ajja sa cuanijo ohuaya miya bobia caje. ¡Ja-majjeya ijija'ijjiacue onijje! <sup>9</sup> ¡Jjaajaqui mee'yocue emanojaa cuana! ¡Huohuicue oe oya Eyacuiñajjiya esohui jama ba'a: “Jjeya nei Eyacuiñajjiya miya oja epeejji po mee sa acani” acue! <sup>10</sup> Pea cuiñajji yasijje poquiajo dejja cuana ca ca miquea esohui shajja'ajja sa po ajja pojja'a cuaje. ¡Ma dejjaya jja oe jama huohuime acue ba'a: <sup>11</sup> “Miquianaaya cajaa aña Eyacuiñajjiya esohui, jamajjeya ecuanaya pea dejja cuana huasijje poquije esohui huohuuya miquianaya shajjama' jojoya. Ecuana quea yeno cuani miquianaaya Eyacuiñajjiya esohui ca-jaa anaje jojoya. E'e de, ohuaya miquianaya huoojea caje'yo cuaqui yasijje. <sup>12</sup> Yahuajo Eyacuiñajjiya Sonoma cuiñajjiyo ba'e cuana aca cua jayojjaya miquianaya acaje'yo, quea nee nee po mee caje'yo” jama huohuimeya acue! —jamaya Jesosa cua.

*Beca cuiñajjiyo ba'e cuana shajjama' cua  
(Mateo 11.20-24)*

<sup>13</sup> Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyo'yo chana',

Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miquianaya ca mi ca oe shajjama' nei nei cuani, de. Yahuajo Eyacuiñajjiya Tinojo ba'e cuana Sinonojo ba'e cuana pea'ai quiyojea mee ca'ya cua quea mimishi nee neejojo. Ojaya cuanaja ca ca eya shahuaba jjima nei nei cua, de. Ohuaya eya eshahuaba jojjemo ecuea esohui eshajja'ajja jojjemo quea yeno nee nee poqui'aye ojaya mimishijo. Conasijo ba'eja ca jjaja ca iña oe eshahuaba cuanaje, jamatii jjejojoya ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. <sup>14</sup> Jamajjeya Eyacuiñajjiya miquianaya huoojea caje'yo cuaqui yasijje, quea nee nee nee cuaje'yo miquianaya. <sup>15</sup> Capenaomajo ba'e cuana, miquianaya shajjama' neiya cuani pea'ai. Jamajjeya aje jjia miquianaya quiyojea pea'aije'yo. Miquianaya jama jjashahuabaquiani ba'a: "Ecuana ca ca eyahuasije poquije'yo". Cho, miquianaya poquije cuaqui yasijje ecue sohuijo shajjama' cuanijojo –jamaya Jesosa cua.

<sup>16</sup> Majoya aje Jesosaa o shajja'ajjajji cuana jama huohuime aca cua ba'a: —E'e de, miquianaya ecuea esohui huohuiji cuani. Miquianaaya ecuea esohui nei huohuiaña. Jamajjeya dejja cuaa miquianajaya esohui shajja'ajja canijo ecuea epeeji cuaje. Pea dejja cuana ca ca oe shajja'ajja sa po ajjajo ecuea epeeji pojjeama cuaje, Eyacuiñajjiya epeeji pojjeama pea'ai cuaje. E'e de, mahuiso ecuea esohui –jamaya aca cua Jesosaa.

Majoya aje ma dejja cuana iye huiso huoojea ca cua esohui huohuiya.

*Ma dejja cuana, 72 huisome cue o'oya cua Jesosa que*

<sup>17</sup> Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaaya miquea bajjanijo eshahua huoojeacuaya'yonaje.

<sup>18</sup> Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjejje jayojja, de. <sup>19</sup> Eyaya miquianaya quea ca'a po meenaje epoquijji. Peyohua, ajiya pea'ai ijija cajje miquianaya mano'yo jjima po meeje'yo eyaya. Edosiquiana miya quecua jjima ameeje'yo eyaya. <sup>20</sup> Miquiaaya eshahua cuayaqui mee'yaña. ¡A'a quea bihui nee pojji miquianaya quea sohui poja nee cuani! ¡Miquianaya ca oe quea bihui pocue miquianajaya bajjani tehue canaje Eyacuiñajjiya eyajo edobiqui meejji! Miquianaya poquije eyahuasijke Eyacuiñajji nijje ba'e'yohua. ¡Jamajjeya ma esohuijoya quea bihui pocue! — jamaya Jesosa cua.

*Jesosa quea bihui cua  
(Mateo 11.25-27; 13.16-17)*

<sup>21</sup> Majoya aje Edojjoshahua Bameya Jesosa quea bihui po mee ca cua. Jesosaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana

jjashahuaba taiquiani jama ba'a: "Ecuea quea ja'a nee esohui, jamajjeya eya Eyacuiñajjiya esohui shajja'ajja sa po ajja". Miyaya, Eyacuiñajjiya, oya cuana ba meesahua ajja oya cuana jjashahuaba taiquianijojo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ej-jashahuabaquijji jama —Jesosa cua.

<sup>22</sup> Majoya Jesosaa pea cuana jama huohuime aca cua ba'a: —Eyacuiñajji ecue Chii e huoo-jea'yojji epo. Eya ojaya esohui huohuiji cuani. Ecue Chiija eyajo anija ecuea ejjashahuabaquijji ojaya eba nei nei, ojaye nei. Ecue Chiija ej-jashahuabaquijji ecuea eba nei nei pea'ai, ecuea nei. Eyaya ecuea epeeiji ba meesahuaña quea ja'a nee ecue Chiija ejjashahuabaquijji —jamaya Jesosa cua.

<sup>23</sup> Majoya aje o shajja'ajjajji cuana Jesosaa jama huohuime aca cua ba'a: —¡Quea bihui pocue, miquianaaya Eyacuiñajjiya ejjashahuabaqui'yojji bañajo! <sup>24</sup> E'e jojo nei eyaya miquianaya huohuiaña jama ba'a: Yahuajo quea huiso Eyacuiñajjiya esohui huohuiji cuana, emeshi mese cuana pea'ai Eyacuiñajjiya ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miquianaaya jjeya shajja'ajjaña —jamaya Jesosa cua.

*Esohui oe Samania dejja quea bame cuajo*

**25** Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿yajja acuae po cajji Eyacuiñajji nijje eba'e tiitii'yoji so'o?

**26** Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

**27** —De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: “¡Miyaya Eyacuiañajji quea jea nee nee acue! ¡Ojo nei oe jjashahuabaquicue; oya oe bihuiacue ojjaña pojja!” Pea etehue'yo jamaya cua ba'a: “Eseyaa jjajaahuanaquian. ¡Jama jaahuanameya oe acue mique doe cuana!” jama cua Moisesija etehue'yo yahuajo —jamaya cua ma esohui huohuijji.

**28** Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitiije'yo.

**29** Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yoji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

**30** Jamajjeya Jesosaa esohui jama huohuime aca cua ba'a: —Oe Jodio dejja ba'enaje Jenosanenajo, poquinaje ejiojjijje Jenico huasijje. Ejiojjijje poquianijo siipojji cuana nequinaje ejiojjijo sii epoiji. Siipojji cuaa dejja eshema' nei cuiahuejjajeame acanaje e'aquiana jjeshe'yoiji. Ojaya

daqui sii ca'yonaje, de. Siipojji cuaa ma dejja jea cana'yonaje, beshahua nei emano'yo. <sup>31</sup> Majoya oe Jodio dejja, Eyacuiñajji nijje mimiani dejja ma dejja ecuiajeajaajje yejje cananananje. Bajea canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. <sup>32</sup> Quijje pea Jodio dejja yejje canananaje bajea canajeya aje jja ca oe pea'ai. Oya Eyacuiñajji equi jaahuanajji cua. Jjequi sohuasohua'yo ajja jjaja cuanaje. Poquia jjaja oe cua. <sup>33</sup> Quijje aje jjaja oe Samania dejja cueyanaje. Samania cuanaja Jodio cuana boti'ama. Jamatii jiquio Samania dejja Jodio dejja ecuiajeajaajba canaje. <sup>34</sup> Ohuaya ba maje shicui canaje. Majoya aje iyasohua ca'yonaje mona biajje, dojo canaje ejaachichajji equi yasijke. Majoya aje jaahuanana canaje sosema' tii. <sup>35</sup> Pea cahuijo Samania dejja bejjo quia canaje equi mese yasijke, o cahuinaje sosejje. Jama huohuime aca cua ba'a: "Eya poquije chacohua. Ma ecuiajeajaajdejja ca anije, ¡miyaya oya jaahuanacue! Ma'aje bejjo o jaahuanana sosejje. Quijje eya cueje o'oya mi sosequia o'oyaa" jamaya cuanaje Samania dejja — Jesosa cua.

<sup>36</sup> Majoya Jesosaa Moisesija etehue'yo huohuijji jama huohuime aca cua ba'a: —Pea beca peejjima dejja ecuiajeajaajdejja ba cananananje. ¿Ache dejja acuae oja doe jayojja cuanaje?

<sup>37</sup> —Ma o jjequisohua'yojji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuanana meeyaa acue, mique doe jayojja acue! —jamaya Jesosa cua.

*Jesosa, Manta, Mania nijje pea'ai anicuanana cua*

<sup>38</sup> Jesosa o shajja'ajjajji cuana nijje Jenosanena huasijke poquije Mantaja equi yasijke do-biquinana cua ijija'ijjiaa. <sup>39</sup> Mantaja shehue, Mania Jesosaja esohui shajja'ajja sa cua. Jamajjeya Jesosa chipi nei ania cua oja esohui shajja'ajja neineiji. <sup>40</sup> Mantaja cuacuacuacuaquia jjejojo Jesosaja esohui shajja'ajja jjima cua. Oya quea quene cua oja shehue nijje. Mantaa Jesosa jama huohuime aca cua ba'a: —Jesosa, eya ecue shehueja cuacuasahua jjima. ¡Huoojeacue oya e cuacuasahuaa!

<sup>41</sup> Jesosa ca oe jama cua ba'a: —Chojja, Manta, miquea ecuacuajjijo ca ca miña jjashahuabaquiani. Jamajjeya miya ecue esohuijo jjashahuabaqui jjima cuani. <sup>42</sup> Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

## 11

*¡Eyacuiñajji nijje jama mimime pocue!  
(Mateo 6.9-15; 7.7-11)*

<sup>1</sup> Jesosa pea pojajao mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohuicue iña miyaya achajja mimime acuae po cajji so'o! Yahuajo Huaniya ona besameejji cuanajeya o shajja'ajjajji cuana huohui ca cua achajja mimime epojji Eyacuiñajji nijje. ¡Jamaya huohuicue ecuanaya!

<sup>2</sup> Majoya aje Jesosaa jama aca cua ba'a: —Jama mimimeya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama'. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

<sup>3</sup> ¡Quiacue mo ecuea bobi eba'ejji!

<sup>4</sup> ¡Ecuanajaya mimishi cuana cuijea'yocue!

Eya quene'ama pea cuana nijje; joya enijje quea mimishi cuani nijje.

Jamajjeya ecuea mimishi cuanajo ¡a'a quene pojji pea'ai!

¡A'a ecuana quea mimishi po meeiji! Acua. ¡Jamaya mimicue Eyacuiñajji nijje! —jamaya Jesosa cua.

<sup>5</sup> Majoya Jesosaa o shajja'ajjajji cuana pea eso-hui ejjashahuabaqui meeiji jama huohuime aca cua ba'a: —Miquianaya pojja'a mee nei poquije miquea epeeiji ja quea shoe, de. ¡Che mo bobi quiacue ecuea epeeiji nijje ebobiajji!" jamaya cuaje miya pojja'a. <sup>7</sup> Majoya oya jamaya cuaje ba'a: "Chojja, de. Equiajji pojjeama mi, cahuijaa so'o ca ca iña, de. Ca'a'yonaje oya aña ecuea esecuejjani ca mi quiajji". <sup>8</sup> Miyaya huohui'ajja majamajje ca mi ca oe quia caje. Ojaya epeeijiyojo pojjeama ca mi ca oe quia cani miya mi cahuime

yajje —jamaya Jesosa cua—. <sup>9</sup> E'e de, eyaya huohuinaje maya esohui miquea ebajji achajja mimime Eyacuiñajji nijje epojji. ¡Miquianaaya huohui majamajacue esecuejo nequia jayojja! Majoya Eyacuiñajjiya miquianaya quia caje. ¡A'a Eyacuiñajji nijje mimi pajea'yojji ohuaya miya saja'a caje'yo! <sup>10</sup> E'e, ojjaña cuaa Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejjijo, de. Oya poquinaje bobi sa'ajja, huohui'ajja majamaja canequinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajaje. <sup>11</sup> Miquianaja bacuua nahuoojo huohui'ajja cajje, ¿ae quiaje? Peyo pojja'a. Chojja, miquianajaya equiajji pojjeama peyo, de. <sup>12</sup> Miquianaja bacuua cachinajjajo huohui'ajja cajje, ¿ae quiaje? Aji pojja'a. Chojja, miquianajaya equiajji pojjeama, de. <sup>13</sup> Miquianaya quea mimishi ba'yani. Jamatii miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjaje. Ohuaya miquiana huasijje Edojjoshahua Bame nei huoojea caje miquiaa huohui'ajjaje —jamaya Jesosa cua.

*Jesosa Edosiquiana etiiya quea sohui poja po mee cani poso —aca cuaa cua*

*(Mateo 12.22-30; Macoso 3.20-27)*

<sup>14</sup> Oe dejja mimi'ajja nequia cua eshahua oja yamijo nequi jojo. Oya poquia cua Jesosa que. Jesosaa eshahua cuayaqui mee ca'ya cua. Ma dejja eshahua cuayaqui'yajo mimicoo'ya cua, de. Ma-

joya aje ojjaña cuana jama cua ba'a: —De, Jesosa quea sohui poja nee nee yaña.

<sup>15</sup> Pea dejja cuanaya jama siajje pomeya cua ba'a: —Edosiquiana etii nijjeya jjejojo, Jesosaa es-hahua cuaya meeque ca'yonaje, Edosiquiana etii Meesemo nijjeya.

<sup>16</sup> Pea cuana jjashahuaba taiquia cua Jesosaja epeeiji nisho epoji. Jesosa jama aca cuaa cua ba'a: —Ecuanaa ajiima aña Eyacuiñajjiya miya ca ca ameesahua caje pojja'a. ijJamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuana huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yo pojjeama posojo.

<sup>17</sup> Jesosaja eba onajaya ejjashahuaba taiquiji. Jamajoya aje Jesosaa jama tecueame oya cuana aca cua ba'a: —jjashajja'ajjaquicue oe! Joya emeshi mese ojo chacochacoani cuaa shajja'ajja sa po ajjajo, ojee jjaquecuauqui majje jjaque-cua iyaiyaquije'yo dejja cuana ma meshijo ba'e; chama'yo tii cuaje'yo. Huapa pojjeama cuana nijje jjacuiaquiajo chama' epeeiji cuana cuaje'yo.

<sup>18</sup> Jamaya pea'ai Edosiquiana etiyya Satanasa pe a eshahua ehuoojeacuaya'yo jojjemo, dejja huoo-jea'yoji pojjeama po'yoquiaye. Chojja, jama pojjeama ca coma. <sup>19</sup> ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuaya jeaña poso aña? Jamajjeya miquea epeeiji cuanaa ¿ae nijje eshahua huoojeacuaya-jea cani? Eyacuiñajjiya asahua canijo, jamajjeya ojaya eba miquianaya ejo siajje cuani. <sup>20</sup> E'e, Ey-acuiñajji nijjeya eyaya eshahua huoojeacuaya jea-

yaña. ¡Jamajjeya bacue eya e'e jojo nei Eyacuiñajji, Emeshi Mese oe nei jjeya cuani tii! <sup>21</sup> ¡Bacue! ¿A'a dejja quea ca'a neeja equi yasijje dobiquiji oja aquiana siiya o jeyo jjima nequijo? Chojja, o jeyo majje ojaya aquiana cuana sii caje cuaa. <sup>22</sup> Jiquio ecua e'aquiana mese ebionei jeyo cani jama amajje eyaya eshahua cuana jeacuaya-jeaña. <sup>23</sup> Miquianaya shajja'ajja sa po ajja ecuea esohui, jamajjeya ecuea epreejji nei pojjeama miquianaya cuani. Miquianaaya ecuea esohui pea cuana huasijje huohui sa po ajjajo, jamajjeya miquianaaya pea cuana quea mimishi po mee sa aña, de —jamaya Jesosa cua.

*Eshahua dejjaja yami yasijje cue o'oyani  
(Mateo 12.43-45)*

<sup>24</sup> Jesosaa esohui ejjashahuabaqui meeiji huohui ca cua jama ba'a: —Eshahua dejjaja yamijo nequi cuayajequi'yо majje quea huesha poquinaje. Sa'ajja ca'yonaje pea enequi'yojjii. Jamatii ba'yo jjima cuanaje. Eshahua po'ayequiviequinaje o nequiji sa'ajja'yohua. Jamajjeya oya jjashahuabaquinaje jama ba'a: "Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya". <sup>25</sup> Jamajjeya oya dejja huasijjeya cue o'oyanaje. Ojaya yami yasijje dobiqui'yonaje Eyacuiñajji epeejji pojjeama jojoya, ojaya eyami equi ecuiashaba jayojja jama, ehuana bamebame jayojja equi se ejjama'. <sup>26</sup> Jamajjeya ma eshahua poquinaje pea eshahua cuana jjequiya onijje enequi'yojjii ma dejjaja yamijo. Oya cuana quea mase nee nee cuanaje. Oe nei yahua ca ca

quea mase pishana cuanaje. Majoya aje ojjaña dobiquiajo ma dejja quea yeno nee nee cuanaje. Yahuajo oe eshahua nequiahuajo ca ca quea yeno pishana cuanaje.

*¿Yajja acuae po cajji quea bihui epoji?*

<sup>27</sup> Jesosa mimianijo oe epona ojjaña yiyesama neijo nequi sohuicuaya cua jama ba'a: —Jesosa, Eyacuiñajjiya miquea enaese quea bihui capo mee ca'yahua, ohuaya miya cuayajo tii mee canajejo.

<sup>28</sup> Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji nijje jjapeequi neinei majje quea bihui nee nee capo'yahua. ¡Jamaya pocue quea bihui nee nee epoji! —jamaya Jesosa cua.

*Dejja mimishi cuaa Jesosa huohui'ajja ca cua  
(Mateo 12.38-42; Macoso 8.12)*

<sup>29</sup> Quea dejja huiso nee nee ejjachichaqui nequia cua Jesosa nijje. Majoya Jesosaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miquianaya ba o'oya sa cuani eyaya yahuajo anaje jayojja. Ecuea jamaya e'abeca'yojji pojjeama miquea ebajji eya Eyacuiñajjiya huoojea'yo. ¡Jjashahuabaquicue yahuajo nei Eyacuiñajjiya Jjona jaahuana ca cua jai ai'aija sei aijo ba'e! <sup>30</sup> Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojjajea ca'ya cua. Majoya dejja cuana Ninebe cuiñajjijo ba'e yasijke poquia cua. Oya jjashahuabaqui'yo aña cua Jjona eshequi o'oya jayojjajo. Jjashahuaba

bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya Jjona jayojjaya cuaje, eya mano'yo majje mei jjanijo jaa shequije o'oya pea beca peejjima cahuime po majje, miquiana jjashahuabaquijji Eyacuiñajjiya eya huoojea canaje miquiana huasijje. <sup>31-32</sup> E'e, yahuajo Ninebejo ba'e cuaa Jjonaja esohui shajja'ajja majje mimishi pajea ca'ya cua. Jjapeequia cua Eyacuiñajji nijje. Jjonaa esohui quea bame huohui ca cua. Jjeya eyaya miquianaya huohui bamebame yaña, de. Jamatii miquianaya ecuea esohui shajja'ajja sa po ajja. Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya.

—E'e, jamaya yahuajo cua ba'a: Eeno cuejijiye emeshi mese pona cua. Oya quea huesha nee nee cueya cua Sanomoja esohui shajja'ajjaa. Sanomo quea jjashahuabaqui ja'a pishana cua. Eya ca iña quea jjashahuabaqui ja'a nee nee cuani. Jamatii miquianaya ecuea esohui shajja'ajja sa po'yo ajja. ¿Yajjajo acuae miquianaya ma epona jayojja mi po'ajjani so'o? Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya, de —jamaya Jesosa cua.

*Esohui ecojja cuaquijiji jayojjajo  
(Mateo 5.15; 6.22-23)*

<sup>33</sup> Jesosa jama cua ba'a: —¿A'a miquianaya cuaquijiji dedo majje capanequiaña eshajaa? Chojja. ¿A'a miquianaya enequia quehua nequiya jeaja'a came? Chojja. E'e, eyajo nequiya jeaja'a cani. <sup>34</sup> Miquianajaya ecojja cuaquijiji jama, de. Miquianajaya ecojja quea ja'a cuanijo

miquianaya poqui bameje. Miquianajaya ecojja ja'a'ama cuanijo epoqui bamejji pojjeama. Jamaya miquianajaya ejjashahuabaquijjiya quea ja'a cuanijo, ba'e bameje. Miquianaya jjashahuuba taiquianijo, miquianaya cuaquijji enequia quehua jayojja cuaje. <sup>35-36</sup> [Jamajjeya ma cuaquijji eyajo nequiasohua nequi jayojja jama jjashahuuba bamebamequimeya oe pocue! –jamaya Jesosa cua.

*Jesosaa Paniseo dejja cuana Moisesija etehue'yo huohuijji tecuea ca cua*

(*Mateo 23.1-36; Macoso 12.38-40; Noca 20.45-47*)

<sup>37</sup> Jesosa mimipajea'yajo oe Paniseo dejjaas Jesosa iyaa ca cua ijjia'ijjiaa ojaya equi yasijje. Jesosa dobiQUI majje e'anijjijo anioquea cua. Oya jjametopo neineiqui jjima cua, Jodio etiiquiaa acani jayojja ajjima aca cua. <sup>38</sup> Jamajjeya Paniseo dejjaas Jesosa ba majje jjashahuuba taiquia cua jama ba'a: –E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

<sup>39</sup> Jesosaja eba onajaya ejjashahuabaquijji; jamajjeya jama tecueame aca cua ba'a: –De, miquianaya, Paniseo dejja cuana jamatii esohui huohuijji nisho cuani, quea tai, de. Miquianaya joya caneco yiye topo jjimajo jayojja cuani. Jamaya miquianaaya dejja cuana jjashahuabaqui meeña, miquianaya Eyacuiñajjija epeejji cuani poso acani dejja cuaa. Miquianaya ca mi ca ojaya epeejji pojjeama, ojaya miquianaya eba, de. Ojjaña miquianaya quea bame cuani poso acani. Miquianaya ca ca quea tai nee

nee cuani; jjashahuaba quehuaquiani, de.  
**40-41** Miquianaya Eyacuiñajijo jjashahuaba nishoquiani, ojaya epeejji nisho cuani. Jamajjeya beca cuaa miquianaya quea bame ba'e poso acani. Eyacuiñajjiya miquianaya quea bame nee jjashahuabaqui mee sa acani. Jamajjeya jja oe ionijje jjapeequicue e'e jojo nei epoji! Majoya aje miquianaya quea bame cuaje'yo.

**42** —E'e de, miquianaya Paniseo dejja cuana jjashahuaba taiquiani, de. ¡A'a quea dejja tai pojji! Shajja'ajjaña ajeya ca oe Eyacuiñajjiya esohui, ojjaña ojaya esohui aje jje oe shajja'ajja jjima cuani, e'e nei. ¡Miquianaaya ojjaña Eyacuiñajjiya esohui shajja'ajja jeyojeyocue! ¡Huapa pojjeama cuana quea jea acue, Eyacuiñajjiya ojjaña cuana quea jea acani jayojja oe acue! E'e de, ¡a'a pajea'yojji quea jea aiji! Jamajjeya miquianaya quea bame cuaje.

**43** —E'e de, miquianaya ca jja ca oe quea tai cuani, Paniseo dejja cuana. Jamatii miquianajaya equi ejjachichaquijijo e'anijji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cuaa quea bame poso acani. Miquianaya ca jja mi ca siajjepoji, de. E'e, ejiojjije pe'a'i miquianaya po'ayequequijo dejja cuanaja esohui shajja'ajja sa cuani jama ba'a: "Paniseo dejja cuana ca jja ca quea bame nee nee, de". Ma esohui ca jja ca e'e jojo nei pojjeama acani.

**44** —E'e miquianaya quea tai po majamajani. Miquianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jjashahuabaquiani ma meshi joya quea bame poso acani. Jamaya miquiana

ma emojea'yojaa jama cuani. Pea cuana jjashahuabaquiani miquiana quea bame, onajaya miquianaya ba jjima quea tai nee nee cuani. Miquianaya jjashahuabatai tiitiiquiani; quea bame pojjeama cuani —jamaya Jesosa cua.

<sup>45</sup> Oe Moisesija etehue'yo huohuijji cuani jama cua ba'a: —Jesosa, miya pojja'a ecuana nijjeya pea'ai tecuetecueani.

<sup>46</sup> Jesosaa oya jama huohuime aca cua ba'a: —E'e jojo nei eyaya miquianaya tecueaña. Miquianaya Moisesija etehue'yo huohuijji nisho cuani pea'ai, de. Miquiaaya pea cuana huasijke esohui quea camaja huohui nishoaña. Jamatii miquianaya ma esohui jayojja ba'e ajja; ona asahua ajja.

<sup>47-48</sup> —E'e, miquianaya quea tai nee nee cuani, miquianaja etiiquiana jayojja, de. Miquianaja etiiquiaa Eyacuiñajjija esohui huohuijji quecua ca'ya cua jjashajja'ajjaqui ajjaajjejojo. Jamatii miquianaaya cuia'asha poquia tiitiiña etiiquiaa quecua ca'ya cua shahuaba poquia tiitiji, equecua'yo sajaa quea pame epoji epajea'yo cuani jjejojo. Jamajjeya miquianajaya etiiquiana jayojja jama jjashahuabaquime cuani. <sup>49</sup> E'e, Eyacuiñajjija eba, jamajjeya ohuaya jama huohuime aca cua yahuajo ba'a: "Eyaya ecuea esohui huohuijji cuana, e shajja'ajjajji cuana huoojeaje pea cuana huasijke. Ecuea ehuoojea'yo cuana beca cuaa quecua caje'yo nei nei. Beca ca mimi panajajije onijje" jamaya Eyacuiñajji cua. <sup>50-51</sup> E'e, miquianajaya etiiquiana huasijke huoojea ca cua Eyacuiñajjija huoojea'yo cuana. E'e, yahuajo miquianajaya etiiquiaa quecua

ca'ya cua Eyacuiñajija huoojea'yo cuana, de. Yahuajo Eyacuiñajija esohuijo tehue ca cua Abenijo. Miquianajaya etiiquiaa Cainiya Abeni cuiahuejjajea ca'ya cua. Majoya oya jayojjaya quea huiso cuiahuejjajea ca'ya cua Eyacuiñajija esohui huohuijji cuana. Quijje yejje nei Eyacuiñajija etehue'yojo tehue ca cua ojaya pea esohui huohuijji, Sacaniajo. Oya Eyacuiñajiji nijje mimiani cuiahuejjajea ca'ya cua cuaa Eyacuiñajija equijo, aquiana dahuajeajji pejjejo, de. Jamajjeya eyaya miya e'e jojo nei huohuaña jama ba'a: Jjeya nei Eyacuiñajija miquianaya quea nee nee po mee caje'yo ojjaña etiiquianaja mimishi cuanajo, miquianaya etiiquiana jayojja cuani jojoya. <sup>52</sup> E'e jojo nei miquianaya, Moisesija etehue'yo huohuijji cuana quea tai nee cuani. Jamatii miquianaya ca mi ca oe esohui huohuijji nisho, siajjepoji. E'e, miquianaya Eyacuiñajiji nijje jjapeequi ajja nei. Pea cuana Eyacuiñajiji nijje jjapeequi sa cuani, miquianaaya jjapeequi pajea meeyaaña, de. Jamajoya miquianaya quea nee nee po mee caje'yo quiijke, de, quea nee tii tii cuaje'yo —jamaya Jesosa cua.

<sup>53-54</sup> Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesosaja esohuijo. Oya cuana jjashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajeanobiaquijji yasijje edojojji nisho.

## 12

*Jesosaa esohui huohui ca cua ona jjashahuaba*

*taiquianijo*

(Mateo 10.26-27)

<sup>1</sup> Quea dejja huiso nee nee ejjachichaqui nequia cua Jesosa shajja'ajjajji. Jjiojji quishi canequia cuaa cua quea dejja huisohua jjejojo. Jesosaa o shajja'ajjajji cuana jama huohuime aca cua ba'a: —Paniseo dejja cuana jjashahuabatai majama-jaquiani. Jamajjeya aje esohui huohuiji nisho cuani, Eyacuiñajjiya epeejji nisho cuani, de. Coya mi o jayojja po chana'. <sup>2-3</sup> Eyacuiñajjiya oya cuana ba cani ojaya epeejji nisho cuani. Ojaya ojjaña eba o jjashahuabaqui'yojji cuani cuana. Eyacuiñajjiya eba ojjaña, de. Jamajjeya joya Eyacuiñajjiya quea ja'a po mee caje huiso tiiya, quehua'ama cuaje'yo tii ojjaña ebajji.

*¡A'a quea mete pojji dejja cuanajo!*

(Mateo 10.28-31)

<sup>4</sup> E'e ecuea epeejji nei, ja'a quea mete pojji ojjaña cuanajo, eshahua cuanajo pea'ai! Oya cuaa miquianaya quecuia caje'yo pojja'a. Jamatii miquianajaya edojjoshahua mano jjima cuaje. <sup>5</sup> ¡Miquianaya jja oe jjashahuabaquicue Eyacuiñajjiyo, de! Shajjama' cuajo ohuaya miquianaya mano mee'yo majje cuaqi yasijje jeajea caje'yo miquea edojjoshahua.

<sup>6</sup> —E'e de, quea anohuui huiso nee nee yani. Anohuui beshahua nei sosema' quea huisojojo. Eyacuiñajjiya oya cuana pajea'yo jjima acani. Ojaya eba ojjaña. <sup>7</sup> Ohuaya anohuui jaahuana cani, jamajjeya ohuaya miquianaya jaahuana neinei cani pea'aiya, de. Ojaya esico miquianajaya ehuojjaña. Jamajjeya ja'a pajea'yojji miquianaya

ohuaya nahue cani! Anohuii ohuaya nahue cani pishana —jamaya Jesosa cua.

*¡A'a quea bicho pojji Jesosa nijje jjapeequi majje!*  
*(Mateo 10.32-33; 12.32; 10.19-20)*

<sup>8</sup> Jesosa jama cua ba'a: —Ecuea epeeiji cuaa ejo huohui cani jama ba'a: “E'e, eya ca iña bicho'ama Jesosajo. Eya ojaya epeeiji nei nei, e'e jojo nei”. Jamajjeya eyaya Eyacuiñajjija esohuidojiji cuana o que huohuije jama ba'a: “E'e, oya cuana ecuea epeeiji nei, e'e jojo nei”. <sup>9</sup> Pea cuana ca jja ca quea bicho cuani ejo. Jamajjeya oya cuaa huohui caje jama ba'a: “Cho, eya Jesosaja epeeiji pojjeama”. Jamajjeya eyaya Eyacuiñajjija esohuidojiji cuana huohuije jama ba'a: “Cho, oya cuana ecuea epeeiji pojjeama, cajaa” eyaya aje —Jesosa jamaya cua— . <sup>10</sup> Beca cuaa eya niñebea cani; Eyacuiñajjija maya mimishi cuijea sa acani. Peaa pojja'a Edojjoshahua Bame niñebea cani, Eyacuiñajjija ca ca maya emimishi cuijea'yojiji pojjeama. Ma mimishi ani tiitije'yo.

<sup>11</sup> —Pea cuaa miquianaya dojo caje esohuinano mese ani yasijje, Jodio dejja etii ani yasijje ecuea epeejijojo. Miquianaya pojja'a quea mete nee nee cuaje. Miquianaya jama jjashahuabaquije pojja'a ba'a: “¿Achajja shai huohuime acajji? ¿Achajja shai saja'ame aje?” ¡A'a jamaya jjashahuabaquijji! ¡Mete'ama nei onijje mimicue! <sup>12</sup> Edojjoshahua Bameya miquianaya mimi bame meesahua caje esohuinano mese nijje. Quea bame cuaje miquianaya —jamaya Jesosa cua.

*¡A'a bejjojo jjashahuaba majamajaquijji!*

<sup>13</sup> Oe dejja Jesosaa jama huohuime aca cua ba'a: –Esohui huohuijji, ecuanaja chii mano'yonaje. Ecue o'ija che eya beijo esejja quia'yo jjima ecue chiija quijjojea. Jamajjeya jama huohui'ajjame acue ecue o'i ba'a: “Che pa Ɂchahua beijo esejja quia'yocue!” acue –jamaya cuanaje oja chahua beijo sa cuanijo.

<sup>14</sup> Jesosaa jama huohuime aca cua ba'a: –Chojja de, ¿yajjajo acuae moyaa jama huohui'ajjame aña? Eya ca iña mique chiija quijjojea beijo quia'yohua cue pojjeama. Maya ecuea echacojji pojjeama, de.

<sup>15</sup> Ojjaña dejja manoje'yo quea beijo huiso cuana, aema' cuana pea'ai. Miquea aquianaa miquea bejjohua miya ba'e meesahua jjima acaje'yo, de. Jamajjeya ja'a aquiana beijo pea'ai sa majamaja-jji! –jamaya Jesosa cua.

<sup>16</sup> Majoya Jesosaa jiquio esohui ebajji huohui ca cua jama ba'a: –Oe dejja quea beijo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. <sup>17</sup> Oya jama jjashahuabaquinaje ba'a: “De, eya quea bihui nee, quea beijo huiso nee nee cuaje. ¿Achejo shai eyaya anoso quea huiso nequiaje? <sup>18</sup> Eyaya pojja'a cajjajeaje'yo anoso nequijji, equi quea quemoo nee nee iyaje'yo anoso quea huiso nee nee nequiajji, de. <sup>19</sup> Majoya anoso iyajeyo'yo majje eya quea bihui cuaje, ecuea beijo quea huiso nee nee cuaje. Quea shequija huiso nee nee eya chacochaco'yo jjima cuaje quea huiso jjejojo. Eyaya bobi quea huiso nee nee ijjiaje quea bihui epoji” jamaya cuanaje ma dejja. <sup>20</sup> Majoya aje Eyacuiñajjiya ma mecajje huohui canaje jama ba'a: “De, miya ca

ca niñepoqui cuanaje. Miya jjeya nei manoje'yo. ¿Ajea acuae cuaje'yo miquea aquiana jiquio miya jaahuaña? Poquijeyoje'yo miya jiquio mecajje. Chama'yo tii cuaje. Miquea aquiana, anoso, beijo pea'ai dojo'yo jjima cuaje. Miya aema' poquije'yo cuaqui yasijje enijje jjapeequi jjima jjejojo" cuanaje Eyacuiñajji. Majoya aje mano'yonaje ma dejja; chama'yo tii cuanaje —jamaya Jesosa cua— . <sup>21</sup> E'e de, ma dejja jayojjaya miquianaya cuaje miya bejjojo jjashahuaba majamajaquianijo. Oe dejja jjashahuuba majamajaquiani ojaya bejjojo Eyacuiñajji oya jjashahuabaqui jjima cuani — jamaya Jesosa cua.

*Eyacuiñajjiya ojaya epeeiji cuana jaahuanana cani  
(Mateo 6.25-34)*

<sup>22</sup> Majoya Jesosaa o shajja'ajjajji cuana jama huohuime aca cua ba'a: —E'e jojo nei eyaya miquianaya huohuiaña: ¡A'a quea yeno jjashahuuba tiitiiquijji miquianajaya eba'ejjijo! Jama ba'a: “E'e pojja'a eya bobimajo manoje'yo; bobi yasijje cuaje'yo. Ecuea daqui pojja'a huiñaje'yo, daquima' nei nei eya cuaje'yo”. ¡A'a jamaya jjashahuuba tiitiiquijji! <sup>23-24</sup> E'e de, cuichojji cuana ca ca quea jaji nee ba'e. Oya cuana ca ca chacochaco aija, bobi chicha aija equi yasijje quijje e'ijjia'yojji. Eseja Chiiya jja oya cuana jaahuanana cani, de. Miquianaya ca ca oe ohuaya jaahuanana neinei cani. ¡Jama jjashahuabaquimeya jja oe pocue ca quea bame eba'ejjji, daquijo, bobijo! <sup>25</sup> ¿A'a miya quea ao cuaje'yo jjashahuabaquime cuani? Chojja, jamatiiya cuaje'yo. <sup>26</sup> Jamajjeya oe ja'a

aquianajo jjashahuaba tiitiiquiji! —Jesosa cua— . ¿Apiojji miquianaya jjashahuaba tiitiiquiani miquianajaya daquijo? <sup>27</sup> ¡Bacue shasha tiiani! Shasha cuana chacochaco ajja; oja daqui cuana soco ajja. Jamatii quea bame nee neequiani. Jamaya Eyacuiñajjiya shasha pohua mee cani. Jodioja emeshi mese yahuajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. <sup>28</sup> E'e, Eyacuiñajjiya shasha cuana pohua mee cani quea bame nee. Jjeya shasha cuana enequi; mecahuajje yaa'yani, joca'yani; dahuajea cani cuaa pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miquianaya ba'e meesahua caje'yo quea bame nee nee. Miquianaya ojaya quea boti nee nee cuani. Miquianaya jjashahuaba taiquiani jama ba'a: “E'e pojja'a eseya jaahuana jjima Eyacuiñajjiya”. Cho, ja'a jamaya jjashahuabaquiji! —jamaya Jesosa cua.

<sup>29</sup> —E'e, a'a jama pea'ai jjashahuabaquime pojji ba'a: “¿A'ya shai che ijijiaje? ¿A'ya shai che ishije; chama ena? ¿A'ya shai che ecuaa huoshoje?” <sup>30</sup> Ojjaña cuana Eyacuiñajjiya epeejji pojjeama cuana aquianajo jjashahuabaquiani tii tii. Eyacuiñajjiyo jjashahuabaqui ajja. E'e jojo nei esejaya Chii eyajo ani miquianajaya aquianajo, eba'ejjiyo jjashahuabaquiani. Ojaya eba ojjaña, de. Jamajjeya ohuaya miya jaahuana cani. <sup>31</sup> ¡A'a pea cuana jayojja pojji! ¡jjashahuabaquicue oe Eyacuiñajjiyo! ¡Onijje oe jjapee tiitiiquicue! ¡Ojaya esohuijo jjasha-

jja'ajja tiitiiquicue! Jamaya jjashahuabaquianijo ohuaya miquiana huasijje aquiana eba'e meejji quia caje'yo —jamaya Jesosa cua.

*Jesosaa eseya ojo chacochaco ani quijke eyajo quea huiso sosequia caje'yo*

(Mateo 6.19-21)

<sup>32</sup> —E'e ecuea epeejji cuana, ja'a quea mete pojji Eyacuiñajji nijje jjapeequi majje! Ohuaya miquianaya quea bihui po mee caje. Ohuaya miquianaya ba'e tiitii mee caje'yo eyajo. <sup>33</sup> ¡Quiacue miquianaaya aquiana aema' cuana huasijje! Miquianaaya quia jjima ajje miquianajaya aquiana sii ca chana'; nojjo ca'yo majje huiñaje'yo. ijjeya Eyacuiñajji jo chacochaco neineicue! E'e jojo nei ohuaya quijke miquianaya sosequia caje'yo quea huiso nee nee eyajo. Miquianajaya esijiji pojjeama, miquianajaya epo'yo tii tii. <sup>34</sup> E'e jojo nei miquianajaya aquiana equijo jaahuanaña, jamatii jjashahuabaquiani miquianajaya equijo. Miquianajaya aquiana ca ca eyajo jaahuanaña, jamatii jjashahuabaquiani eyajo eba'e'yojjijo —jamaya Jesosa cua.

*jAcua epo oe anicue!*

<sup>35-36</sup> Jesosaa jama huohuime aca cua ba'a: — Shajja'ajjacue jiquio esohui ehuohui'yojo: Oe emeshi mese poquinaje cuiñajji yasijje. Ojo chacochacoani cuaa emeshi mese ishoa'ajja canaje. Echacojjija ba jjima ache shono shai ojaya emeshi mese cueje o'oya. Jamajjeya daqui bame huoshu canaje, cuaquijiji jijinequinaje pea'ai. Cahui jjima cuanaje ishoa'ishoanequi jjejojo. Emeshi mese cue'yajo, ojo chacochacoani cuaa dobiqui

mee ca'yonaje ojaya equi yasijke. Emeshi mese quea bihui cuanaje ohua ishoa'ajja ca'aninaje jjejojo. <sup>37</sup> Jamajjeya ojjaña ojee anioquenaje e'ijjia'ijjiajji. Majoya aje ojee ijjia'ijjia majje ojaya echacojji cuana quea bihui nee nee cuanaje. <sup>38</sup> Jamaya oya cuana quea bame cuanaje ishoa'ajja neinei canequinajejo. Mecajje, mecashono, epo-jjajo pea'ai ishoa'ajja canequinaje, de. ¡Jamaya miquianaya pocue! ¡Ejo jja'ishoa'ajjaqui anicue! <sup>39</sup> E'e, jiquio jama cuaje ba'a: Equi meseya siipojjiache shono cueje poso acani. Ojaya eba jojjemo, ohuaya ishoa'ajja ca anime equi jaahuanajjiya. <sup>40</sup> Eya miquianajaya Edoe Mese, ¿ache nei eshequi nequijo eya miquiana que cueje o'oya ebajo ese? ¡Jamajjeya jja'ishoa'ajjaqui anicue! —jamaya Jesosa cua.

*Ojo chacochacoani quea bame nee nee cua  
(Mateo 24.45-51)*

<sup>41</sup> Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjañaja ebajji pojja'a ca coma.

<sup>42</sup> Jesosa jama cua ba'a: —Eyaya huohuinaje jiquio esohui onaa shajja'ajja caje huiso tija ejjashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasijke. Poqui jjimahuua ojo chacochacoani huohui cuanaje pea ojaya echacojji bobiajji. Ojo chacochacoaniya emeshi meseja sohui shajja'ajja nei canaje. <sup>43-44</sup> Emeshi mese cue'yo majje quea bihui cuanaje ojo chacochacoani quea bame nee nee chacochaconajejojo. Jamajjeya emeshi meseya oya jama huohuime acanaje ba'a: “¡Miyaya jjeya ojjaña ecuea aquiana cuana jaahuacue, miyaya

ecuea esohui shajja'ajja neineinajejojo!" Jamajjeya ojo chacochacoani quea bihui cuanaje.<sup>45</sup> Pea ojo chacochacoani jjashahuabaqui jjima cuanaje. Jama jjashahuaba taiquime cuanaje ba'a: "Ecuea emeshi mese quijje nei cueje'yo, jamajjeya eya pea echacojji cuana huasijje bobi quia sa po ajja. Poquije ca iña ishi'ishiya". Majoya oya ojaya pea echacojji cuana nijje jjacuia majamajaqui nequinaje, huoo majamajanequi jjejojo. Oya cha-cochaco jjima cuanaje.<sup>46</sup> Majoya aje oe ojaya emeshi mese cue'yonaje. Emeshi meseya ba caña'yonaje ojo chacochacoani ehuoojaa. Majoya aje quea quene nee nee poña'yo majje que-cua caña'yonaje shajjama'jojo. Ohuaya jeajea canaje quea huesha. Jamaya Eyacuiñajjiya oj-jaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

<sup>47</sup> —E'e de, echacomeejji eba emeshi meseja esohui, oya ca ca shajjama' nei nei cuanaje. Jamajjeya aje oe emeshi meseya echacomeejji cuia caña'yonaje.<sup>48</sup> Pea echacomeejji ca ca ba jjima nei emeshi meseja esohui cuanaje. Jamajjeya emeshi meseya echacomeejji oe pojji cuia meeme acanaje oja ba jjimajojo. Jamaya Eyacuiñajjiya esohui eba nei nei epo cajjashajja'ajjaquiahua ojaya epeejji nei nei epojji. Shajjama' jojoya ca Eyacuiñajjiya cuaqui yasijje jeajea caje'yo —jamaya aca cua Jesosaa.

*Beca cuana Jesosaja epeeiji nei cuaje beca cuaa  
ca ca cajaa acaje  
(Mateo 10.34-36)*

<sup>49</sup> Jamaya Jesosa cua ba'a: —Eya cueyanaje ojjaña nijje jjapeequiya, beca cuana jjapeequije enijje, beca cuana ca ca enijje ejjapeequijji pojjeama. Jama huoojeameya eya acanaje Eyacuiñajjiya. <sup>50</sup> Eya quea nee nee cuaje'yo, mano mee caje'yo cuaa. Eya manocuaji'yo sa cuani ojjañaja mimishi cuana cuijea'yojji sosejje. Quea camaja eya cuaje'yo, de. Mano'yo majje ca eya camaja'ama cuaje'yo. <sup>51</sup> ¡A'a jjashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeejji cuana nijje. <sup>52</sup> E'e, jamaya cuaje. Oe equijo ba'e beca cuana ecuea epeejji nei, beca cuana ca ca ecuea epeejji pojjeama, Eyacuiñajjiya epeejji nijje ba'e sa po ajja oya. <sup>53</sup> Ebacua ejja esohui ba epo ejeajji nijje ba'e sa po ajja ohua quea mimishi e'aca cuani jjejojo. Enaeseya oja bacua piona tecuea cani, ecuea epeejjiyojo. Jamajjeya oja bacua piona onijke ba'e sa po ajja. Yano mese osecuajana nijje mimijajiani o esohui ba epo jojoya. Jamajjeya osecuajana onijke ba'e sa po ajja. E'e, jamaya miquianajaya equijo cuaje —jamaya Jesosaa aca cua.

*Ojjañaja eba ena cuaje jamatii Jesosa ba jjima cua*  
*(Mateo 16.1-4)*

<sup>54</sup> Majoya Jesosa jama cua ba'a: —Mecajjeahua quea ichi nee nequijo, miquianaya jama cuani ba'a: “E'e de, quea ichi nequi, ena cuaje, de”. E'e jojo nei ena cuani. <sup>55</sup> E'e de, jamaya pea'ai miquianaya cuani ba'a: “E'e de, eeno jjayejjequiajo quiyo dobi'yani”. E'e jojo nei quiyo dobi'yani. <sup>56</sup> Miquianajaya

eba ena cuanijo, quiyo dobi yanijo pea'ai. Jamatii beshahua nei miquianaya ca jja ca oe jjashahuabaqui jjima e cueyanajejo. ¡Miquianaya jja oe jjashahuabaquicue Eyacuiñajjija esohuijo! Jamajjeya eya miquianaaya baje —jamaya Jesosa cua.

*Pea esohui ejjashahuabaqui ja'ajjijo  
(Mateo 5.25-26)*

<sup>57</sup> —¿A'a miquianajaya eba quea bame eba'ejji? E'e pojja'a, jamajjeya jjashahuabaquicue jiquio esohuijo jama ba'a: <sup>58</sup> Miquiana nijje oe dejja quea quene nee nee cuajo miquianajaya aquiana sosequia jjimajojo, ohuaya miquianaya dojo caje sohuinano huasijke. Jamajjeya ¡dojo jjimahuaa aquiana miquianaaya sosequia'yocue! Miquiaa mi sosequia'yajje ohuaya miquianaya dojo caje sohuinano huasijke ejeadobia meeiji. Majoya miquianaya sohuinano hua jeadobia caje. <sup>59</sup> E'e jojo nei ejeadobia tii jaaje. Ejeacuaya'yojji pojjeama miquiaa mi sosequiajje. Miquianaya sosequiajyeyo'yajje ca mi ca oe jeacuaya caje'yo. ¡Jiquio jayojjaya oe pocue! Jamajjeya ijjeya Eyacuiñajjija nijje jjapeequicue miquianaya mano'yo jjimahua, cuaqui yasijje jea jjimahua pea'ai! Jamajjeya miya cuaqui yasijje ejeadobiajji pojjeama —jamaya Jesosa cua.

## 13

*ijjapeequicue Eyacuiñajji nijje!*

<sup>1</sup> Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, jjeya nei Pinatohua, emeshi meseya Jodio dejja cuana quecu mee ca'yonaje. Ma dejja cuana Janinea

meshijo ba'e poquinaje Jenosanena huasijje Eyacuiñajji bihuiaa. Eyacuiñajji equi yasijje dobiqui majje ijjiacajji ehuone' cuana quecua canaje edahuajji. Eyacuiñajji equijo nequi sohuinano cuaa dobiqui majje quecuajea ca'yonaje. Hua canaje equecua'yo cuanaja ena' ijjiacajji enajo, de. Quea mimishi nee cuanaje emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

<sup>2</sup> Jesosa jama cua ba'a: —Chojja, de. Miquianaya jjashahuaba taiquiani. Jodio dejja cuana quea mimishi cuani quecua'yo jjima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? <sup>3</sup> Jamajjeya miquianaya mano'yo majje pea'ai Eyacuiñajji nijje jjapeequi jjima jjejojo cuaqui yasijje poquije'yo. <sup>4</sup> E'e, Sinoe cuiñajji pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajajaequi'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea mimishi nee neejo mano'yonaje poso aña? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjima. <sup>5</sup> Eyaya huohuije o'oya, miquianaya Eyacuiñajji nijje jjapeequi jjima po majje cuaqui yasijje poquije'yo, de —jamaya Jesosa cua.

### *Esohui acui jjajjama' cuajo*

<sup>6</sup> Jesosaa jiquio ehuohui'yo jama huohuime aca cua ba'a: —Oe dejja acuijjajja banajji epo po-

quinaje que yasijke. Acui tii majje jjajjama' cuanaje, de. <sup>7</sup> Ma dejja ojaya echacojji jama huohuime acanaje ba'a: "De, pea beca peejiima shequiajame ca cuanaje ma acui. Jjajja ajja cuanaje. ijajaja'yocue; pea acui bana'yocue!" <sup>8</sup> Ojaya echacojjiya jama huohuime acanaje ba'a: "Emeshi mese, jishoa'ajjacue oe eshequiajame! Eyaya jaahuana neineije so'o. Meshi tio majje ana'ajja see meshi tejjee huanaje so'o. <sup>9</sup> Acui eya jaahuana neineiajje quea jjajja huiso nee nee cuaje pojja'a. Jjajjama' po o'oyajo oe cajajaja'yahua" jamaya ojaya echacojji cuanaje –jamaya Jesosa cua—. E'e, ma acui jjajjama' jayojja oe dejja jjapeequi jjima Eyacuiñaggi nijje. Ma echacojjiya jjajja meesahua cani jama jayojja eyaya aña, dejja cuana jjapeequi meesahuaña Eyacuiñaggi nijje –jamaya Jesosa cua.

*Jesosaa oe epona mo'aa jjapiqui meequi ca'ya cua*

<sup>10</sup> Ejomishocajji pojajo Jesosa poquia cua Jodioja ejjachichaquijji equi yasijke esohui huohuiya. <sup>11</sup> Oe epona mo'aa ania cua jomajo. Edosiquianaja jjamo'aaqui mee'yo cua yahuajo. Quea huiso nee nee, 18 eshequiajame epona ejjamo'aaqui'yo ania cua. <sup>12</sup> Jesosaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yo.

<sup>13</sup> Majoya Jesosa que cueajo Jesosaa emeya napa cajje epi nei nequi'ya cua. Ma eponaa Eyacuiñaggi bihuia ca cua. <sup>14</sup> Jesosaa ma epona jjadaasapi meequi ca'ya cua ejomishocajji pojajo. Majoya aje Jodioja ejjachichaquijji equi jaahuanajji Jesosa nijje quenequenea cua. Dejja cuana jama

huohuime aca cua ba'a: —Me oejje oe cahuime echacojji yani. ¡Ma pojja cuanajo cuecue ejja-jaqui'yojji! ¡A'a ejomishocajji pojjajo Jesosaja jjaa-jaqui mee'yohua cuejji!

<sup>15</sup> Jesosaa ma esohui shajja'ajja majje jama tecueame aca cua ba'a: —Chojja, ja'a jamaya mimijji! Miquianaya jama cuanaje ba'a: “¡A'a chacojji ejomishocajji pojjajo!” Miquianaya ca ca jiquio pojjajo chacochacoqui. Miquea ana'ai ejomishocajji pojjajo ijjia'ijjia mee añña. Miyaya miquea ana'ai ejeyo nequi pichojeañña ena ishi meequijji. <sup>16</sup> E'e, jiquio epona mi jayojja, oe Jodio epona. Quea huiso nee nee, 18 eshequiajame Edosiquianaa jjamo'aaqui mee ca'ya cua, de. ¿Yajjajo acuaeya mi cuayajea mee'ajjaqui'yaña so'o ejomishocajji pojjajo? ¿A'a mi o jjapiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

<sup>17</sup> Jesosaja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesosa nijje, ma epona jjapiqui mee ca'yajo. E'e de, Eyacuiñajjiya Jesosa quea sohui poja po mee ca'ya cua.

*Esohui acui so' che biso neijo motasa sojo  
(Mateo 13.31-32; Macoso 4.30-32)*

<sup>18</sup> Majoya Jesosaa jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quijje ca ca Eyacuiñajji ojjañaja Emeshi Mese nei cuaje, oya quea epeejji huiso cuaje. <sup>19</sup> E'e, oe motasa so' biso nei tii majje acui quea quemodo jayojja cuani, huapeje cui quemajja. Cuichojji motasa acuijo jaani. Ma eso' biso nei jayojjaya

Eyacuiñajjija epeejji cuani oe pojji jayojjaya cuani ebionei. Majoya quea huiso nee nee ojaya epeejji cuaje motasa acui jayojjaya —jamaya Jesosa cua.

*Esohui ehuohui'yojji pahui shejjee meejjijo  
(Mateo 13.33)*

**20-21** Pea esohui ehuohui'yo Jesosaa jama huohuime aca cua ba'a: —Eyacuiñajji ojjañaja Emeshi Mese nei cuaje pahui shejjee yani jayojjaya. Jamaya oe epona pahui dahuajje cuanaje. Oe pojji nei eshejjee meejjji iya canaje. Majoya aje ohuaya jeahuahuo canaje quea huiso pohuipohui pahui yajji. Majoya aje ojjaña shejjee'yonaje pohuipo-hui. Majoya aje quea huiso pahui cuanaje. Jamaya Eyacuiñajjija epeejji pahui shejjee meejjji jayojjaya cuani. Ebionei oe pojji epeejji cuana cuani, majoya aje pea cuana jjashahuabaqui mee cani Eyacuiñajjija epeejji epojji. Quea huiso nee nee po mee cani —jamaya Jesosa cua.

*Esohui ehuohui'yojji esecuejjani biso neijo  
(Mateo 7.13-14, 21-23)*

**22** Majoya aje Jenosanena huasijje poquije, Jesosa pea cuiñajji cuana huasijje dobiqui poquia cua sohui huohuiya. **23** Jesosa aniñaqui jjimahuajo pea cuiñajjijo ba'eya oya jama huohui'ajjame aca cua ba'a: —¿A'a oe pojji Eyacuiñajjija epeejji cuana poquije'yo eyahuasijje onijje ba'e'yohua?

Jesosa aje majoya jama cua ba'a: **24** —E'e de, yani oe esecuejjani biso nei edobiquijji eyahuasijje. Joya jjapeequi sa cuani enijje ma esecuejjani biso neijje dobiqui majje poquije eyahuasijje. Beca cuana ca ca poqui ajja eyahuasijje, enijje jjapeequi ajja jjejojo. **25** E'e, eya oe equi mese

jayojja. Equi meseya esecuejjani ca'a ca'yonaje, beca cuana edobiqui cuajejje. Majoya esecuejo tii nequijeaje. Oya cuana jama po'ajja nequinaje ba'a: "Equi mese, ¡ca'apejocue ecuana edobiquijji!" Equi mese jama cuanaje ba'a: "Chojja, ecuea miquianaya ba jjima, de".<sup>26</sup> Majoya oya cuana jama po'ajja nequinaje ba'a: "De, ecuanajaya miya eba, minijke ijija'ijjianaje. Miyaya esohui huohuinaje ecuanaja meshijo".<sup>27</sup> Majoya aje oya jama cuanaje ba'a: "Chojja, ecuea miquianaya ba jjima. ¡Poquicue quea huesha, quea mimishi nee nee mi ca cuanaje! Miquianaya ecuea epjeejji cuana pojjeamajojo, dobiqui mee jjima aña".

<sup>28</sup> E'e de, miquianaya ma dejja cuana esecuejo nequi tii tii jayojja cuani. Miquianaya dobiqui sajo pa neineije'yo; miquianaya quea yeno nee nee cuaje'yo. Jamaya aje nequiana esecuejo nequi cuaje ba'a: "Ecuea etiiquiana ca dobiquia cua, e'e jojo nei oya cuana Eyacuiñajji epeejji cua. Oya bajjani cua ba'a: Amajama, Isaaca, Jacobo, Eyacuiñajji esohui huohuijji nei cuana pea'ai. Jjeya Eyacuiñajji nijje nequi. Ecuana capoqui'yahua eyahuasijje". Cho, miquianaya poqui ajja; quea yeno nee nee cuaje'yo. Shajja'ajja sa po ajja cuanaje ecuea esohui, Eyacuiñajji esohui pea'ai. <sup>29</sup> Ojjaña dejja joya enijke jjapeequi jjima dobiqui ajja tii eyahuasijje. Ojjaña meshijo ba'e Eyacuiñajji nijje jjapeequiani eyahuasijje poquije'yo. Jomajo onijje ijija'ijjiaje quea bihui epoji. <sup>30</sup> E'e, jjashahuabaquicue jiquio esohuijo jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Joya jjeya ona huoojea'yojji pojjeama ca ca eyajo ona

huoojea'yojji nei nei cuaje'yo e jayojja —jamaya Jesosa cua.

*Jesosa quea yeno cua Jenosanenajo ba'eca cuanajo*

(Mateo 23.37-39)

<sup>31</sup> Majoya aje Paniseo dejja cuana Jesosa que cueya cua onijje mimiya. Majoya aje oya cuana jama cua ba'a: —¡Poquicuajicue oe, miya emeshi meseya, Enodeya, quecua sa acani!

<sup>32</sup> Majoya aje Jesosaa jama aca cua ba'a: —Cho, ¡miquianaya jja ca oe poquicuajicue emeshi mese yasijke, Énode yasijke; oya dejja quea mase nee nee! Jjeya jiquio pojjajo, mecahuajje pea'ai eyaya eshahua quea mase cuayaqui mee'yaña, emano cuana jaa jjaajaqui mee'yaña. Ma mecahuajje acua cuaje'yo ecuea echacojji; jamaya Enode aquicue! <sup>33</sup> E'e jjeya ca iña poquije'yo Jenosanena huasijke. Jomajo eya manoje'yo ma ecua Eyacuiñajji esohui huohuijji cuana mano ca'ya cua huasijkey.

<sup>34</sup> Majoya Jesosa quea yeno nee nee cua Jenosanenajo ba'e cuanajo. Oya jama cua ba'a: —Jodio cuana Jenosanenajo ba'e, miquianaya ecuea quea jea nee nee. Jamajjeya eya miquianajo quea yeno cuani. E'e, miquianaaya aje oe Eyacuiñajji esohui huohuijji quecua'ya cua; ojaya ehoojea'yo cuana jajahuejjajea'ya cua meiya pea'ai. ¡Bacue! Oe cachina enaeseya ebacua ejaaahuanajji huojje cani. Jama jayojjaya eyaya miquianaya iyaa sa neineiaña e que ejaaahuanajji. Jamatii miquianaya enijje jjapeequi sa po ajja. <sup>35</sup> Jamajjeya eya quea yeno nee nee

miquianajo cuani. Miquianaaya Eyacuiñajji eya pe'a'i cajaa anaje. Jamajjeya ohuaya jaahuana aija miquianajaya cuiñajji Jenosanena. Jamatii miquianaaya nei jaahuanaje; ba'ajja, quea camaja cuaje. Miquianaaya eya cajaa anaje, jamajjeya eba beca'yojji pojjeama mo nequianajaya. Miquiaaya eya cue o'oyajo jama aje ba'a: "Miya Eyacuiñajjiya huoojea'yo ojjaña jaahuanajji. Eyacuiñajjiya miya cajaahuana cahua quea bame" jamaya miquianaya cuaje quijje —jamaya Jesosa cua Jenosanenajo ba'e cuana nijje.

## 14

*Jesosaa oe dejja eshejjee tii tii nequi shacuashacua mee ca'ya cua*

<sup>1</sup> Oe ejomishocajji pojjajo Paniseo dejja etiiya Jesosa iyaa ca cua ijjia'ijjiaa. Jamajjeya Jesosa poquia cua oja equi yasijke. Pea Paniseo dejja cuana Moisesija etehue'yo huohuijji cuana pe'a'i poquia cua oja equi yasijke ijjia'ijjiaa. Oya cuana Jesosajo jama jjashahuuba taiquime cua ba'a: —Jesosaa pojja'a oe jjaajaqui mee caje'yo ejomishocajji pojjajo; ba'ajja.

<sup>2</sup> Jesosa pejjejo oe dejja quea mano nee, eshejjee tii tii nequia cua. <sup>3</sup> Jesosaa oya cuana jama huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojjajo? E'e pojja'a, chojja pojja'a. ¿A'ya acuae miquianaya jjashahuubaquiani so'o?

<sup>4</sup> Oya cuana mimi jjima nequia cua Jesosa bahuejjajji nisho. Majoya aje Jesosaa ma dejja eshejjee tii nequi napa ca cua emeya. Ma dejja

shacuashacula mee ca'ya cua. Jesosaa oya jama huohuime aca cua ba'a: —¡Poquicue miquea equi yasijke!

<sup>5</sup> Majoya Jesosaa Paniseo dejja cuana jama huohuime aca cua ba'a: —Miquianaya chacochacoani ejomishocajji pojjajo. Bacue miquea ebacula, ana'ai pojja'a ejomishocajji pojjajo jjani quea doe yasijke oquequiajo, miquianaya jjequisohuaje'yo. Jamaya miya chacochacoani ¿a'a e'e? E'e jojo nei. Jama jayojjaya shacuashacula mee'yomeya eyaya anaje —jamaya Jesosa cua.

<sup>6</sup> Paniseo dejja cuana jjashahuabaquiequi jje-jojo, mimi jjima nequia cua.

### *E'ijjia'ijjiajji equi yasijke iyaa ca cua*

<sup>7</sup> Majoya Jesosaa Paniseo dejja cuana nijje ijji'a'ijjiaa cueaniya ba ca cua Paniseo dejja cuana e'aniji bame bame sa'ajja cuequi. Ba majje jama huohuime aca cua ba'a: <sup>8</sup>—Oe equi meseya miquianaya pojja'a iyaa caje ijji'a'ijjiaa. ¡A'a e'aniji quea bame sa'ajjajji! <sup>9</sup> Equi meseja epeejji nei cueje, ca'ani'yahua ma e'aniji bame bamejo o pejjejo. Jamaya miquianaya nijje mimije ba'a: “¡Nequisohuacue miya; poquicue pea e'aniji yasijke! Ecuea epeejji ca jiquiojo ca'ani'yahua”. Quijjeyejjenei nequi e'anijjijo anioque'yo majje quea bicho miya cuaje ojjañaa ba caje'yo jjejojo. <sup>10</sup> E'e de, jamajjeya miquianaya iyaa cajje ijji'a'ijjiaa, janioquecue pea cuana nijje quijjeyejjenei nequi e'anijjijo! Majoya ma equi mese cueje mi que pojja'a, jama huohuime acaje ba'a: “¡Miya cuecue e'aniji bame yasijke e pejjejo!” Majoya pea

cuaa ba caje miya anijji bamejo ani. Jamajjeya miquianaya quea bihui nee cuaje. <sup>11</sup> Jamaya cuaje miquianaya. Eyacuiñajjija eba ojjaña jama cuani. Miquianaya jama jjashahuaba taiquime cuani ba'a: “Eya che oe ese ejja quea bame nee nee cuani”. Cho, Eyacuiñajjija eba miya. Miquianaya jja oe jjashahuaba bamebamequicue jama ba'a: “Eya ca iña pea cuana ba'e meesahua sa cuani oya cuana quea bame epoji”. Majoya aje Eyacuiñajjija miquianaya quea bame ba'e meesahua caje. Majoya miquianaya dejja quea bame nee nee cuaje –jamaya Jesosa cua.

<sup>12</sup> Majoya Jesosaa Paniseo dejja etii jama huohuime aca cua ba'a: –Jamatii miquea bobo quea huiso anijo, miquea huapa pojjeama, miquea epeejji nei pea'ai miyaya iyaaña ijja'ijjiaa. <sup>13</sup> Jamajjeya miya ohuaya iyaa caje esosejjeya. ¡A'a jama amajamajajji! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobo ijjaaa pea'ai! <sup>14</sup> Ohuaya nequiana ca ca sosequia jjima miya acaje. Majoya miyaya ma jayojja ajo Eyacuiñajjija miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajjija miya eyajo sosequia caje'yo quea huiso nee –jamaya aca cua Jesosaa.

*Esohui ehuohui'yo ojee e'ijja'ijjiajjijo  
(Mateo 22.1-10)*

<sup>15</sup> Oe dejjaas Jesosaja esohui shajja'ajja majje Jesosa jama huohuime aca cua ba'a: –Ojjaña quea bihui cuaje eyajo ojee ijja'ijjiani Eyacuiñajji nijje oja epeejji cuana nijje pea'ai.

<sup>16</sup> Jesosaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui ehuohui'yojo ca jama jjashahuabaquime pocue ba'a: Oe emeshi meseja bobi quea huiso aninaje. Iyaa canaje dejja cuana quea huiso nee nee. <sup>17</sup> Bobi acua cuajo, huoojea canaje ojaya echacojji ona iyaaa. Iyaa canaje ojaya epeejji cuana. <sup>18</sup> Oe epeejji jama cuanaje ba'a: “De, eya poqui sa po ajja, jjeya jjeshenaje meshi, eya poquije ca iña meshi baa”. <sup>19</sup> Pea epeejji jama cuanaje ba'a: “De, eya poqui sa po ajja pea'ai, eyaya jjeshenaje me oekiye huisome ana'ai acuijo she'anayijaca. Poquije ca iña ana'ai jaahuanaa”. <sup>20</sup> Pea epeejji jama cuanaje ba'a: “De, poqui sa po ajja ca iña; oya ca iña jjeya nei jjahuanaquiaña”. <sup>21</sup> Echacojjiya oja meshi mese yasijje cue'yo majje huohui canaje ojjañaja esohui ma cue ajja cuanaje cuanaja. Majoya emeshi mese huohui cajje quea quene nee cuanaje. Huoojea ca o'oyanaje ojaya echacojji pea iyaaa. Jama cuanaje ba'a: “¡Jjequicue jjeyahua nei pea cuana! ¡Iyaaquicue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijjiaa”. <sup>22</sup> Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: “Emeshi mese, eyaya pea cuana jjequinaje, e'anijji cuiñajeyo jjima cuanaje. Quea dejja huiro cue jjima, de”. <sup>23</sup> Jamajjeya emeshi mese jama cuanaje o'oya ba'a: “¡Poqui o'oyacue quea huesha nee nee; pea cuana ba'e yasijje iyaaquicue! ¡Cue meecue pea cuana: “Ecuea e'anijji cuiñajeyo jjima” acue! Ecuea equi cuio mee

sa aña dejja. <sup>24</sup> Ecue epeejji cuana ca ca eyaya ebionei iyaa'ajjanaje, jamatii enijje ij{jia'ij{jia jjima cuani" jamaya cuanaje emeshi mese —jamaya aca cua Jesosaa. Jamaya Eyacuiñajjiya dejja cuana quea huiso nee nee iyaa'ajja cani, jamatii oe pojji poquiani onijje ij{jia'ij{jiaa.

*Quea camaja Jesosaja epeejji epojji  
(Mateo 10.37-38)*

<sup>25</sup> Ojjañaa Jesosa equijje aca poquia cua. Majoya Jesosa jjabajeaqui'ya cua. Ohuaya jama huohuime aca cua ba'a: <sup>26</sup> —¡Miquianaya enijje jjapee neineiqui sa cuani, eya oe quea jea nee nee acue! ¡Miquea huapa pojjeama oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue! <sup>27</sup> Miquianaya enijje jjapeequiajo pea cuana miquiana nijje mimijajije. E'e, jiquio ecua acui ecueata'apee quea camaja e'abojji jama jayojja enijje jjapeequiajo quea camaja cuaje. E'e de, pea cuaa miquianaya cuia sa acaje, quecua sa acaje pojja'a enijje jjapeepajeaqui'yo ajjajojo. Miquianaya ecuea epeejji nei po tiitiianijo jama-jjeya e'e jojo nei miquianaya ecuea epeejji nei nei cuani. <sup>28</sup> ¡Ejo jjashahuaba neineiquicue enijje jjapeequi jjimahua, quea camaja epo cuahua-jje! Miya quea nee, quea yeno pojja'a cuaje enijje jjapeequi majje. E'e jojo nei oe dejja equi iya jjimahuajo jjashahuabaquiani ma equi e'iyajji nishojo. <sup>29</sup> Majoya ohuaya cajaa acanaje mi iya majje. Beca cuaa niñeba canaje jama ba'a: <sup>30</sup> "E'e de, ma dejja iya'ajja canaje, jjashahuaba

neineiqui jjima jjejojo mi iyajeyo canaje". E'e, jamaya enijje jjapeequi jjimahuajo ijashahuaba neineiquicue ejjapee tiitiquipiji enijje!

<sup>31</sup> —E'e de, oe emeshi meseya pea emeshi mese nijje jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinanojo jjaquecuaqui mee jjimahua jjashahuaba neinequinaje.

<sup>32</sup> Oya jama cuanaje ba'a: "De, quea camaja, ecuea oe pojji sohuinano yani". Jamajjeya emeshi meseya pea emeshi mese yasijke oe sohuinano huohui pohua huoojea canaje jjaquecuaqui mee sa po ajaa jjejojo. Onijje jjapeequi sa cuanaje.

<sup>33</sup> E'e, jamaya miquianaya jjapeequi sa cuani enijje pojja'a. ijashahuaba neineiquicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

*Ehuohui'yo sanejo  
(Mateo 5.13; Macoso 9.50)*

<sup>34</sup> Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. <sup>35</sup> ¿Achacua jeajea cajji? Quea huesha nee nee. E'e, quea huesha jea jjima ca ca meshi quea tai sane tejjee cuaje, saneya acui tii mee jjima acaje. Jamaya miquianaya enijje jjapeequiani, majoya jjapeepajeaquije'yo pojja'a. Miquianaaya eya pajea'yo majje eyaya miquianaya jeajeaje'yo quea huesha nee nee sane

jayojjaya. Jamajjeya ijashahuaba neineiquicue eni-jje jjapeequi jjimahua! —jamaya Jesosaa aca cua.

## 15

*Ehuohui'yo ñajjajja epoquiquehua ba'yojjiyo  
(Mateo 18.10-14)*

<sup>1</sup> Dejja cuana emeshi meseja bejjo jjeshejji cuani poquia cua Jesosa que oja esohui shajja'ajja. Oya cuana jamatii quea mimishi nee nee cua. Pea dejja cuana quea mimishi nee nee poqui pea'aiya cua Jesosaja esohui shajja'ajja. <sup>2</sup> Paniseo dejja cuana, Moisesija etehue'yo huohuijji cuana jjaniñebaqui aña cua pea cuana nijje jama Jesosajo po aña cua ba'a: —De, Jesosa jjapeequiani dejja quea mimishi nee nee cuana nijje, ijjia'ijjia ani ona nijje, de.

<sup>3</sup> Ma esohui shajja'ajja majje Jesosaa esohui ej-jashabaqui meeiji jama aca cua ba'a: <sup>4</sup> —Oe dejja yarinaje, ojaya ñajjajja cuana quea huiso nee, 100 huisome. Oe ñajjajja poquiquehuana. Dejja poquinaje ñajjajja sa'ajja'yohua. Pea ñajjajja 99 huisome ojee ijji'liji aqui jea cananana. Sa'ajja neinei ca'yoquinaje, de. <sup>5</sup> Majoya aje ba'yo majje abo ca'yonaje. Abo majje dojo ca'yonaje o nequijji yasijke, quea jaji nee nee po'yonaje. <sup>6</sup> Ñajjajja meseya ojaya epeejji jama huohuime acanaje ba'a: “Ba'yonaje eyaya ecuea oe ñajjajja, de. Jjeya nei enequi'yo, e'e de, jjeya eseya quea bihui epo'yo”.

<sup>7</sup> —E'e, ñajjajja epoquiquehua oe dejja quea mimishi nee nee jama jayojja cuani. Eyacuiñajji ma ñajjajja mese jayojja cuani. Jamatii Eyacuiñajjiya dejja mimishi cuana sa cani ojaya

epeejji epoiji. Ohuaya dojo sa cuani ma dejja eyahuasijje. Eyacuiñajji quea bihui cuaje oe dejja mimishiya ojaya mimishi pajea ca'yajo, Eyacuiñajji nijje jjapeequiajo. Ojjaña eyajo ba'eca cuana quea bihui cuaje'yo ma dejja mimishi Eyacuiñajji nijje jjapeequiajo —jamaya Jesosa cua.

*Esohui ehuohui'yo eponaa bejjo ba ca'ya cuajo*

<sup>8</sup> Jesosaa pea esohui jama huohuime aca cua ba'a: —Oe eponaja bejjo ome miji pea'ai aninaje. Oe bejjo oquequehuajequinaje meshi yasijje equi yiyyedojjojo tiiya. Jamatii sa'ajja neinei ca'yoquinaje eponaa. Cuaquijijiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. <sup>9</sup> Majoya aje quea bihui po'yonaje bejjo ba majje ojaya epeejji cuana huohui ca'yonaje jama ba'a: “E'e ee, eseaya jjeya quea bihui epo'yo. Eyaya ba'yonaje bejjo ma oquequehuajequi cuanaje” epona cuanaje. <sup>10</sup> E'e, ma bejjo oe dejja jayojja cuani. Oya quea mimishi nee nee jjapeequi sa cuani Eyacuiñajji nijje; ojaya mimishi pajea'yo sa cuani. Jiquio ecua epona bejjo ba majje quea bihui nee nee cuani jayojja Eyacuiñajji quea bihui cuani dejja mimishi onijje jjapeequiajo. Eyacuiñajji esohuidojoji cuana eyajo ba'e quea bihui nee nee cuaje oe dejja Eyacuiñajji nijje jjapeequiajo —jamaya Jesosa cua.

*Esohui ehuohui'yo oja chiiya oja bacua nijje jjabeiqui'ya cuajo*

<sup>11</sup> Pea esohui Jesosaa jama huohuime aca cua ba'a: —Oe emeshi meseja becanejjiji pea'ai

ebacua ejja nequinaje. <sup>12</sup> Ebacua ejja shacuima' nequi epohua oja chii jama huohui'ajjame acanaje ba'a: "Ecue chii, ¡bejjo mo quia'yocue ecuea yajji; miya mano'yo jjimahua oe mo quia'yocue!" Jamajjeya oja chii jama cuanaje ba'a: "E'e ma'aje". Ma echahua mesejame oja iya poquia quia ca'yonaje echahua mese que. <sup>13</sup> Majoya aje quijje pishana echahua meseya ojaya aquiana, meshi pea'ai quia canaje bejjo sosejje. Ma bejjo sosejje poquinaje pea meshi yasijje quea huesha nee nee. Jomajo quea mimishi nee nee ba'enaje, de. Ohuaya bejjo quia jeyojeyo ca'yonaje huoo majamajajjiya jjejojo. <sup>14</sup> Chama'yo tii ojaya bejjo po'yonaje, quea shoe nee nee po'yonaje pea'ai. Ma meshijo bobi chama'yo tii cuanaje ejjeshejji, de. <sup>15</sup> Ohuaya oe dejjaja echacojji sa'ajja canaje. Oe dejja oya huoojea canaje cuichi nequi yasijje cuichi cuiñajji epojji. Majoya ohuaya cuichi cuiñaqui canaje. Chama'yo tii ojaya bobi po'yonaje, de. <sup>16</sup> Jamajjeya aje cuichija bobi ijija sa cuanaje quea shoe nee nee jjejojo, bobi peaja quia jjima nei nei cuanaje jjejojo.

<sup>17</sup> —Majoya aje jama jjashahuaba neineiqui'yome cuanaje ba'a: "E'e de, ecue chiija echacojji jomajo yani, bobi quea huiso yani jomajo, de. ¿Yajjajje shai eya jiquiojo quea shoe nee nee po'yo ani, de? <sup>18</sup> Eya capoqui'yahua ecue chiija equi yasijke. Eyaya oya jama huohuiñaqui'yome aje ba'a: —Ecue chii, eya quea mimishi cuanaje minijke, Eyacuiñajji nijje pea'ai —eyaya añaquije'yo ecue chii. <sup>19</sup> Ecue chii enijke quea quene cuaje eya quea mimishi cuanajejojo.

Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' pea'ai. Quea yeno nee nee eya cuani ecue mimishijo. E'e de, jjeya nei eya poquije'yo ecue chiija equi yasijje" jamaya jjashahuabaquinaje ma ebacua ejja.

<sup>20</sup> —Majoya aje poqui o'oyanaje oja chiija equi yasijje. Majoya oja chiiya oja bacua ejja ejiojjije quea huesha cueje'yo ba canaje. Jama cuanaje ba'a: "Ecue bacua ejja pojja'a joma cueje'yo". Oya majoya quea jaji nee nee po'yonaje oja bacua ejiojjije cueje'yo ba majje. Majoya aje oja bacua que poquinaje; emeya cuiapashi cajjequi'yonaje; shemo tojjo cajjequi'yonaje quea jeajojo.

<sup>21</sup> —Majoya aje ebacua ejja oja chii jama huohuime acanaje ba'a: "Miya ecue chii nei nei, eya quea mimishi nee nee cuanaje minijje, Eyacuiñajji nijje pea'ai, de. Miyaya pojja'a eya niñebaña, jamajjeya pojja'a eya miquea echacojji capo'yahua miquea ebacua pojjeama jayojja".

<sup>22</sup> —Oja chii jama cuanaje ba'a: "Chojja, miya ecuea ebacua ejja nei, echacojji pojjeama". Oja chiiya echacojji cuana jama huohuime acanaje ba'a: "¡Yecue ecue bacua ejjaja daqui eyacua nei nei, oe emehuao pea'ai, ejiojji shejee pea'aiya oe yecue! <sup>23</sup> ¡Quecuacue oe ana'ai esei esejaya ojee e'ijjiajji! Jjeya eseya ojee ijjia'ijjiaje ecue bacua ejja cue'yonajejo. <sup>24</sup> Eya jjeya quea bihui ecue bacua ejjajo; oya emano'yo jayojja cuanaje, chama'yo tii, jjeya ca cue'yonaje ecue bacua ejja, eshe de. Oya ca ca ecuaquisho'yo cuanaje, jiquio pojjajo ca eyaya ba'yonaje ecue bacua ejja". Majoya aje bobi acua amajje ojjaña ijjia'ijjianaje.

<sup>25</sup> —Edoe mese chacochaco aninaje quejo; oja ba jjima echahua mese cue'yonaje. Quije oya cue'yonaje oja equi yasijje. Shajja'ajja caña'yonaje quea shajjaquijjo cuani ojjaña ijija'ijjiani ojee. <sup>26</sup> Ohuaya oe esho'i huohui'ajja canaje: “¿A'ya acuae po ca ani so'o?” <sup>27</sup> Jama esho'iya acanaje ba'a: “Mique chahua cue'yonaje quea aja nee nee, de. Mique chii quea bihui po'yonaje, de. Jamajjeya ojjaña ijija'ijjia mee cani ojee quea bihui'yohua jjejojo”.

<sup>28</sup> —Majoya aje oja doe quea quene nee nee cuanaje, pea cuana nijje ijija'ijjia sa po ajja cuanaje. Majoya oja chii cuayaquinaje edoe mese jjequidobiaa nisho. Dobiqui ajja cuanaje oja bacua ejja equenequene neinei'yo jjejojo. <sup>29</sup> Majoya edoe mese oja chii nijje miminaje: “Eya chacochaco nei'yonaje ee nei, de. Quea shequiaja huiso nee nee. Eya mimishi'ama nei cuanaje minijje; jamatii eyaya miquea esohui shajja'ajjanaje, de. Miyaya che ecue chivo sho'i cuia jjima anaje ecuea epeeiji nijje ojee e'ijjajji. Miquea quea nahue cuanaje ejo, de. <sup>30</sup> Mique bacua ejja sho'i shajjama' cue'yajo ca jjaya ca oe che ana'ai quecua'yonaje. Oya quea mimishi nee nee cuanaje; pea epona cuana nijje jjacoojjeaqui nequi'yonaje miquea bejjo sosejje, de” jama cuanaje edoe mese.

<sup>31</sup> —Majoya oja chii jama cuanaje ba'a: “Miya ecue bacua ejja quea bame nee, miya eyaya jaahuana neineiaña. Ojjaña aquiana ecuea, miquea epo'yojji. <sup>32</sup> Mique chahua cue'yajo ecuanaya quea bihui po'yonaje. Oya ca ca emano'yo jayojja cuanaje. Oya cue'yonaje jjeya, eshe de. Oya ecuaquisho'yo jayojja cuanaje; jjeya

nei ca ca eyaya oya ba'yonaje" jamaya oja chiiya oja bacua ejja etii acanaje. E'e de, mahuiso – jamaya Jesosa cua. Jamaya Eyacuiñajjiya quea jea ameya acaje dejja mimishi cuaa oja mimishi pajea ca'yajo, onijje jjapeequiajo pea'ai.

## 16

### *Esohui ehuohui'yo echacomeejji jjadasiaquia cuajo*

<sup>1</sup> Jesosaa o shajja'ajjajji cuana jama huohuime aca cua ba'a: —Oe emeshi mese quea bejjo huiso nee aninaje. Ohuaya shajja'ajja canaje ojaya echacomeejjiya sii cani ojaya aquiana. <sup>2</sup> Jamajjeya huohui'ajja canaje ojaya echacomeejji jama ba'a: "Pea cuaa eya huohui canaje miya siipojji cuani. ¿A'a cuae jja miya siipojji nei so'o? ¡Huohui po'ajja socue! Jamajjeya miya ecuea echacomeejji nei pojjema. ¡Yecue ma papenijo etehue'yo jaa ebajjani cuana!"

<sup>3</sup> —Majoya aje echacomeejji jjashahuabaquinaje jama ba'a: "De, chama'yo tii ca ecua echacojji cuaje'yo, ecuea emeshi meseya eya cajaa aca'yonaje, de. Eya jjeya quea aa mano echacochacojji, de. Eya ca iñaeme huo sa po ajja quea bicho jjejojo. <sup>4</sup> E'e de, jjeya nei ca iña jjashahuabaquinaje pea dejja cuanaja sosequia'yo jjimajo. Eyaya oe pojji sosejjesheje'yo. Majoya eya ecuea emeshi meseya huoojea cajo pea cuaa ba'e meesahua caje, enijje quea bihui cuaje. E'e de, eyaya tehueje o'oya ojjaña echacojji cuanaja emeshi mese sosequia jjima; oe pojji aje'yo" jamaya echacomeejji jjashahuabaquinaje. <sup>5</sup> Jamajjeya ohuaya pea

dejja cuana iyaa canaje emimijji, ache huiso onajaya sosequia'yo jjima ebajji. Ohuaya jama huohui'ajjame acanaje ba'a: ¿Ache sose huiso acuae miquea sosequia'yo jjima so'o? <sup>6</sup> Oe dejja jama saja'ame acanaje ba'a: "Ecuea sosequia'yo jjima mahuiso ba'a: ecuea ese 100 natame, quea huiso nee nee eyaya jjeshenaje, de". Majoya echacomeejji jama cuanaje ba'a: "E'e de, e'e jojo nei miquea papeni yani ecue tehue. Jjeya ca ca miquea sosequia'yo jjima nequi 50 natame, jamaya eyaya tehueje o'oya pea papenijo oe pojji esosequia'yojji". <sup>7</sup> Majoya ohuaya pea dejja acanaje jama ba'a: "¿Ache huiso acuae miquea sosequia'yo jjima so'o?" Oya jama cuanaje ba'a: "Quea huiso nee nee, 100 natame anoso ai, de". Echacomeejji jama cuanaje ba'a: "E'e de, jjeya ca ca papenijo tehueje o'oya 80 natame esosequia'yojji" jamaya cuanaje echacomeejji dejja cuana nijje, onijje quea bei epojji.

<sup>8</sup> —E'e de, quijje pishana emeshi meseya ojaya echacomeejji ae po ani shai ba canaje. Ba majje jama cuanaje ba'a: "E'e de, ohuaya eya dasia canaje. Jamatii oya jjashahuaba neineiqui'yonaje. Oya quea epeejji huiso nee nee po sa cuanaje o ba'e meesahuajji epojji". Mahuisoya jiquio esohui —Jesosa cua—. <sup>9</sup> ¡Miquianaya ca ca jjashahuaba neineiquicue quea bame epojji pea cuana nijje! Jamajjeya miya Eyacuiñajjiya ba'e meesahua caje. Majoya miquianaya mano'yajo, ohuaya dobiqui mee caje'yo eyahuasijje eba'e tiitii'yojji.

<sup>10</sup> —Miquianaya jjeya oe pojji aquiana jaahuana neineiaña, miquianaya quea bame po majje quijje eyajo miquianaya quea huiso

jaahuana neineije'yo. Miquianaya oe pojji jjadasiaquiani quijje miquianaya jjadasiaquijji nei nei cuaje. <sup>11</sup> Miquianaya oe pojji aquiana jiquiojo jaahuana jjima aña, Eyacuiñajjiya miquianaya aquiana quia jjima acaje'yo eyajo. <sup>12</sup> E'e de, miquianaya pea cuanaja aquiana jaahuana jjima añajo Eyacuiñajjiya miquianajaya aquiana quia jjima acaje'yo eyajo —jamaya Jesosa cua.

<sup>13</sup> —E'e de, ¡miquianaya jja ca oe Eyacuiñajji jo jjashahuaba majamajaquicue! ¡Oe nei neijo oe jjashahuabaquicue, aquianajo pojjeama! Jamaya oe Eyacuiñajji nijje jjapeequí sa cuanijo, ¡a'a aquianajo jjashahuabaqui majamajajji! —jamaya cua Jesosa.

<sup>14</sup> Paniseo dejja cuana ma esohui shajja'ajja maje mimijajia cua Jesosa nijje bejjo quea huiso sa cuanijo. <sup>15</sup> Jamajjeya aje Jesosaa jama tecueame aca cua ba'a: —Miquianaya jjashahuaba taiquiani miquianaya oe dejjaya quea bame ba'yani poso cuani. Dejja cuaa ca ca oe miquianaya quea bame poso acani. Miquianaaya dejja cuana dasiaña. Miquianaaya ca ca oe Eyacuiñajji dasia jjima aña, ojaya miquianaya eba nei nei, de. Miquianaya jama cuani boti'ama. E'e, joya miquianaaya quea bame poso aña Eyacuiñajjiya boti'ama —jamaya Jesosa cua.

### *Eyacuiñajjiya esohui ma ani tiitii'yome cuaje*

<sup>16</sup> —Yahuajo nei nei Eyacuiñajjiya esohui huohui-jji cuaa huohui ca cua Moisesija etehue'yojo. Jama cua ba'a: “Quijje Eyacuiñajjiya huoojea'yo ojjaña jaahuanajji Emeshi Mese oe nei cueje”. Jjeya nei ca ca Huaniya enajo ona besameejji cuanaje

huohui canaje Eyacuiñajija pea esohui jama ba'a: "Quito ojjañaja Emeshi Mese cueje jjeya nei". Jamajjeya quea huiso nee nee dejja cuana jjapeequi sa cuani Eyacuiñajji nijje. <sup>17</sup> Jamatii Eyacuiñajija esohui e'e jojo nei cuani, quea bame cuani. Quijje ojjaña meshi cuana majameta cuana chama'yo tii cuaje, de. Eyacuiñajija esohui ca ca ma ani tiitii'yome cuaje —jamaya Jesosa cua.

*Esohui ejjahueiquijijiō  
(Mateo 19.1-12; Macoso 10.1-12)*

<sup>18</sup> Jesosaa esohui jama huohuime aca cua ba'a: —Oe dejjaja ehuanase huei cuani pea ehuana'yojjii jamaya pea cojjojji cuani. Oe dejja oe epona ehuei huana'yo majje pea cojjojji cuani pea'ai. Epona yahue hueijji cuani pea cojjojji pea'ai cuani. Jamajjeya dejja cuaa ja'a ehuanase hueijji, eponaaa pea'ai a'a miquea yahue hueijji! —jamaya Jesosa cua.

*Ehuohui'yo oe dejja quea aquiana huiso nee neejo Nasanojo pea'ai*

<sup>19</sup> Jesosaa pea esohui jama huohuime aca cua ba'a: —Oe dejja quea bejjo huiso nee nee cuanaje. Ojaya daqui quea bame nee; quea nahue nee nee oja jjeshe huosho caninaje. Bobi quea huiso aninaje ojaya equijo; ijzia'ijzia majamajanaje. <sup>20</sup> Pea dejja ca aema' cuanaje Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejjani pejjejo aniñaquinequinaje. <sup>21</sup> Jamatii ojaya chiji iñahuehuaa sio canaje. Oya jama po'ajja aninaje ba'a: "¡Chemo bobo quiacue joya miquea ijzia shaa ani!" jamaya Nasano po'ajja aninaje. <sup>22</sup> Nasano

Eyacuiñajjija epeeiji cuanaje, jamajjeya mano'yo majje Eyacuiñajji ani yasijje poqui'yonaje. Nasano ani'yonaje Amajama pejjejo, Jodioja etiiquiana pejjejo. Majoya aje ma dejja quea aquiana huiso mano'yonaje pea'ai. Ohuajea cuanaje cuaa.

<sup>23</sup> Oya Eyacuiñajjija epeeiji pojjeama, jamajjeya emano'yo ojjaña eshahuaja epeeiji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba cuanaje eyajo quea huesha nee nee.

<sup>24</sup> Oya jama taaame cuanaje ba'a: "Amajama ecuea etiiquiana, ¡che oe ejo jjashahuabaquicue! Eya quea quiyo nee nee po'yoqui jiquiojo, de. ¡Che jjo yana chopeshihuacue! ¡Huoojeacue Nasano ecue yana chopeshiya eya quea naba taja nee nee acue!" jamaya ma dejja quea aquiana huiso cuaquijo nequi cuanaje Amajama nijje. Nasano ca oe poqui jjima cuanaje.

<sup>25</sup> —Amajamaa eyajo jama huohuime acanaje ba'a: "De, miyaya pajea'yonaje pojja'a. Miya esheahua quea aquiana huiso ba'enaje meshijo. Jamatii Eyacuiñajji nijje jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajjija epeeiji cuanaje. Jamajjeya Eyacuiñajjiya oya quea jaji nee nequi mee ca'yani. Miya ca mi ca oe quea yeno nequi'yo, quea quiyo nequi'yo.

<sup>26</sup> Eyacuiñajjiya miya cue mee jjima acani ecuana nequi yasijje ojaya epeeiji pojjeama cuanajejojo. Ecuana mi que poqui mee jjima acani pea'ai" jamaya cuanaje Amajama.

<sup>27</sup> —Ma dejjaya cuaqui dojjojo nequi jama taaame po nequinaje ba'a: "¡Che jjo oe ecue huapa pojjeama meshijo ba'e jjashahuabaqui meecue

Eyacuiñajjijo! ¡Huoojeacue Nasano ecue chijja equi yasijke huohuiya! <sup>28</sup> ¡Ecue chahua me oejje huiso tiiya jjashahuabaqui meecue Eyacuiñajjijo acue! Eyacuiñajji nijje cajjapeequiahua cuaqui yasijke mi cueje'yo acue".

<sup>29</sup> —Majoya aje Amajama jama huohuime aca o'oyanaje ba'a: "Yani aje jja ca Eyacuiñajjija esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijke, mi jayojja epo'yojji pojjeama" jamaya cuanaje Amajama.

<sup>30</sup> —Majoya aje ma dejja cuaquijo nequi jama cua ba'a: "Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huoojeacue oe emano'yojaa shequi o'oya esohui huohuiya! Majoya quea bame cuaje, de. Onaaya emano'yojaa shequi o'oyajo ba majje jjashahuaba neineiquije Eyacuiñajjija esohuijo. Jjapeequije'yo Eyacuiñajji nijje, de" cuanaje ma dejja cuaquijo nequi.

<sup>31</sup> —Majoya aje Amajama jama cuanaje ba'a: "Chojja de, jjashajja'ajjaqui ajja Moisesija etehue'yojo, Eyacuiñajjija esohuijo, jamaya ohuaya shajja'ajja jjima acaje emano'yojaa shequi o'oya ca Eyacuiñajjija epeejji epojji. Chojja, eyaya oya emano'yojaa huoojea'yojji pojjeama esohui huohuiya" jamaya cuanaje Amajama eyajo nequi. E'e de, mahuiso —jamaya Jesosa cua.

*Quea mimishi mi po o'oya chana'  
(Mateo 18.6-7, 21-22; Macoso 9.42)*

<sup>1</sup> Jesosaa o shajja'ajjajji cuana jama huohuime aca cua ba'a: —Jamatii pea cuaa ecuea epeeiji eyacua quea mimishi po mee o'oya sa acani. Jamaya o cuajo Eyacuiñajji quea quene nee nee cuaje onijje. Ohuaya oya jeajea caje'yo cuaquí yasijje, de. <sup>2</sup> Jamajjeya ɿecuea epeeiji quea mimishi epo mee cuahuajje oe mano'yocue! E'e, ɿonaaya mei enaajo yiipeca mee majje bae quea doe yasijje jjajeaoquejea meequi'yocue! Jamajjeya ɿa'a quea mimishi po mee'yojji cuana!

<sup>3</sup> —E'e de, coya mi quea mimishi po o'oya chana!. Miquea epeeiji quea mimishi po o'oyajo, ca oe jama huohuiquime acue ba'a: “Miya quea mimishi cuanaje. ɿA'a quea mimishi po o'oyajji!” Majoya oya pojja'a jama cuaje ba'a: “E'e de, eya quea mimishi cuanaje, jjeya ca ca eya quea mimishi epo'yojji pojjeama minijje”. Jamajjeya ɿmiquianaaya ma mimishijo a'a jjashahuaba majamajaquijji! ɿjapeequi o'oyacue onijje! <sup>4</sup> E'e pojja'a ca ca oya mimijaji majamajaje minijje, majoya oya quea yeno nee nee cuaje ojaya mimishijo. Jamajjeya ɿjamatii miquianaya oja mimishijo a'a jjashahuuba majamajaquijji! ɿjabeiqui o'oyacue onijje! —jamaya Jesosa cua.

*Jesosaa o shajja'ajjajji cuana jjabahuejjaqui mee  
ca cua*

<sup>5</sup> O shajja'ajjajji cuaa Jesosa jama huohuime aca cua ba'a: —ɿEcuanaya jjabahuejjaqui mee neineicue mijo e'e jojo nei ejjashahuabaquijji, mi jayojja eba'ejji!

**6** Jesosa jama cua ba'a: —De, miquianajaya eya eba, eya miquea epreejji nei cuani. Eyaya miquianaya jjabahuejjiaqui meenaje yahuajo. Miquianaya pojja'a ca mi ca oe jjashajja'ajjaqui pishananaje. Miquianaya ejo e'e jojo nei jjashahuabaqui pishana majje Eyacuiñajjiya miquianaya amee caje'yo ojjaña eyaya aña jayojja jama, ma dejjaajjima acani amee caje'yo pea'ai. E'e, miquianaaya acui jama yajjemo ba'a: ¡Acui, nequisohuacue; ena huasijje poquicue! Majoya acui nequisohua majje ena huasijje poqui'yome. Jamajjeya ¡miquianaya ejo e'e jojo nei jjashahuabaquicue! —jamaya Jesosa cua.

*Oe echacojji emeshi meshija esohuijo cajjasha-jja'ajjaquiahua*

**7-8** Jesosaa pea esohui jama huohuime aca cua ba'a: —Oe echacojji chacojeyo majje cue'yonaje oja emeshi meseja equi yasijje. Jamatii hueahueanaje, oya ijija'ijjia sa cuanaje, jomishoca'yo sa cuanaje. Oya jomishoca'yo jjima cuanaje; ijija'ijjia jjima pea'ai cuanaje. Ma emeshi meseya oya jama huohuime acanaje ba'a: “¡Besaquicue, pea daqui huoshocue, ecuea bobi cuacuacue! ¡Majoya ecuea bobi yecue! ¡Eya ijijaabajojo majoya miquea ya'yojiyya cuacua'yocue!” **9** ¿A'a ma emeshi meseya oja echacojji huohui caje oya quea bame cuanaje? Chojja, ma echacojjiya jamatii shajja'ajja cani emeshi meseja esohui. **10** Jamaya miquianaya Eyacuiñajjiya esohui shajja'ajja majje ¡a'a miquianaya quea bame cuani poso jjabaquijji! ¡A'a jamaya jjashahuabaquijji nequiana! ¡Jamatii

miquianaya jjashajja'ajjaquicue oja esohuijo, ma echacojjiya jamatii shajja'ajja canequinaje, emeshi meseja esohui jayojja jama acanaje! — jamaya Jesosa cua.

*Jesosaa jjajeaqui mee ca'ya cua ome miji pe'a'i dejja batata epo'yo*

<sup>11</sup> Majoya Jesosaa Jenosanena huasijje poquijeya Janinea meshi yejje ca cua. Samania meshi sahuajje jjayejjequia cua. <sup>12</sup> Majoya aje oe cuiñajji yasijje Jesosa dobiqui jjimahuajo, dejja batata epo'yo ome miji pe'a'i mimi sa cua Jesosa nijke. Jamatii nequinaje quea cuiñajji huesha pishana onaja jeajea batata epo'yojojo. Jamajjeya oya cuana nequia cua quea huesha. <sup>13</sup> Onaaya Jesosa jama taaame aca cua ba'a: —Jesosa, miya ecuanaja Emeshi Mese, jecuanaya che batata epo'yo jjajeaqui mee'yocue!

<sup>14</sup> Jesosaa oya cuana bajea majje jama huohuime aca cua ba'a: —Eyaya miquiana jjajeaqui meeje'yo, ipoquicue Eyacuiñajjiya equi yasijje! Jama huohuime acue esohui huohuijji ba'a: “De, bacue, yahuajo pishana ecuana batata epo'yo cua, jjeya ca ecuana quea yami bame nee'yo”.

Majoya aje Jesosaa oya cuana jjajeaqui mee ca'ya cua. Majoya aje oya cuana poquije jjayamibamequi'ya cua, quea bihui nee nee cua. <sup>15</sup> Oe dejja ca ca jjashahuabaquia cua Jesosa bihuiajji ojaya eyami ejjajeaqui mee'yojojo. Majoya aje quea bihui po'yo majje jjanojjaquia cua; Jesosa que cue o'oya cua. Jjanobajjiima nei Eyacuiñajji bihuija ca cua. <sup>16</sup> Ecui'oshajjajo nequia cua Jesosa cojja nei; oya jama cua ba'a: —E'de,

Jesosa, miyaya eya jjajeaqui mee'yonaje, eya quea yami bame po mee'yonaje. Miya quea sohui poja nee nee —jamaya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

<sup>17</sup> Majoya aje Jesosaa ona nijje nequi jama huohuime aca cua ba'a: —¿A'a cuae ome mijí pea'ai jjajeaqui mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pea'ai. <sup>18</sup> Ma dejja Jodio dejja pojjeama, Samania meshijo ba'e; beshahua nei Eyacuiñajji ojaya ba jjima. Jodio dejja cuana Eyacuiñajji epeejji nisho. Oya cuana quea yami bame nee po'yo sa cuanaje Eyacuiñajji bihuajji pojjeama.

<sup>19</sup> Majoya Jesosaa ma dejja jama aca cua ba'a: —¡Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jjashahuabaquinaje ecuea ejjajeaqui mee'yojji. Jamajjeya eyaya miya jjajeaqui mee'yonaje. E'e jojo nei miya jjapeequinaje Eyacuiñajji nijje.

*Achajja Jesosa Emeshi Mese nei epojji cueje  
(Mateo 24.23-28, 36-41)*

<sup>20</sup> Panisseo dejja cuaa Jesosa jama huohui'ajjame aca cua ba'a: —¿Ache shono Eyacuiñajji huoojea'yo ecuea Emeshi Mese nei epojji cueje? ¿A'a ohuaya ojjaña emeshi mese cuana jeajea caje'yo?

Jesosa jama cua ba'a: —Chojja, ma jayojja pojjeama, de. Ojaya emeshi mese cuana ejeabicha-jeajji pojjeama. <sup>21</sup> Pea cuana pojja'a jama mimime cuaje ba'a: “Eyacuiñajji huoojea'yo cueyanaje pea meshi yasijke”. Siajje ca cuani, Eyacuiñajji

huoojea'yo yani jjeyahua nei, jaahuana cani ojaya epeejji cuana ojjaña Eyacuiñajji nijje jjapeequiajo. Oya Emeshi Mese cuani, de.

**22-25** Majoya Jesosa o shajja'ajjajji cuana nijje jama mimime cua ba'a: —Ecuea epeejji nei, jjeya Jodio dejja cuaa eya quecuia sa acani. Majoya aje eyahuasijje eya poquije'yo. Jiquio tii eya miquiana nijje nequi ajja. Miquianaaya ca ca eya nequi mee sa aje'yo minijje. Cho, nequi ajja. Beca cuaa miquianaya jama acaje ba'a: “Cue'yonaje aje Jesosa jiquiacua”. Pea ca jama cuaje ba'a: “Jesosa yani jomajo”. ¡A'a eya sa'ajjajji onaa siajje acajje! Eya jocuama poqui jjima. E cue o'oyajo pojjejje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjañaja Doe Mese epoji. **26-27** Yahuajo Noe ba'ya cua. Oya dobiqui jjimahuajo bishe ai yasijje, pea dejja quea mimishi nee nee cua, jjashajja'ajjaqui sa po ajja Eyacuiñajji esohuijo. Jamatii oya cuana ijja'ijja ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma dejja cuana ca ca jamatii jjashahuabaqui sa po ajja Eyacuiñajji. Oya cuana jama jjashahuabaquime pojea'ajja aña cua ba'a: “Eyacuiñajjiya eseya hui'i mee'yo jjima acaje”. Cho, majoya aje Eyacuiñajjiya ena quea quemo huoojea ca'ya cua; hui'i mee ca'ya cua ojjaña dejja cuana, de. Ma jayojjaya e cueyajo, dejja cuana jama cuaje. Quea mimishi tii tii po nequije.

**28** —E'e de, jamaya yahuajo Noti ba'ya cua tii. Dejja cuana quea mimishi nee nee cua. Jamatii

ijjia'ijjia ania cua, ishi'ishi nequia cua, jjeshej-  
jeshe nequia cuanaya cua, quiaquia nequia cuan-  
aya cua, banabana nequia cuanaya cua, equi  
iya cuanaya po nequia cua. E'e de, Eyacuiñajijo  
jjashahuabaqui sa po ajja nei nei cua. <sup>29</sup> Ma  
pojjajo Noti Sonoma cuiñajijo ba'e cuayaquiajo  
Eyacuiñajjiya ena cuani jayojja cuaqui oque mee  
ca cua Sonomajo. Ojjaña quiyo jeyojeyo'ya cua;  
chama'yo tii cuanaje.

<sup>30</sup> —Jamaya ojjaña cuana Eyacuiñajijo  
jjashahuabaqui jjima anijo, eya cueje o'oya.  
<sup>31</sup> Jamajjeya miquianaya pojja'a quejo  
chacochacoqui e cue o'oyanijo, ja'a miquianajaya  
equi yasijje poquijji aquiana jjequi'yohua!  
¡A'a jjashahuabaquijji miquianajaya aquiana  
cuanaajo! <sup>32</sup> ¡A'a pajea'yoji Notija ehuanase oja  
aquianajo jjashahuabaquia cua! Jamajjeya oya  
sane pojji po mee ca'ya cua Eyacuiñajjiya ojaya  
aquianajo jjashahuabaqui qui jojoya. Chama'yo  
tii oya po'ya cua. <sup>33</sup> Jamaya miquianajaya  
aquianajo jjashahuabaqui majamaja anijo  
miquianaya Eyacuiñajijo jjashahuabaqui jjima  
cuaje, de. Jamajjeya miquianaya chama'yo tii  
cuaje'yo. E'e de, miquianaya ca ca jjashahuabaqui  
majamaja ani Eyacuiñajjiyo ojaya epeeiji cuaje;  
ba'e tiitiije'yo onijke.

<sup>34</sup> —E cue o'oyajo becanejjiji pea'ai cahuijaa,  
oe dojosohuaqui caje'yo, pea ca jeajea canaje'yo.  
<sup>35</sup> Beca epona quecuapasha cuequi oe dojosohuaqui  
caje'yo, pea jeajea canaje'yo. <sup>36</sup> Beca dejja  
quejo chacochaco nequi oe dojosohuaqui caje'yo,  
pea ca jeajea canaje'yo Eyacuiñajjiya esohuidojo-

jjiya —jamaya Jesosa cua.

<sup>37</sup> Jesosa o shajja'ajjajjiya jama huohui'ajjame aca cua ba'a: —¿Achacua acuae maya cuaje so'o, Jesosa?

Jesosa jama cua ba'a: —Miquianaya eya baje joya ecua be'o e'ihui yasijje oqueani jama — jamaya Jesosa cua.

## 18

*Jesosaja esohui ehuohui'yo oe epona e'ahuemanojo*

<sup>1</sup> Jesosaa o shajja'ajjajji cuana huohui ca cua emimi majamajajji Eyacuiñajji nijje. Ohuaya jama huohuime aca cua ba'a: <sup>2</sup> —Oe cuiñajjijo oe so-huinano aninaje. Oya jjapeequi sa po ajja pea dejja nijje, Eyacuiñajji nijje pea'ai. <sup>3</sup> Oya cuiñajjijo tiiya oe e'ahuemano aninaje. Ma e'ahuemanoja aquiana peaa sii ca'yonaje. Jamajjeya oya po-qui majamajanaje sohuinano huasijje. Jamajjeya ohuaya jama huohui'ajjame acanaje ba'a: “¡Che iña yohua sahuacue ma aquiana onaa sii ca'yonajejo!” Poqui majamajanaje sohuinano huasijje huohui'ajjaa. <sup>4</sup> Jamatii sohuinanohua saja'a jjima acanaje, de. E'ahuemano pajeapajea'yo ajja nei nei cuanaje huohui epo tiitiinequijji jjejojo. Sohuinano jama jjashahuabaquime cuanaje ba'a: “E'e de, ma e'ahuemano pajeapajea'yo ajja nei nei, cue majamajani ca coma. Ojaya esohui shajja'ajja sa po ajja nei nei ca iña. <sup>5</sup> Eyaya aje ca oya yohua sahuajeya ma ca oe oya cue'yo jjima tii epojji”. <sup>6</sup> Jamajojoya aje oe yohua sahuacanaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. <sup>7</sup> E'e de, Eyacuiñajjiya sohuinano jayojja pojjeama. Jamatii oya shajja'ajja sa cuani miquianajaya emimi. Majoya ohuaya miquianaya yohua sahua bamebame caje. Miquianaya ojjaña pojajo mimi tiitilianijo, ohuaya miya shajja'ajja caje'yo. <sup>8</sup> Ohuaya miya yohua sahua caje'yo. E'e jojo nei ecuea esohui. Jamatii e cue o'oyajo, ¿ae cuaje dejja cuana? ¿A'a oya cuana mimi majamaja nequije Eyacuiñajji nijje? E'e pojja'a. ¿A'a jjapeequi tiitiinequije Eyacuiñajji nijje? E'e pojja'a, ba'ajja —jamaya Jesosa cua.

*Ehuohui'yo beca dejjajo oe quea bame pea bame'ama cuani*

<sup>9</sup> Jesosaa pea dejja cuana huohui ca cua ejjabahuejjaqui meejjijo. Ma dejja cuana jjashahuaba taiquia cua jama ba'a: —Ecuanaya ca quea bame nee cuani, beca cuana ca ca bame'ama ba'yani.

Jamajjeya ma dejja cuana Jesosaa jama huohuime aca cua ba'a: <sup>10</sup> —Yaninaje beca dejja. Oe dejja Moisesija etehue'yo huohuijji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Eyacuiñajjiya equi yasijje bihuiaa, mimiya Eyacuiñajji nijje. <sup>11</sup> Paniseo dejja dobiqui majje nequiñaquinaje ojjañaja ebajji. Oya jjabajeasohuaqui majje Eyacuiñajji nijje mimi nishonaje ojjañaja eshajja'ajjajji jama ba'a: “E'e de, yani eya jiquiojo, eya quea bame nee nee cuani. Eya

mimishi'ama nei, siipojji pojjeama, eya pea co-jjojji pojjeama, beca cuana ca quea mimishi nee cuani. <sup>12</sup> E'e de, eya miquea esohui shajja'ajja majje quea bame cuani; miquea esohui jayojja ba'yani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayojja pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui" jama mimi nisho nequinaje onaja ebajji Paniseo dejja.

<sup>13</sup> —Majoya ca ma dejja bejjo chichajji cuani jjashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: "E'e de Eyacuiñajji, eya yani, eya quea mimishi nee nee cuanaje. Jjeya eya quea mimishi po maja sa po'yo ajja. ijapeequi sa cuani minijke, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua" jamaya cuanaje ma dejja.

—Eyacuiñajji nijje mimijeyo majje Paniseo dejja, bejjo chichajji cuani pea'ai poquinaje. <sup>14</sup> Paniseo dejjaja mimishi cuana cuijea'yo jjima cuanaje quea bame nisho ba'ejajojo. Eyacuiñajjiya bejjo chichajji cuanija mimishi cuijea ca'yonaje, o quea mimishi po maja sa po ajjajojo. E'e de, miquianaya Paniseo dejja jayojja po chana!. ¡Miquianaya ca oe pea dejja jayojjaya pocue! Majoya aje mi jjapee tiitiiquije'yo Eyacuiñajji nijje —jamaya Jesosa cua.

*Esohui Jesosaa esho'iquiana ohua quea jea nee  
nee aca cuajo  
(Mateo 19.13-15; Macoso 10.13-16)*

<sup>15</sup> Dejja cuaa esho'i cuana dojo ca cua Jesosa que. Jama huohuime aca cua ba'a: —Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohuicue ecuanaja bacua jaahuanajji! —jamaya cua ejeajji cuana, enaese cuana pea'ai.

Jesosa shajja'ajjajji cuana quea quene cuanaje ma dejja cuana nijje. Jama cua ba'a: —¡A'a ye majamajajji miquianaja bacua Jesosa que! —jamaya cua o shajja'ajjajji cuana.

<sup>16</sup> Jesosaa ca ejeajji cuana enaese cuana pea'ai jama huohuime aca cua ba'a: —¡Yacua oe miquianajaya bacua cuana yecue! Eyacuiñajji quea jea nee nee ebacua cuana, ecuea pea'ai. Oya cuana quea bame cuani, ojaya epeeiji nei cuani. Jamajjeya ¡ebacua cuana a'a poqui meeiji! ¡Ebacua cuana e que cacue'yahua, de! <sup>17</sup> ¡Miquianaya Eyacuiñajji jo jjashahuaba cuajiquicue jiquio ecua esho'iquiana cuani jama! Jamajje e que poquije'yo eya eyajo ojña huoojea'yojji cuaje —jamaya Jesosa cua.

*Oe dejja quea aquiana huiso Jesosa nijje mimia  
cua  
(Mateo 19.16-30; Macoso 10.17-31)*

<sup>18</sup> Pea pojajao oe dejja quea aquiana huiso poquia cua Jesosa huohui'ajjaa. Oya jama cua ba'a: —Jesosa, miya quea bame cuani, ¿achajja acuae po cajji Eyacuiñajji nijje eba'e tiitii'yojji so'o?

<sup>19</sup> Jesosa jama cua ba'a: —¿Yajjajo acuae moyo quea bame aña so'o? Oe neiya ca jja ca oe Eyacuiñajji quea bame nee cuani. <sup>20</sup> Miquea eba ojaya esohui. Jamajjeya miya ba'e tii tii sa cuani onijje, jama shajja'ajjame ojaya esohui acue ba'a: ¡A'a pea cojjojji pojji!  
 ¡A'a dejja quecuajji!  
 ¡A'a sii pojji; a'a siajje pojji!  
 ¡Miquea chii, miquea enaese pea'ai shajja'ajjacue!  
 —jamaya Jesosa cua.

<sup>21</sup> Ma dejja quea aquiana huiso jama cua ba'a: —E'e de, jamaya eyaya anaje esho'yahuaa, jama tii tii sohuaqui ca ca iña. Eya oe dejja quea bame nee, de.

<sup>22</sup> Jesosaa ojaya esohui shajja'ajja majje jama huohuime aca cua ba'a: —A'yo sahua oe pea yohua'ajja jjima so'o. ¡Ojjaña miquea aquiana cuana quia jeyojeyo'yocue! ¡Aquiana quiajeyo'yo majje miquea aquiana sosejje jjeshenaje bejjo quiacue joya aema' cuana huasijke! Majoya miya Eyacuiñajji nijje jjashahuaba neineiquije, ohuaya miya ba'e tiitii mee caje'yo eyajo. Miyaya bejjo aema' cuana huasijke quiajeyo'yo majje majoya miquea aquiana cuanajo jjashahuabaqui'yo ajja cuaje, Eyacuiñajjijo ca ca jjashahuabaquije. Majoya eyahuasijke poqui'yo majje aquiana quea bame nee cuaje miquea epojji. E'e, ijamaya acue majoya cue o'oyacue enijje jjapeequiya! —jamaya Jesosa cua.

<sup>23</sup> Ma esohui shajja'ajja majje dejja quea aquiana huiso quea yeno po'ya cua. Oya quia sa po'yo ajja cua quea bejjo huiso jjejojo, quea aquiana huiso nee nee jjejojo. Poqui'ya cua;

aquiana quia'yo jjima aca cua. Jjapeequi jjima Eyacuiñaggi nijje, de. <sup>24</sup> Jesosa quea yeno cua ma dejja quea aquiana huiso poquije ba majje; jama cua ba'a: —Oe dejja quea bejjo huiso anijo, quea camaja ejjapeequijji Eyacuiñaggi nijje. Jamatii jjashahuabaquiani ojaya aquianajo; Eyacuiñajijo ca ca jjashahuabaqui ajja. <sup>25</sup> Oya cameno, mona ai'ai jama, jjayejequi jjima cuaje ahuoja quii huejjajje jayojja. Jamaya dejja quea aquiana huiso beshahua nei poqui jjima eyahuasijje cuaje —jamaya Jesosa cua.

<sup>26</sup> Pea cuaa ojaya esohui shajja'ajja majje Jesosa jama huohui'ajjame aca cua ba'a: —Ojjaña cuana quea bejjo huiso sa cuani, de. ¿Ae shai che poquije'yo eyahuasijje Eyacuiñaggi nijje ba'e'yohua?

<sup>27</sup> —E'e de, oe dejja oya eyahuasijje epoqui meeiji pojjeama. Eyacuiñajjiya ca mi ca oe poqui mee caje'yo eyahuasijje onijje eba'e tiitii'yojji —jamaya Jesosa cua.

<sup>28</sup> Majoya aje Peno jama cua ba'a: —De, ecuana poqui sa cuani eyahuasijje, jeajeana'yonaje ecuea aquiana jiquio meshijo minijje epoqui'yojji.

<sup>29-30</sup> Jesosa jama cua ba'a: —E'e, ecuea eba. Miquianaaya ojjaña aquiana cuana jeajeana'yonaje epoquijji enijke. Jamajjeya miquianaya mano'yajo, Eyacuiñajjiya miquianaya poqui mee caje'yo eyahuasijje onijje eba'e tiitii'yojji. E'e de, miquianaaya equi jeajeana'yonaje, jamajjeya Eyacuiñajjiya miquianaya sosequia caje quea huiso nee nee. Quijje miquianaya mano'yajo Eyacuiñajjiya quea huiso nee nee eyajo quia caje'yo. Miquianaaya jeanananaje miquianajaya huanase, ebacua,

miquianajaya o'i, miquianajaya chii pea'ai. Eyacuiñajjiya miquianaya huapa pojjeama jayojja quiame acaje mi jaahuanajji. Eyajo pea'ai miquianaya jama quiameya acaje quea huiso nee nee. Jamaya acaje ohuaya joya ojaya aquiana jeana'yojji cuani enijje chacochacohua —jamaya Jesosa cua.

*Jesosaa huohui ca o'oya cua o mano'yojjijo  
(Mateo 20.17-19; Macoso 10.32-34)*

<sup>31</sup> Jesosaa oja 12 shajja'ajjajji nei cuana jjachichaqui mee ca'ya cua. Ohuaya jama huohuime aca cua ba'a: —E'e de, jjeya eseya poquije Jenosanena huasijje. Miquianajaya eba Eyacuiñajjiya esohui yahuajo nei nei pea cuaa ejo tehue ca cua. Joya ecua onaja tehue jaa jamaya eya acaje'yo cuaa. Eya mano mee caje'yo ojjañaja Edoe Mese cuanijojo. Jamajjeya eya Jenosanena huasijje poqui majje manoje'yo. <sup>32</sup> Eya pea cuaa iña majje dojo caje Jodio pojjeama huasijje. Oya cuanaja ba jjima Eyacuiñajji, de. Oya cuana mimijajije enijje; ejo soaje; cojja cuichojea caje cuaa mo. <sup>33</sup> Cuia caje mo emeya cuaa, de. Majoya aje mo mano mee caje'yo pea'ai cuaa. Eya mano neineije'yo. Majoya pea beca peejjima cahuime po majje, eya ca iña shequije o'oya, de —jamaya Jesosa cua.

<sup>34</sup> O shajja'ajjajji cuana ca ca jjashahuabaqui jjima cua Jesosaja esohuijo. Oya cuana ba jjima, yajjajo ohua o mano'yojji huohui cani poso jjabaquia cua.

*Jesosaa cojjama' quea cojjaja'a po mee ca'ya cua  
(Mateo 20.29-34; Macoso 10.46-52)*

<sup>35</sup> Jesosa Jenico cuiñaggi chipi nei poquia cua. Oe dejja cojjama' chemo po aña cua ejiojji cojja sahuajo. <sup>36</sup> Cojjamaa shajja'ajja ca cua dejja quea huiso cueje, jamajjeya huohui'ajja ca cua: —¿A'ya mi so'o?

<sup>37</sup> Pea cuana jama cua ba'a: —Jesosa iquoio cueje, de.

<sup>38</sup> Majoya aje jama taaame cua ba'a: —Jesosa, miya Eyacuiñajjija huoojea'yo cuani. Miya ma etiquiana emeshi mese, Dabi jayojja cuani. Eya ca iña oe che cojjama', de. ¡Che iña jjacojjaja'aqui mee'yocue!

<sup>39</sup> Ehui dojojji pea cuana poquije jama cua ba'a: —De, ¡quea shajjaquijjo pажjaja coma a'a taaajji!

Oya ca ca taaa o'oya cua; jama cua ba'a: —Jesosa, ¡che iña yohua sahuacue, miya Eyacuiñajjija huoojea'yo!

<sup>40</sup> Jesosa poquije tii nequiñ aquia cua. Majoya aje oya jama cua ba'a: —¡Cojjama' e que jjequicue!

Yechipi cajo Jesosaa cojjama' jama huohui'ajjame aca cua ba'a: <sup>41</sup> —¿Apiojji eya miyaya taaaña, cojjama'?

—Jesosa, miya ecuea Emeshi Mese nei, mi que e jjacojjaja'aqui mee'yoji mi taaanaje —jamaya cua cojjama'.

<sup>42</sup> —E'e de, ijjeya miya quea cojja ja'a po'yocue! Eyaya miya jjabapojjaquee mee'yonaje ejo e'e jojo nei jjashahuaba bamebamequinajejojo —jamaya Jesosa cua.

<sup>43</sup> Majoya aje quea cojja ja'a nee nee po'ya cua. Oya Jesosa nijje poquia cua. Oya jama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ja'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

## 19

### *Jesosaa Saqueo ba ca cua*

<sup>1</sup> Jesosaa Jenico yejje canana cua; quea dejja huiso jjachichaquia cua Jesosa bajji. <sup>2</sup> Oe dejja Saqueo bajjani cua. Ojjañaja eba Saqueo quea bejjo huiso nee nee cua. Oya bejjo chichajji cua emeshi meseja yajji. Oya ca jjadasiaquijji cua.

<sup>3</sup> Ohuaya ca ca Jesosa ba sa aca cua. Jamajjeya Saqueo poquia cua Jesosa baa pea cuana ejjachichaqui nequi yasijje. Quea chi'aa jjejojoya ca ca oe ojaya beshahua nei Jesosa ba jjima cua.

<sup>4</sup> Jamajjeya Saqueo cuajicuaji poquia cua, ejiojji cojja sahuajo nequi acui yasijje sohuaquiñquia cua. <sup>5</sup> Jesosa jjayejje'ajjaquia cua acui aa biajje Saqueo anijje. Majoya aje ohuaya bajeasohua majje jama aca cua ba'a: —Saqueo, joque'yocue! Jjeyahua nei iña poquije miquea equi yasijje aniya!

<sup>6</sup> Majoya aje oya nequioque'ya cua. Majoya aje nequioque'yo majje poquia cua ojaya equi yasijje Jesosa nijje. Oya quea bihui cua. <sup>7</sup> Pea cuaa ca ca niñeba ca cua Jesosa poquije ba majje; jama mimijajime cua ba'a: —De, Jesosa Saqueo nijje poquinaje anicuua, Saqueo quea mimishi nee nee, de

<sup>8</sup> Majoya aje dobiquia cua Jesosa Saqueoja equi yasijje. Quijje pishana ijja'ijjiajeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje bejjo quiaje esejja. Eya siipojji nei

cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe bejjo siinaje, eyaya quiaje'yo ebeca pee pea'ai bejjo. Eya mimishi po sa po'yo ajja. E'e jojo nei ecuea esohui jjeya. Siajje pojjeama cuani —jamaya Saqueo cua.

<sup>9</sup> Jesosaa oya jama huohuime aca cua ba'a: —E'e de, miya Jodio dejja nei, jamatii miya Eyacuiñajji nijje jjapeequi jjima cuanaje. Jjeya ca ca miya e'e jojo nei jjapeequi sa cuani Eyacuiñajji nijje. <sup>10</sup> E'e, eya cueyanaje ojjaña jjapeequi meeya Eyacuiñajji nijje. Eyaya mi jayojja pea cuana ba sa aña —jamaya Jesosa cua.

*Esohui ehuohui'yo bejjojo*  
(Mateo 25.14-30)

<sup>11</sup> Jesosaja esohui shajja'ajja majje pea cuaa jama aca cua ba'a: —Jesosa, Jenosanena huasijke poqui majje miya ojjaña Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

<sup>12</sup> Jamajjeya Jesosaa oe esohui ejjashahuaba quimeejijo jama huohuime aca cua ba'a: —Oe dejja emeshi mese epo'yojji pea meshi yasijke poquinaje. Majoya oya emeshi mese epojji bajjani ca'yajje huacuaya cue'yonaje o nequinaje meshi yasijke. <sup>13</sup> Poqui jjimahuaa ohuaya iyaa canaje ojaya ome miji pea'ai echacojji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: “E'e de, jiquio bejjo eyaya miquianaya quiaña, aquiana jjeshejji. ¡Esose quea huisojo bejjo jjahuisoqui meecue! Eya cue'yo majje quea huiso bejjo

bañaje'yo. Eya majoya quea bihui cuaje" jamaya cua ma emeshi mese poqui jjimahua.

<sup>14</sup> —Majoya aje emeshi mese poquinaje pea meshi yasijje emeshi mese epoji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojea ca cua. Jama huohuime aca cua ba'a: "Ecuanaxaya ma dejja emeshi mese cuajo boti'ama cuaje".

<sup>15</sup> —Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacojji cuana ehuohui'ajjajji, ache huiso bejjo chicha canaje ebajji. <sup>16</sup> Ebionei oe echacojji poquinaje o que. Jama cua ba'a: "Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pea'ai bashosocome bejjo. Eyaya chaco neineinaje, de". <sup>17</sup> Emeshi meseya jama acanaje ba'a: "E'e de, miya oe echacojji quea bame nee cuanaje. Jjeyahua nei miya emeshi mese jayojja aje, ¡ome miji pea'ai cuiñajji jaahuanacue, miyaya quea bame cuanajeya jjejojo!"

<sup>18</sup> —Pea echacojji poquinaje emeshi mese que. Jama huohuime acanaje ba'a: "Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oeje bashosocome bejjo. E'e de, eyaya chaco neineinaje pea'ai". <sup>19</sup> Jamajjeya emeshi mese jama cuanaje ba'a: "E'e de, miya quea bame cuanaje. Miya emeshi mese jayojja aje, ¡me oeje cuiñajji jaahuanacue!"

<sup>20</sup> —Pea echacojji poquinaje o que. Oya jama cuanaje ba'a: "Emeshi mese, ma'aje miquea oe

bashosoco bejjo. Quia jjimajje bejjo cuanaje. Eja sisijo bebo majje jaahuana neineinaje. <sup>21</sup> E'e de, miya etecueaje poso ca ca mi quianaje. Ecuea miya eba dejja quenequene cuajiji nei nei. Quea dejja taija jjejojo miquea aquiana quea huiso yani. Jamajjeya eya quea mete cuanaje miquea bejjo quiajiji. Jamajjeya jaahuananaje miquea bejjo nei". <sup>22</sup> Majoya aje emeshi meseya oya tecuea canaje. Oya jama cuanaje ba'a: "Siajje miya, de. Miquea ejjashahuaba taiquiji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. <sup>23</sup> ¡Bacue, ecue bejjo oya huiso tii miyaya jaahuananaje! ¿Api-oji miyaya bejjo ejjeshejji jaajji equi yasijje mi iyaquinaje, ejjahuisoquiji? Miyaya chacochaco jjima cuanaje, de".

<sup>24</sup> —Emeshi mese oya cuana jomajo nequi jama huohuime acanaje ba'a: "E'e de, ijjequisejaja'yocue ecue quia bejjo ma echacojji shajjama' cuanajeja! ¡Quia'yocue ma ebionei echacojji cuanaje yasijje, ma quea huiso bejjo chichajji cuanaje yasijje!" jamaya emeshi meseya acanaje.

<sup>25</sup> —Oya cuana jama cuanaje ba'a: "Emeshi mese, miquea ebionei echacojji ca ca quea bejjo huiso cuani. Yani ojaya ome miji pea'ai huisome, de". <sup>26</sup> Majoya aje emeshi meseya jama acanaje ba'a: "¡Shajja'ajjacue ecuea esohui e'e jojo nei! Oe dejja chacochaco ani quea bame, shajja'ajja cani ecuea esohui, eyaya quiaje quea huiso nee nee. Oe dejja ca ca chacochaco ajja, shajjama' cuani, eyaya quia jjima aje. Iñaje'yo ojjaña ojaya aquiana o shajjama' jojoya. <sup>27</sup> E'e de, pea dejja cuanaja eya

boti'ama. Oya cuana eya emeshi mese epoiji sa po ajja ca ca oya. ¡Ma dejja cuana yecue eque! E cojja nei nequia majje ¡quecuajeacue ojjañaja eba-jji!" cuanaje ma emeshi mese, de —jamaya aca cua Jesosaa.

Oya huohui ca cua ma esohui ojjañaja ebajji eseya cachacochaco'yahua Jesosaja yajjijo quea bame nee, eseya cajjashajja'ajjaqui'yahua ojaya esohuijo pea'ai. Eseyaya quea huiso onijje ca-jjapeequi mee'yahua. Majoya Jesosa cue o'oya majje ojaya epeeiji quea huiso cuaje. Majoya oya jama cuaje ba'a: "Miquianaya quea bame cuanaje; jjapeequi meenaje quea huiso nee ecuea epeeiji epoiji. ¡Jamajjeya poquicue enijke eyahuasi-jje! Beca cuana ca ca jeajeaje cuaqui yasijje shaj-jamajojo, de".

*Jesosa nequiñaquia cua Jenosanenajo  
(Mateo 21.1-11; Macoso 11.1-11; Huani 12.12-19)*

<sup>28</sup> Majoya Jesosa mimijeyo majje poquia cua Jenosanena huasijje. <sup>29</sup> Poquijeya ba cañaquia cua beca cuiñajji Mepaje, Betania pea'ai. Ma cuiñajji cuana chipi neijo eyiyo nequi yohua bajjani ba'a: Onimo. Majoya Jesosaa becanejjiji pea'ai o sha-jja'ajjajji cuana huoojea ca cua. Jesosaa oya cuana jama huohuime aca cua ba'a: <sup>30</sup> —¡Poquicue jocuama ma cuiñajjijo chipi nei! ¡Bañaqui majje bacue mapichi esho'i ai ejeyonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue! <sup>31</sup> Onaa: "¿Apiojji acuae ecuea mapichi picho-jeña so'o?" acajje, oe jama huohuime acue ba'a:

“¡Mapichi jjequicue!” Jesosa cuanaje. Oya pa mapichi sa cuani, de, acue.

<sup>32</sup> Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesosaa huohui ca cua jama pichojeameya aca cua. <sup>33</sup> Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesosaja eshajja'ajjajji cuana jama huohui'ajjame aca cua ba'a: —¿Apiojji acuaeaya ecua mapichi pichojeaña so'o?

<sup>34</sup> Oya cuana jama cua ba'a: —Jesosaa sa canijojo ca ca ecuaaya pichojeaña.

<sup>35</sup> Majoya aje dojo ca cua Jesosa que. Daqui iya ca cua mapichija edaasa biajje. Majoya Jesosa anisohuaquia cua mapichija edaasa biajje; poquia cua Jenosanena huasijke. <sup>36</sup> Jesosa poquianijo jjachichaquia cua ojjaña dejja cuana ejiojji sahuajo. Onaaya daqui ao jjequi jeapiihui ca cua ejiojjijo Jesosa ja'ajjequijji. Emeshi mese jama ja'ajjequimeya acaninaje cuaa ohua ba cahua-jje. <sup>37</sup> Eyiyo Onimojo ani jaaoque majje ojjaña Jesosaja epeejji cuana queabihui nee nee cua. Sohuicuayaña cua jama ba'a: <sup>38</sup>—Eyacuiñajji, miya quea bame nee nee. Miyaya Jesosa huoojeanaje ecuea Emeshi Mese epojji jjeya nei. Ecuana quea bishui nee nee. Ojjaña meshijo ba'e cuana, eyajo ba'e cuana pea'ai quea bei cuani —jama sohuicuayameya cua cuana.

<sup>39</sup> Majoya Paniseo dejja cuaa quea dejja huiso pejjejo nequiya sohuicuayaqui shajja'ajja majje quea quene nee nee cua. Jamajjeya oya

cuaa Jesosa jama huohui'ajjame aca cua ba'a: — Jesosa, ¡miquea epeeiji cuana huohuicue: “¡A'a sohuicuayajji!” acue! —jamaya cua Paniseo dejja cuana.

<sup>40</sup> Majoya aje Jesosaa jama saja'ame aca cua ba'a: —Chojja de, eyaya ecuea epeeiji cuana: “¡A'a sohuicuayajji!” ajo, mei sohuicuayaje, de. Ojjañaa jja ca oe jjeya cabihuia cahua Eyacuiñajji —jamaya Jesosa cua.

<sup>41</sup> Quije pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajojo. <sup>42</sup> Oya jama mimimeya cua ba'a: —Eya quea yeno nee nee jiquio cuiñajjijo ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeeiji po sa po ajja cuanajejojo. <sup>43</sup> Sohuinano cuana cueje o quecua'yohua. Sohuinano cuana jjanequitoquije'yo jiquio cuiñajjijo. Majoya oya cuana cuayaqui ajja nei nei cuaje. <sup>44</sup> Majoya aje oya cuana quecua jeyojeyo caje'yo, chama'yo tii acaje'yo. Equi cuana dahuajea jeyojeyo caje'yo chama'yo epo'yojji. Jamaya cuaje oya cuana ecuea esohuijo shajjamajja cuanajejojo, eya Eyacuiñajji huoojea'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

*Eyacuiñajji equi aquiana quiajji pojjeama  
coma ca equi Eyacuiñajji nijje emimijji*

(Mateo 21.12-17; Macoso 11.15-19; Huani 2.13-22)

<sup>45</sup> Majoya Jesosa dobiquia cua Eyacuiñajji equi yasijke. Dobiqui majje Jesosaa beca cuana

aquiana quia cuequi ba ca cua. Ma ba majjeya quea quene nee nee cua. Majoya aje Jesosaa ma aquiana quia cuequi jeacuayajea ca cua. <sup>46</sup> Ohuaya jama tecueame aca cua ba'a: —Eyacuiñajjija etehue'yo jama cuani ba'a: “Eyacuiñajjija equi onijje emimijji”. Aquiana quiajji pojjeama, ona siajje ajji pojjeama pea'ai —jama tecuetecuemeya Jesosa cua.

<sup>47</sup> Ojjaña pojajo Jesosaa esohui huohui ca nequia cua Eyacuiñajjija equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pea'aiya Jesosa sa'ajja ca cua equecua'yojji. <sup>48</sup> Jamajjeya esohui huohuijji cuana jama jjashahuabaquimeya cua ba'a: —Quea camaja ca e'iñajji Jesosa equecua'yojji, oya quea epeejji huiso nee nee aña. Shajja'ajja neinei cani ojaya esohui cuaa, de.

## 20

*¿Aya acuae Jesosa huoojea ca cua esohui huohuiya?*

*(Mateo 21.23-27; Macoso 11.27-33)*

<sup>1</sup> Oe pojajo Jesosaa esohui huohui ca cua Eyacuiñajjija equijo. Jesosa que cueya cua Eyacuiñajji nijje mimiani etii cuana, Moisesija etehue'yo huohuijji etii cuana Jodio etiiquiana pea'ai. <sup>2</sup> Oya cuaa Jesosa jama huohui'ajjame aca cua ba'a: —¿Aya acuae mi huoojea canaje esohui huohuiya so'o? —jamaya aca cuaa cua.

<sup>3</sup> Jesosa jama cua ba'a: —Eyaya pea'ai miquianaya huohui'ajjaje. <sup>4</sup> ¿Aya acuae Huani ma ona besameejji cuanaje huoojea canaje so'o?

¿A'a Eyacuiñajjiya pojja'a? ¿A'a dejja cuaa pojja'a?  
¡Huohui'ajja socue mo! Majoya eyaya miquianaya  
huohuije ajea huoojea acuae eya.

<sup>5</sup> Oya cuana mimipanajajia cua. Majoya aje jama aca cua ba'a: —¿Yajja saja'ame seja aje so'o? Eseya quea mete ojjaña dejja cuanajo, de. Eseya saja'ajje jama cuaje ba'a: “Eyacuiñajjiya Huani huoojea canaje”. Majoya pojja'a Jesosaa jama saja'ame acaje ba'a: “¿Yajjajo miquiaaya cajaa Huanija esohui anaje so'o?” <sup>6</sup> Eseya jama ajje ba'a: “Dejja cuaa Huani huoojea canaje”. Ojjaña dejja cuaa se jaja ca'yo chana' meiya, ojjaña dejja jjashahuabaquiani Eyacuiñajjiya Huani huoojea canajejojo.

<sup>7</sup> Jamajjeya jjashahuabaqui majje Jodio cuaa Jesosa jama saja'ame aca cua ba'a: —Cua'a de. Ecuanajaya ba jjima nei. ¿Aya shai Huani huoojea canaje? —anisho ca cua quea meteya jjejojo.

<sup>8</sup> Majoya Jesosa jama cua ba'a: —E'e de, jamajjeya ecuea miquianaya ehuohuijji pojjeama e huoojeajji epo —jamaya Jesosaa Jodio dejja cuana aca cua.

*Pea esohui ehuohui'yo ejjashahuabaquijji jjonojjajja quejo*

(Mateo 21.33-44; Macoso 12.1-11)

<sup>9</sup> Jesosaa dejja cuana jama huohuime aca cua ba'a: —¡Jiquio ejjashahuabaqui'yojji shajja'ajjacue! Oe eque meseya jjonojjajja bana canaje. Ojaya que quea quemó nee nee cuanaje; oopana jjono bana canaje. Ma jjono yohua bajjani cuanaje ba'a: uva. Ma jjono cuana bana majje ohuaya echacojji cuana cuiña mee canaje. Ohuaya ejjajja cuiñajji cuana jama

huohuime aca cua ba'a: "Jjonojjajja jahuajeyajo miquianajaya yajji esejja acue. Pea esejja ca ca ecuea cuaje". Majoya ojaya que cuiña mee majje quea huesha poquinaje quijje nei nei cue'yohua. <sup>10</sup> Quijje jjonojjajja jahuajo ohuaya ma pea meshijo ba'e ojaya pea echacojji huoojea canaje jjonojjajja cuiñajji cuana huasijje. Ma echacojji jjonojjajja cuiñajji cuana huasijje poqui majje jama huohui'ajjame acañaquinaje ba'a: "Eya eque meseya miquiana que huoojea canaje jjonojjajja esejja jjehua'yohua. ¿Ache acuae pa eque meseja iya tepe mee?" Majoya ejjajja cuiñajji cuana quea dejja ta jjejojo quea quene cuanaje eque meseja huoojeajji nijje. Jama cuanaje ba'a: "Cho, quia sa po ajja iña. Chama' ca jjaja ca oja, ecuea ca jjaja ca oe". Majoya ejjajja cuiñajji cuaa echacojji cuiajea canaje. Cuiajea majje huoojeajea ca'yonaje eque mese yasijje; jamatii poqui'yonaje. <sup>11</sup> Majoya eque meseya pea echacojji huoojea ca o'oyanaje huacuayaya. Huohui'ajja cañaqui o'oyanaje jama ba'a: "¿Ache acuae eque meseja jjonojjajja so'o?" Majoya quia sa po ajja jjejojo cuiajea ca o'oyanaje. Poqui o'oyanaje jamatiyya, de. <sup>12</sup> Eque meseya pea echacojji huoojea ca o'oyanaje huacuayaya. E'e de, ma pea poqui majje jama huohui'ajjame acañaqui o'oyanaje ba'a: "¿Ache acuae pajjaja eque meseja jjonojjajja so'o? Eyaya cadojo'yahua o que". Majoya jjonojjajja cuiñajji cuana quenequene neineinaje onijke. Quecuajea'ajja canaje jjonojjajja cuiñajji cuaa. Poqui'yonaje echacojji jamatii eque mese yasijje.

<sup>13</sup> —Majoya eque mese jjashahuabaqui'yonaje oja quejo. Oya jama cuanaje ba'a: "¿Yajja acuae

eyaya aje'yo so'o? Ecue bacua ejja pojja'a cahuoo-jeahua. E'e, oya poqui majje ma jjonojjajja cuiñajji cuaa oya ba caje. O ba majje pojja'a jjashajja'ajjaquije. Ba'ajja". Majoya aje oja bacua ejja huoojea canaje jjonojjajja cuiñajji cuana huasijke. Jjonojjajja jjequi'yohua nisho huoojea'ajja canaje. <sup>14</sup> Majoya aje onaaya ebacua ba canaje. Jama cuanaje ba'a: "Bacue, eque meseja ebacua ejja cueyanaje, de. Cua'a ejja quecuajeaqui oe eque mesena'yojji" jama jjashahuaba taiquimeya cuanaje cuana. <sup>15</sup> Jamajjeya jjonojjajja cuiñajji cuaa eque meseja bacua ejja quecuua ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae eque meseya acaje'yo jjonojjajja cuiñajji cuana? <sup>16</sup> Eque mese poquije jjonojjajja cuiñajji cuana quecuajeaa oja bacua ejja quecu'a'yo epo jojoya. Majoya aje pea dejja que cuiña meequi caje'yo —jamaya Jesosa cua.

Dejja cuana jama cua ba'a: —De, jjonojjajja cuiñajji cuana quea mimishi nee nee, de. Chama'ca jjaja ca dejja cuajjama mimishi.

<sup>17</sup> Jesosaa cojja ba oneone ca cua ma dejja cuana. Majoya aje oya jama cua ba'a: —E'e de, yani jjaja, de. ¿A'a jjaja miquianajaya ba jjima Eyacuiñajji etehue'yo pojja'a? Ba jjima pojja'a jjajajje, jamajjeya aje mi eyaya jama huohuime aje ba'a: Jamatii dejja cuaa oe equi iyajji, equi yamajjana quea ca'a nee nee sa'ajja cani. Beca cuaa jeajea cani acui ca'a quea bame pojjeama posojojo. Pea dejjaja eba nei nei acui yamajjana equi iyajji. Jama cuaje ma acui ca'ajo ba'a: "Jiquio aje jja oe acui quea ca'a nee nee ba'a, de. Jamajjeya aje jja oe eyaya dojoje'yo quea bame

nee nee jojoya". Jamaya Eyacuiñajjiya eya babaca canaje Emeshi Mese nei quea bame nee nee epojji acui quea bame jayojja. <sup>18</sup> E'e de, miquianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epojji cajaa acajo Eyacuiñajjiya jeajea caje'yo cuaqi yasijje – jamaya Jesosa cua.

<sup>19</sup> Jesosaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'aqui majje jama mimimimime ojee cua ba'a: –¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuaa Jesosa cajaa acanaje jayojja eseyaya cajaa aje pea'ai pa –jamaya ma Jodio dejja cuana cua.

Jamajjeya Jodio dejja cuaa Jesosa iña sa aca cua ejeanobiajji nisho. Ojaya epeejji cuana quea huisojojo, Jesosa mi iña ca cuaa cua. Jama cua ba'a: –De, eseya o iñajo dejja cuana quea quene nee nee cuaje ese nijje –jamaya cua Jodio dejja cuana; Jesosa iña jjima cua.

*Esohui ehuohui'yo emeshi mese yasijje bejjo quiajjijo*

*(Mateo 22.15-22; Macoso 12.13-17)*

<sup>20</sup> Majoya Eyacuiñajjiya esohui huohuijji cuaa pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'yojji nisho. Jamajjeya Moisesija etehue'yo jayojja jama mi saja'a cajo dojo ca quiaye sohuinano huasijje jeanobiaa. <sup>21</sup> Ma

dejja quea bame nisho cuaa Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiaña Eyacuiñajji esohui nei. Miyaya baña dejja cuana oya jayojjaya cuani. <sup>22</sup> ¡Jamajjeya mo oe che huohuicue! ¿A'a jamajjeya Eyacuiñajji epeeiji cuaa beijo quia cajji emeshi meseja yajji? Quia ca ajja pojja'a.

<sup>23</sup> Jesosaja eba cuanaje Jodio cuanaja ejjashahuabaquiji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeeiji nisho cuani, de. <sup>24</sup> ¡Jjequicue beijo esodojo ebajji, emeshi meseja epana'yojji!

Majoya oya cuaa oe beijo jjequi ca cua. Jjequi cajo, Jesosaa jama huohui'ajjame aca cua ba'a: —¿Beijojo ae ecajja'yo ani? ¿Ae bajjani tehueme'ya beijo? —jamaya Jesosa cua.

—Emeshi mese oja cajja'yo, Sesa bajjani.

<sup>25</sup> Majoya aje Jesosa jama cua ba'a: —Jamajjeya ¡Sesaja beijo quiaquicue ohua sa cajo! ¡Eyacuiñajji a'a pajea'yojji; oya bihuiacue; shajja'ajjacue pea'ai!

<sup>26</sup> Ma epeeiji nisho cuana quea mete nee nee cua Jesosaja ojaya ejjashahuabaquiji ebajojo. Jamajjeya jama cuana cua ba'a: —Quea jjashahuabaqui ja'a nee oya, Jesosa. Jjadasia meequi ajja, de —jamaya cua ma epeeiji nisho cuana. Jamajjeya mimi o'oya sa po ajja Jesosa nijje. Jamajjeya Jesosa iña jjima cuanaja cua.

*Mano'yo majje eshequi o'oyajji  
(Mateo 22.23-33; Macoso 12.18-27)*

<sup>27</sup> Ma pojajio tii Sanoseo dejja cuana poquia cua Jesosa huohui'ajja. Sanoseo dejja cuana jamatii jjashahuabaquia cua pea cuana mano'yo majje eshequi o'oyajji pojjeama.

Jesosaja ca ca jama sohui huohuime ajjima cua. Jamajjeya Sanoseo dejja cuaa oya edasiajji nisho aca cua. Majoya aje jama huohui'ajjame aca cuaa cua ba'a: <sup>28</sup> —Esohui huohuijji, Moisesiya jama tehueme aca cua yahuajo nei nei ba'a:

“Oe dejja jjahuanaquinaje. Majoya aje mano'ya cua bacuamahua. Ojaya ehuanase quijjojea ca cua. Ahuema' ani'ya cua jjamejoui jjimahua quijjojea. Majoya aje ahuemano'yajo oja chahuaa cahuana ca'yahua, oja doeja bacua jea jayojja nei epoji”.

<sup>29</sup> Jamajjeya jama cuaje pojja'a ba'a: Oe dejja quea doe huiso cua, me oejjje pea becanejjiji pe'a'i nequia cua. Ma dejja epona huana ca cua. Majoya mano'ya cua; bacuamahua quijjojea ca cua. <sup>30</sup> Ma dejjaja quijjojea ani echahua meseya huana ca o'oyanaje. Bacua jea jjimahua quijjojea ca o'oyanaje. <sup>31</sup> Majoya pea echahua meseya huana ca o'oyanaje. Majoya pea echahua meseya huana'ajja ca poquiapoquia cua. <sup>32</sup> Majoya aje oya epona mano'yonaje yahueja quijjojea ani tiiya. Jjamejouqui ajja cuanaje, bacuama' nei nei tii pona cuanaje, de. <sup>33</sup> Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huana-coojji epoja pojja'a, pea echahua meseja pojja'a; oja chahua cuana ahuia'ajja'yo epo —jamaya cua Sanoseo dejja cuana.

<sup>34</sup> Jesosaa jama aca cua ba'a: —De, miquianajaya ba jjima. Jiquio meshijo dejja cuana jjahuanaquiani; epona cuana jjahuiaquiani.

<sup>35</sup> Jamajjeya jiquio meshijo Eyacuiñajji epeeiji mano'yo majje eyahuasijje poquije'yo. Ejjahuanaqui'yojji pojjeama cuaje'yo eyajo; epona cuana pea'ai ejjahuaqui'yojji pojjeama cuaje'yo eyajo. Jjamejoqui ajja pea'ai cuaje'yo eyajo. <sup>36</sup> Mano'yo ajja cuaje jomajo; esohuidojoojji jayojja jama cuaje'yo. Eyajo ojjaña Eyacuiñajji ebacua cuaje'yo, eshequi'yo jjejojo. <sup>37</sup> ¿A'a miquea ba jjima dejja cuana ojjaña mano'yo majje shequiye o'oya? Jamajjeya Eyacuiñajji yahuajo nei esohui tehue mee ca cua miquiana jjabahuejjaquijji. Moisesiya tehue ca cua yahuajo nei nei ma acui jijiqui ba majje. Eyacuiñajji mimia cua onijke jama ba'a:

“Eyaya miquea etiiquiana cuana jaahuanaña, Amajama, Isaaca, Jacobo pea'ai ecuea epee-jjijojo. Oya cuana enijje enequi tii tii”.

<sup>38</sup> Eyacuiñajji emano'yo cuana meshijo e'ohuajeajaa jaahuanajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejjijojo —jamaya aca cua Jesosaa.

<sup>39</sup> Pea Moisesija etehue'yo huohuijji cuaa jama huohuime aca cua ba'a: —E'e de, quea ja'a nee nee miquea esohui, Jesosa. Quea bame nee nee, de.

<sup>40</sup> Majoya huohui'ajja beca'yo jjima tii aca cuaa cua quea meteya jjejojo, jjadasia meequi ajjajojo.

*¿Aya Jesosa huoojea ca cua dejja jaahuanaji pojji?*

*(Mateo 22.41-46; Macoso 12.35-37)*

<sup>41</sup> Jesosaa oya cuana jama aca cua ba'a: — Miquianaya jama jjashahuaba taiquime cuani ba'a: “Jesosa Dabija osecua poso nequiaa aña. Jamajjeya oya Eyacuiñajjija Bacua pojjeama poso nequiaa aña” jamaya jjashahuaba taiquimeya nequiana cuani. Dabi emeshi mese yahuajo nei nei ba'ya cua. Eya ojaya eba nei nei, de. Ojaya eya eba dejjaja bacua ejja pojjeama, Eyacuiñajjija Bacua Ejja. <sup>42</sup> Jamajjeya ohuaya esohuicuayajji tehue ca cua Salmojo; jama cua ba'a:

“Eyacuiñajjija ecuea Emeshi Mese Quito jama huo-  
huime acanaje ba'a: —¡Enijje anioquecue  
ebañeijije ojjañaja Emeshi Mese epojji!

<sup>43</sup> Eyaya mi quecua'yoji epo jeabichajea jeyojey-  
oje'yo. Majoya aje miyaya oya cuana jea-  
jeaje'yo cuaqui yasijje cajaajojo —jamaya  
aca cua Eyacuiñajjija”.

Jamaya Dabiya ejo tehue ca cua yahuajo nei nei.

<sup>44</sup> Jamajjeya Dabiya Quito oja Emeshi Mesejojo bajjani ca cua. Jamajjeya Quito Dabija osecua cua, ojaya Emeshi Mese nei. Eya jja iñá iquoio Quito, de, dejjaja bacua pojjeama; Eyacuiñajjija Bacua Ejja, jamajjeya eya ojjañaja Emeshi Mese nei —jamaya Jesosa cua.

*Jesosaa Moisesija etehue'yo huohuiiji cuana tecueajea ca cua*

*(Mateo 23.1-36; Macoso 12.38-40; Noca 11.37-54)*

**45-46** Ojjañaa Jesosaja esohui shajja'ajja canijo, Jesosaa o shajja'ajjajji cuana jama aca cua ba'a: — Coya mi oe Moisesija etehue'yo huohuijji jayojja po chana!. Oya cuana po'ayequiequi daqui aojji ojjañaja quea bame ebajji nishoya. Oya cuana queabihui cuani shajja'ajja majje ojjañaja esohui jama cuani ba'a: "Ma esohui huohuijji quea bame cuani, oja daqui quea bame, oja esohui quea ja'a nee" jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqui majje ebionei anioque sa cuani Eyacuiñajjiya esohui huohuijji pejjejo. E'ijjia'l'ijjiajjijo pea'ai anioque sa cuani equi mese pejjejo. Beca cuaa quea bame poso acani. **47** E'ahuemanoja aquiana sii cani o chaco sahuajji nisho po majje. Majoya oya cuana mimi nisho ani Eyacuiñajji nijje. Oya quea mimishi nee nee. Eyacuiñajjiya oya cuana jeajea caje'yo cuaqui yasijje, onijje mimi nishojjijojo —jamaya cuana Jesosaa aca cua.

## 21

*E'ahuemano aemaa bejjo quia ca cua  
Eyacuiñajjiya equijo  
(Macoso 12.41-44)*

**1** Eyacuiñajjiya equijo, Jesosaa dejja cuana quea aquiana huiso nequi ba ca cua. Ma dejja cuaa bejjo iya ca cua ejjeshejji iyajji yasijje. **2** Majoya e'ahuemano aema' nei neiya bejjo iya ca cua. Becanejjiji pea'ai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji yasijje. **3** Majoya Jesosa jama cua ba'a: —E'e, jíquio e'ahuemano quea bame

cuanaje. Ohuaya ojjaña tii beijo iya ca'yonaje. Jamajjeya Eyacuiñajji quea bihui cuanaje onijje.

<sup>4</sup> Quea aquiana huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahuemanohua iya canaje ojaya beijo bobijjeshejji nisho, de. Chama'yo ojaya beijo po'yonaje. Jamajjeya quea aquiana huiso nee nee cuana quea bame pojjeama cuanaje —jamaya Jesosa cua.

*Pea cuaa Eyacuiñajji equi cajjajeajea mee caje'yo*

(Mateo 24.1-2; Macoso 13.1-2)

<sup>5</sup> Beca cuana mimia cua Eyacuiñajji equijo jama ba'a: —¡De, bacue mei quea bame, aquiana quea bame ani Eyacuiñajji equijo! Aquiana quea bame sosema' quia Eyacuiñajji equi quea bame epojji.

Majoya aje Jesosaa jama aca cua ba'a: <sup>6</sup> —E'e de, quijke pishana jiquio equi, aquiana pea'ai chama'yo tii acaje'yo, de. Ma mei bame cuana pea biajje e'iya sohua'yojji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajji equijo.

*Dejja cuana quea mase nee cuaje quijke*

(Mateo 24.3-28; Macoso 13.3-23)

<sup>7</sup> Majoya o shajja'ajjajji cuaa jama huohui'ajjame aca cua ba'a: —Jesosa ecuea esohui huohuijji, ¿ache shono acuae shai pea cuaa Eyacuiñajji equi mei cuana cajjajeajea mee caje'yo? ¿Yajja acuae acaje so'o?

<sup>8</sup> Jesosa jama cua ba'a: —Ma Eyacuiñajji equi quea bame cajjajeajea'yo jjimahuajo, jamaya

cuaje ba'a: Quea huiso nee cueje e bajjani nisho po majje. Jama mimi nishome cuaje ba'a: "Eya Jesosa Quito bajjani, de". Pea jama cuaje ba'a: "Eya jjeyahua nei cue o'oyanaje, eya Quito, Eyacuiñajjija huoojea'yo". ¡A'a ojaya esohui shajja'ajjajji! Siajje ca cuaje.<sup>9</sup> Miquiaaya shajja'ajjaje pea meshijo ba'e cuana jjaquecuaquiequi pea meshijo ba'e cuana nijje. ¡A'a miquianaya quea mete pojji! Jamatii acua pojjeama oe po ajja jjima cuaje so'o —Jesosa cua—.<sup>10</sup> Dejja cuana jjaquecuaquije'yo ojjaña meshijo ba'e cuana, cuiñajjijo ba'e cuana pea'ai.<sup>11</sup> Quea huiso emano meejjiya mano mee caje'yo. Ojjaña quea mete nee nee cuaje, de. Bobima' cuaje, manoje'yo quea dejja huiso cuana bobimajo. Meshi huehuahuehuaje ojjaña meshi yasijke pea'ai, de. Ojjaña quea mete nee nee cuaje'yo eyatahuatahua huehuahuehuajo meshi huehuahuehuajo pea'ai, de —jamaya Jesosa cua.

<sup>12</sup> —Jiquio jama po jjimahuajo beca cuaa miquianaya quea nee po mee caje'yo ecuea epeeiji cuanijojo. Oya cuanaja boti'ama nee nee cuaje, de. Miquianaya iña majje dojo caje jeanobiajearaa Jodioja equi ejjachichaquijji cuana huasijke. Dojo caje miquianaya emeshi mese nequi cojja nei yasijke. Majoya ohuaya jama huohui'ajjame acaje ba'a: "¿A'a miquianaya Jesosaja epeeiji nei?" E'e jojo neijojo, miquianaya jeanobiajearaa caje.<sup>13</sup> Jama po majjeya ¡a'a quea mete pojji! Miquianaya ejo huohuije ma emeshi mese yasijke. Jamajjeya quea huiso emeshi mese cuaa shajja'ajja caje ecuea esohui Eyacuiñajjija esohui pea'ai —jamaya Jesosa cua—.<sup>14</sup> E'e, ¡a'a quea mete pojjiache

esohui miquianaaya huohuije'yo! <sup>15</sup> Eyaya nei miquianaya quea ja'a nee po meeje. Eyaya esohui huohui sahuaje ehuohuijji ejo. Ma pojajajo pea cuanaja miya esaja'ajji pojjeama miquianajaya esohui quea ja'ajojo. Miquianajaya esohui e'e jojo nei cuaje, de. <sup>16</sup> Miquianajaya huapa pojjeama cuaa, miquianajaya epeeiji cuaa pea'aiya dojo caje ejjajeanobiajeaquijji equi yasijje miquianaya ecuea epeeijiyo. Ohuaya miquianaya quecua mee caje'yo, de. <sup>17</sup> Ojjañaa miquianaya cajaa acaje'yo ecuea epeeiji cuanijojo. <sup>18</sup> Onaa cajaa acajje a'a jjashahuaba taiquijji jama ba'a: "Eyacuiñajjiya ecuana pajea ca'yonaje, de". Cho, Eyacuiñajjiya miquianaya pajea'yo jjima acaje'yo. Ohuaya ca ca miquianaya jaahuana caje'yo ojaya epeeiji cuanijojo. <sup>19</sup> Ojjaña jiquio jayojja cuajo, ja'a miquianaaya eya pajea'yojjii! Miquianaya jjapeequipajea'yo ajjajo Eyacuiñajjiya miquianaya ba'e tiitii mee caje'yo eyajo.

<sup>20</sup> —Miquianaaya sohuinano cuana Jenosane-najo ejjanequitoqui'yo nequi ba majje miquiana-jaya eba ma cuiñajjiyo ani cajjajeajea cuajicuaji caje'yo. <sup>21</sup> Ojjaña Jodea meshijo ba'e cuana capoqui'yahua eyiyo huasijje. Ojjaña Jenosane-najo ba'e cuana cacuayaqui'yahua. Quea huesha ba'e cuana, ja'a cue'yoquijji Jenosanena huasijje! Capoqui'yahua quea huesha nee, ma sohuinano cuaa equecua ca cuaje jjejojo. <sup>22</sup> E'e de, jamaya quea nee nee cuaje, Eyacuiñajjiya esohui yahuajo tehue ca cua jama jayojjaya cuaje. <sup>23</sup> Epona cuana o'ejji, bacua sho'ijji pea'ai quea yeno nee nee cuaje; quea camaja epoquicuajiji cuaje, de. Ey-

acuiñaggiya quea nee nee po mee caje Jenosanenajo ba'e cuana. <sup>24</sup> Sohuinanohua beca Jodio dejja cuana yacula caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajjajeajea'yo majje pea equi iya caje'yo eba'e'yojji. Majotiiya oya cuana ba'eje'yo jiquio ecua Eyacuiñaggiya ba'e mee caje'yo. Ma shonoya aje oya cuana poquije'yo — jamaya Jesosa cua.

*¿Achajja acuae cuaje Jesosa cue o'oyajo?*  
*(Mateo 24.29-35, 42-44; Macoso 13.24-37)*

<sup>25</sup> Majoya aje Jesosaa jama aca cua cuana ba'a: —E cue o'oya jjimahuajo ojjaña quea mete cuaje eshequi, ba'i pea'ai quea apo cuajo. Jiji'yo aija cuaje, de. Majameta cuana jjacajjaqui'yo majje jijijijioqueje. Ba majje dejja cuana quea mete nee nee cuaje; piopio caje'yo, de. Ena cuana quea shajjaquijjo cuaje enashajo quea quemo nee neejojo. <sup>26</sup> Mete caje'yo majameta huehuahuehuajo. Dejja cuana shacamano caje'yo mete'yo majje. Oya cuaa jama huohui'ajjame acaje ba'a: “*¿Yajja shai cuani so'o?*” <sup>27</sup> Ojjaña cuaa eya ba caje. Eya ojjaña Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojajoya. <sup>28</sup> ¡Miquianaaya jiquio ba majje nequisohuacue! ¡Jjabajeasohuaquicue! Eya cueje o'oya miquiana dojohua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

<sup>29</sup> Jesosaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojjaña acui cuana bacue! <sup>30</sup> Esejaya meshijo acui iña yani ba majje eseaya jama cuani ba'a: “E'e jojo nei nayaja po'yonaje”. <sup>31</sup> ¡Jiquio ecua acui iña yani ba majje acuijjajjajo jjashahuabaquiani jayojja jama eyatahuatahua huehuahuehuani ba majje bacue eya cueje o'oya!

<sup>32</sup> E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña acua cuaje'yo eya ojjañaja Emeshi Mese oe nequije'yo. <sup>33</sup> Eyatahuatahua, meshi pea'ai chama'yo cuaje'yo. Ecuea esohui ca ca ma ani tiitiime cuaje'yo.

<sup>34</sup> —¡Ishoa'ajja anicue iña oe nequiaa! ¡A'a jjashahuaba majamajaquianiji miquianajaya eba'ejjijo! ¡Miquianaya oe che jjashahuabaquicue e ecue o'oyajjijo! <sup>35</sup> Ibia ijjiameejji eshe'a'ani jjacamicuajiqui'yani jayojjaya jama cuecuajimeya eya cuaje. E'e, ojjañaja eya ba jjima cuecuajije. <sup>36</sup> Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojjaña cuana quea mete nee nee, quea nee nee pea'ai cuaje, de. Jamajjeya ijja'ishoa'ajja aniqui tiitiicue! ¡Miquianaya ecuea epeejji po tiitiicue! ¡Eyacuiñajji nijje mimiani tiitiicue quea ca'a epojji! Eya cue o'oyajo miquianaya ecojja nei nequiñajije. Eya miquianajaya Edoe Mese cuaje, jamajje miquianaya quea bihui cuaje, mete'ama cuaje —jamaya Jesosa cua.

<sup>37</sup> Ojjaña pojjafo Jesosaa esohui huohui canequia cua Eyacuiñajjija equijo. Mecajje

poqui nequia cua eyiyo Onimo huasijje cahuiya.  
<sup>38</sup> Mecajjeahua Jesosa cue o'oya nequia cua Eyacuiñajjija equi yasijje. Ojjaña dejja cue nequia cua oja esohui shajja'ajja.

## 22

*Jodio dejja etii cuana jjashahuabaquia cua Jesosa quecua'yojjiyo*  
*(Mateo 26.1-5, 14-16; Macoso 14.1-2, 10-11;  
 Huani 11.45-53)*

<sup>1</sup> Majoya aje quijje pishana ojjaña Jodio dejja cuana jjachichaquia cua Jenosanena huasijje ej-jashahuabaquijji yahuajo nei esohuidojijiya cuya jjima oja bacua cuana aca cuajo. Ijjia'ijjia ca cua ojee pahui hua jjimajo, Jodio etiiquianaa jayoj-jaya. <sup>2</sup> Ma epojja cue jjimahuajo, Eyacuiñajji nijje mimiani etii cuana, Moisesija etehue'yo huohuijji etii cuana pea'ai jjashahuaba taiqui nequia cua jama ba'a: —¿Achajja iñame shai seya Jesosa aje? Eseyá jjeya Jesosa iñajo ojjaña ejjachichaqui nequi cuana quea quene cuaje ese nijje —jamaya cua quea mete jjejojo Jesosaja epeejji cuanajo. Jamatii ca ca iña mee sa aca cua Jesosa equecua'yojji.

<sup>3</sup> Jodasa Jesosa shajja'ajjajji nisho cua. Ojaya pea bajjani cua ba'a: Isicanio. Beca cuanaja Jesosa iña jjimajojo, Edosiquiaa Jodasa jjashahuaba taiqui mee ca cua Jesosa iña meesahuajji. <sup>4</sup> Jamajjeya Jodasa poquia cua Eyacuiñajji nijje mimiani etii cuana que, Eyacuiñajjija equi jaahuanajji cuana pea'ai ani yasijje huohui pohua. Jama huohuiñaquime aca cua ba'a: —Ecuea eba Jesosa ma o oe nei poquiani yasijje. Eyaya miquianaya huohuije'yo.

<sup>5</sup> Majoya oya cuana quea bihui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesosa oe nei poquiani yasijje. Majoya aje ecuanaaya miya sosequiaje, de.

<sup>6</sup> —E'e de, eyaya aje mi iñasahua meeje'yo — Jodasa cua. Majoya ohuaya sa'ajja ca cua e'iña mee'yojji Jesosa dejjama huasijje poqui.

*Jesosaa o shajja'ajjajji cuana nijje bobo ijija ca cua*

(*Mateo 26.17-29; Macoso 14.12-25; Huani 13.21-30; 1 Conitio 11.23-26*)

<sup>7</sup> Majoya ma epojjajo Jodio cuana ijija'ijjianijo Eyacuiñajji nijje mimianiya oe ñajjajja yahue sho'i quea bame nee nee quecuia ca'ya cua Eyacuiñajji bihuiajji. Jodio dejja cuaa pahui hua jjima ijija ca ania cua. <sup>8</sup> Jamajjeya aje Jesosaa Peno, Huani pea'ai huoojea ca cua oe equi yasijje bobo jjequiuya.

<sup>9</sup> O shajja'ajjajji cuaa jama huohui'ajjame aca cua ba'a: —Jesosa, ¿ache equijo acuae seya pahui hua jjima ijjiaje so'o?

<sup>10</sup> Jesosa jama cua ba'a: —¡Jenosanena huasijje oe poquicue! Majoya aje miquiaaya baje oe dejja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya!

<sup>11</sup> Majoya ma equi mese jama huohui'ajjame acue ba'a: “Ecuea esohui huohuijji jama cuanaje ba'a: —¿Ache equecuayijji acuae ecuana ijija'ijjiaje e shajja'ajjajji cuana nijje so'o? Ecuana ijija sa cuani pahui hua jjima, Eyacuiñajji bihuiajji”. <sup>12</sup> Majoya aje mi huohui caje equi meseaya equecuayijji quea quemo. ¡Majoya aquiana iyajeacue; bobo cuacuacue! —jamaya Jesosa cua.

<sup>13</sup> Majoya aje oya cuana poquia cua; ba ca cua Jesosaja esohui jayojjaya. Majoya iya ca cua.

<sup>14</sup> Majoya siñajo Jesosa o shajja'ajjajji cuana cueya cua ma equi yasijje. Dobiqui majje anioquea cua e'ijjia'ijjiajji.

<sup>15</sup> Majoya Jesosa jama cua ba'a: —Eya miquiana nijje oe yejje nei ijjia'ijjiajje'yo, onaa e quecua ca'yo cuahuajje. <sup>16</sup> E'e de, eya e'ijjia'ijjia beca'yojji pojjeama miquiana nijje mano'yo majje. Jammajjeya quijje eyaya cue o'oya majje jiquio pahui ijjiajje o'oya ojjaña cuanaja Emeshi Mese neiya jjeojojo —jamaya Jesosa cua.

<sup>17</sup> Majoya ohuaya caneco jjeshe ca cua. Emejo iñanequia majje mimia cua Eyacuiñajji nijje. Majoya aje ohuaya o shajja'ajjajji cuana aca cua jama ba'a: —Ma'aje, ijquio jjonojjjajja na ishicue; ishijeyocue oe! <sup>18</sup> E'e de, eyaya ishi beca'yo jjima jjonojjjajja na aje, Ecue Chiiya eya ojjaña huoojea'yojji po mee caje'yo; ojjaña eya shajja'ajja caje'yo —jamaya Jesosa cua.

<sup>19</sup> Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuea eyami. Jjeya nei pishana eya manoje'yo, Eyacuiñajji esohui jayojja cuaje miquianaja mimishi cuijea'yojji. ijAmajjeya miquianaaaya jiquio pahui ijjiacue; jamatii apouquiapoquiacie! Jiquiajja ijjia majje jmiquianaya jjashahuabaquicue e mano'ya cuajo!

<sup>20</sup> Majoya ijjia'ijjiajeyo majje Jesosaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjjajja na ecuea ena',

de. Ecuea ena' cuayaqui'yajo eya manoje'yo. Jamajjeya Eyacuiñajjiya cuijea caje'yo tii ojjañaja mimishi cuana. Eyacuiñajjiya esohui eyacua quia caje'yo ba'a: “Ojaya epeeiji cuanaja mimishi cuana cuijea mee caje'yo tii ecuea ena' cuayaqui-jeya”.

<sup>21</sup> Majoya aje Jesosa jama cua ba'a: —Yani oe ese nijje e shajja'ajjajji nisho cuani; ijzia'ijjiani ese nijje, de. Maaya eya sohuinano cuana iña mee caje'yo. <sup>22</sup> Eya manoje'yo, Eyacuiñajjiya esohui jama cuanaje jojoya. E'e de, ma e shajja'ajjajji nisho Eyacuiñajjiya quea nee nee po mee caje'yo. Ohuaya ma e shajja'ajjajji jeajea caje'yo cuaqui yasijke e ohua sohuinano cuana iña mee caje'yojojo —jamaya aca cua Jesosaa.

<sup>23</sup> Majoya aje o shajja'ajjajji cuana mimia cua jama ba'a: —De, ¿aya shai jama acaje? —jama mimime o shajja'ajjajji cuana cua.

*¿Ache o shajja'ajjajji quea bame nee nee cuaje eyajo?*

<sup>24</sup> O shajja'ajjajji cuana mimipanajaji nequia cua. Oya cuana jama cua ba'a: —¿Ache o shajja'ajjajji quea bame nee nee cuaje eyajo?

<sup>25</sup> Jesosaa jama huohuime aca cua ba'a: —Miquianaya mimiani ecuea epeeiji pojjeama jayojja, de. ¡A'a jama jjashahuubaquijji! Jamatii miquianajaya eba emeshi mese cuana quea mase cuani ojaya echacojji cuana nijje. Jamatii ma echacojji cuaa shajja'ajja cani ojaya emeshi meseja esohui jayojja oya quea mase cuanijojo. Ojaya echacojji cuana quea bihui nisho cuani. <sup>26-27</sup> ¡Miquianaya ma emeshi mese jayojja jama

a'a pojji! ¡Eyajo emeshi mese jayojja quea bame  
nee nequi sa cuanijo pea cuana jjeya nei ba'e  
meesahuacue! ¿Ache shai quea bame nee nee  
so'o? Emeshi mese, ojaya echacojji pojja'a.  
Emeshi mese, de. Jamaya Eyacuiñajija epeeiji  
pojjeama jjashahuabaquiani. Ecuea epeeiji  
cuana ca e jayojja caba'yahua. Eyaya miquianaya  
ba'e bame meesahuaña. Eya mase'ama cuani  
miquiana nijje; miquiana chacosahuajji cuani  
eya, de. ¡Jamaya pocue e jayojjaya! Majoya quea  
bame cuaje —jamaya Jesosa cua.

<sup>28</sup> Majoya Jesosaa o shajja'ajjajji cuana  
jama huohuime aca cua ba'a: —Miquianaya  
jamati po'ayequequinaje enijje. Jjapeequi  
tiitiinequinaje enijje, jamati beca cuaa eseya  
cajaa acanaje. <sup>29-30</sup>Jamajojoya aje oe miquianaya  
Eyacuiñajija quea bame quia cani, e ohua acanaje  
jayojjaya. E'e, ohuaya eya ojjaña dejja cuanaja  
Emeshi Mese nei po mee ca'yonaje; jamaya eyaya  
miquianaya Jodio dejja cuanaja emeshi mese  
jayojja po meeje'yo eyajo. Jomajo eseya ba'e  
tiitiije'yo; quea bihui cuaje —jamaya aca cua  
Jesosaa o shajja'ajjajji cuana.

*Jesosa Peno nijje mimia cua*  
(Mateo 26.31-35; Macoso 14.27-31; Huani 13.36-  
<sup>38</sup>)

<sup>31</sup> Majoya Jesosa mimia cua Peno nijje. Penoja  
pea bajjani cua ba'a: Simohui. Jama Jesosa  
cua ba'a: —Simohui, shajja'ajjacue jiquiero esohui  
ba'a: Edosiquiaa miquianaya eya pajea mee'yo sa  
acani. Ohuaya miquianaya mimishi po mee'yo sa  
acani. <sup>32</sup> Simohui, eya miminaje mijo Eyacuiñajji

nijje. Miyaya eya cajaa jayojja aje. Majoya miya enijje jjapeequi neineije o'oya. Jamajjeya enijje jjapeequi o'oya majje ipa e shajja'ajjajji cuana jjapee tiitiqui meesahuacue enijje!

<sup>33</sup> Simohui jama cua ba'a: —Ecuea Emeshi Mese nei, Jesosa, eya aje minijje tiiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

<sup>34</sup> Jesosaa Peno jama aca cua ba'a: —Peno, mecahuaje cachina yahue taaa jjimahuajo, miya jama siajje pome cuaje ba'a: "Chojja, ecuea Jesosa ba jjima". Pea beca peejjima siajje ameya aje miyaya —jamaya Jesosa cua.

### *Beshahua nei acua Jesosa e'iñaggi*

<sup>35</sup> Majoya aje Jesosaa o shajja'ajjajji cuana jama huohui'ajjame aca cua ba'a: —Yahuajo pishana eyaya miquianaya huoojeanaje esohui huohuiya. Eyaya miquianaya huoojeanaje aema' jamatii bejjoma', bashosocoma', miquea ejiojjijo nei nequi dojonaje. Eyaya miquianaya jaahuananaje. ¿A'a miquianaya quea shoe cuanaje? Chojja.

Oya cuana jama cua ba'a: —E'e jojo nei, jaahuanana neinajjeya aje jja ca miyaya ecuana, de.

<sup>36</sup> Majoya aje Jesosa jama cua ba'a: —E'e de, jjeya ca ca beca cuaa eya quecua caje'yo. Eya miquiana nijje nequi tii ajja jiquio meshijo, eya mano'yo majje. ijamajjeya ca oe miquea bejjo dojocue; miquea bashosocojo biyocuatajeacue quea huesha epoquijji! ijjequicue miquea equecuajji! Chamajo jjeshecue miquea daqui moo sosejje. <sup>37</sup> E'e de, yahuajo Eyacuiñajjija etehue'yo ejo jama cua ba'a:

“Dejja mase cuanaja boti'ama Eyacuiñajija huoo-jea'yo cuaje. Dejja mimishi jayojja acaje'yo. Jammajeya quecua caje'yo cuaa” jamaya acaje jjeyahua nei, de —jamaya Jesosa cua.

<sup>38</sup> O shajja'ajjajji cuana jama cua ba'a: —Bacue, yani ecuanaja beca equecuajji. Ecuanaa so-huinano cuana quecuaje'yo, de.

Jesosa jama cua ba'a: —Miquianajaya ba jjima ecuea esohui, de. Mahuiso ecuea esohui —jamaya Jesosa cua.

*Jetesemani quejo Jesosa mimia cua Eyacuiñajiji nijje*

(Mateo 26.36-46; Macoso 14.32-42)

<sup>39</sup> Majoya Jesosa poquia cua Onimo eyiyo huasi-jje mimiya oja Chii nijje. Cuamaya oya poqui mاجماجا nequia cua mimiya Eyacuiñajji nijje. Onijje o shajja'ajjajji cuana poquia cua pea'ai. <sup>40</sup> Majoya aje Jesosaa jama aca cua ba'a: —¡Mimi majama-jacue oe Eyacuiñajji nijje mimishi'ama epojji!

<sup>41</sup> Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a: <sup>42</sup> —E'e de, Eyacuiñajji, eya beshahua nei poqui sa po ajja acui ecueata'apee yasijje. Eya quea mete nee nee ojjañaja mimishi cuanajo, de. Ecue Chii, ecuea eba miyaya eya acui ecueata'apee yasijje poqui mee sa aña emano'yojji ojjañaja mimishijo. Jamajjeya ¡quea ca'a po meecue eya miquea ej-jashahuabaqui'yojji jayojja jama e'ajji! —jama mimimeya Jesosa cua.

<sup>43-44</sup> Jesosa quea mano jjabaquia cua emano'yojji jjejojo. Majoya mimi o'oya cua oja

Chii nijje jjanobajjima nei. O janobajjima nei mimianijo, shishi majje ena' jayojja oquequia cua meshi yasijje, de. Majoya aje esohuidojiji eyajje nequioquea cua Jesosa mete'ama po mee yaa. Ohuaya majoya Jesosa quea nee ca'a po mee ca cua; jama cua ba'a: —¡Mique Chija esohui jayojja jama acue! —jamaya aca cua.

<sup>45</sup> Majoya Jesosa oja Chii nijje mimipajea'yo majje oya poquia cua o shajja'ajjajji cuana huasijje. Ba ca cua oya cuana ecahuijaa quea yeno nee nee jjejojo, de. <sup>46</sup> Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Aniso-huacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

*Jesosa iña ca cuaa cua*  
*(Mateo 26.47-56; Macoso 14.43-50; Huani 18.2-11)*

<sup>47</sup> Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pea'ai cueya cua. Jodasa, Jesosa shajja'ajjajji nisho cueya cua o que. Oya ehui dojodzi nei cueya cua. O e'iñajji jjanequichipi quia cua Jesosa nequi yasijje. Jjanequichipi qui majje shemo tojjo nisho ca cua. <sup>48</sup> Majoya aje Jesosaa jama aca cua ba'a: —Jodasa, miyaya eya shemo tojjo nisho majje sohuinano cuana iña mee'yonaje. ¿Yajjajo Jodasa? —jamaya Jesosa cua.

<sup>49</sup> Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesosa, ¿a'a ecuaaya sohuinano cuana jajajeaje?

<sup>50</sup> Majoya aje oe oja eshajja'ajjajjiya dejja esapa jajapojojeajji nisho eshajja jajasejjajea ca cua ebañei shajjajje. Eyacuiñajji nijje mimiani etija echacojji cuanija eshajja, de.

<sup>51</sup> —Chojja, ¡a'a jja oe jajajji! —Jesosa cua.

Majoya Jesosaa ma dejjaja eshajja ejajasejjajea emeya nequia ca'ya cua. Shajja jaja jjima jayojja shajja pana'yome aca cua. <sup>52</sup> Majoya Jesosaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acuijji e'iñaa? ¿A'a cuae jja iña siipojji so'o? <sup>53</sup> E'e de, ojjaña poj-jajo eya esohui huohui po nequinaje Eyacuiñajjiya equijo. Miquianajaya eya iña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya iña mee canaje jiquio quejo dejjamajo.

*Peno Jesosaja epiejji nisho jayojja cua*

(Mateo 26.57-58, 69-75; Macoso 14.53-54, 66-72;  
Huani 18.12-18, 25-27)

<sup>54</sup> Majoya sohuinano cuaa Jesosa iña'yo majje dojo ca cua Eyacuiñajji nijje mimiani etija equi yasijke. Penohua ca ca quea huesha pis-hana quiquishi ca poquia cua. <sup>55</sup> Majoya pea sohuinano cuaa cuaqui dahuahuoje ca cua equi epeeyi dojjojo. Majoya anioquea cua cuaqui pe-jjejo ejjayoquijji. Peno pea'ai anioquea cua ona nijje yajja Jesosa onaa acaje ebajji. <sup>56</sup> Echacojji ahuema'aniya Peno jjayoquiani ba majje cojja ba neinei ca cua. Ba majje pea cuana jama huohuime aca cua ba'a: —E'e, joya Jesosaja epiejji ani ba'a —jamaya cua ahuema'ani.

<sup>57</sup> Peno jama cua ba'a: —Ecuea Jesosa ba jjima nei nei.

<sup>58</sup> Quijje pishana pea dejja Peno ba ca o'oya cua. Jama cua ba'a: —Miya jja Jesosaja epeejji, o shajja'ajjaji cuani.

—Chojja, ecuea Jesosa ba jjima nei nei —jamaya aca cua Penohua.

<sup>59</sup> Majoya quiinne pishana peaa oya ba ca o'oya cua: —E'e, oya jja Jesosaja epeejji nei nei. Oya jja Janinea meshijo ba'e Jesosa jayojjaya.

<sup>60</sup> Majoya aje Peno jama cua ba'a: —Chojja de, ¿ajeo ajja mi ca mimiani so'o?

Peno miminequijo tii, oe cachina yahue taaa cua. <sup>61</sup> Ma cachina taaaajo Jesosa jjanequijea pajjaquia cua Peno bajji. Majoya aje Peno jjashahuabaquia cua Jesosaja ehuohuijo jama ba'a: “Cachina yahue taaa jjimahuajo, pea beca peejjima siajje ameya aje miyaya, eya ba jjima nisho aje”. <sup>62</sup> Majoya Peno cuayaquia cua. Pa neinei'ya cua Jesosa ba jjima nisho epo jjejojo; quea yeno nee nee'ya cua.

### *Jesosa Jodio dejja cuaa niñeba ca cua*

(Mateo 26.67-68; Macoso 14.65)

<sup>63</sup> Sohuinano cuaa Jesosa jaahuana ca nequia cua, cuaya meequi'yo jjima yajji. Majoya Jesosa niñeba ca cuaa cua, majoya Jesosa cuia ca cua.

<sup>64</sup> Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesosa jama huohui'ajjame aca cua ba'a: —¿Aya acuae mi cuia canaje so'o? ijashahuaba'ajjaqui!

<sup>65</sup> Majoya sohuinano cuaa Jesosa niñebajea neinei ca'ya cua, mimijaji neinei'ya cua onijke.

*Pea cuaa Jesosa dojo ca cua Jodio etii cuana huasijke huohui'ajja*  
*(Mateo 26.59-66; Macoso 14.55-64; Huani 18.19-24)*

<sup>66</sup> Jjapoijjaquiaijo Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesosajo. Majoya sohuinano cuaa Jesosa dojo ca cua Jodio etii cuana huasijke. Majoya aje etii cuaa Jesosa jama huohui'ajjame aca cua ba'a: <sup>67</sup> —;Huohuicue ecuanaya miquea ebajjani! ¿A'a miquea ebajjani Quito, Eyacuiñajji huoojea'yo, pojja'a?

Jesosaa jama saja'ame aca cua ba'a: —Eya “e'e” cuajo miquianaya jjashajja'ajjaqui ajja, de. <sup>68</sup> Miquianaya eyaya huohui'ajjajje saja'a jjima aje'yo eya. Jamaya eya saja'ajje miquianajaya eya epichojea'yojji pojjeama. <sup>69</sup> E'e, eya poquije'yo jjeya nei pishana eyahuasijke Eyacuiñajji nijje ebañeijje ani'yohua. Jomajo ecue Chii quea sohui poja nee nee enequi tii tii —jamaya Jesosa cua.

<sup>70</sup> Majoya aje Jesosa ojjaña jama huohui'ajjame aca cua ba'a: —¿A'a miya Eyacuiñajji Bacua Ejja nei so'o?

Jesosaa jama saja'ame aca cua ba'a: —E'e jojo nei miquiaaya esohui ejo aña.

<sup>71</sup> Majoya aje oya cuana jama mimijajime cua ba'a: —;De, pea dejja a'a iyaajji Jesosa huohuijji! Ecuana jjeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajji Bacua Ejja miame —jama mimijajimeya cua Jesosa nijje.

## 23

*Jesosa emeshi mese Pinato huasijke dojo ca cua  
(Mateo 27.1-2, 11-14; Macoso 15.1-5; Huani  
18.28-38)*

<sup>1</sup> Majoya ojjaña nequisohua majje poquia cua emeshi mese Pinato huasijke Jesosa dojohua. Pinato esohuinano mese cua, ojjaña emeshi mese cuanaja emeshi mese pea'ai cua. <sup>2</sup> Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuaa jiquio dejja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajjija huoojea'yo cuani; oya pa Jodioja emishi mese posa cuani, de —jamaya oya cuana siajje cua Jesosajo.

<sup>3</sup> Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

<sup>4</sup> Majoya Pinatohua etii cuana jama huohuime aca cua ba'a: —De, jiquio dejja jjashahuaba taiqui aija, capichojea'yahua jja, de.

<sup>5</sup> Oya cuana quea quene nee nee cua. Mimia cua janobajjima nei nei. Jama tecuetecueme cua ba'a: —Oya ca ca jjashahuaba taiquinaje, de. Ohuaya esohui huohui ca ayequiequinaje ojjaña cuiñajji yasijke. Ebionei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijke, jjeya nei pea'asi, de. Ojjaña quea quene nee nee, quea shajjaquijjo nee nee ohuaya

po mee canaje cuana —jama siajje ameya aca cua Jodio etii cuaa.

*Jesosa dojo ca cua pea emeshi mese que, Enode que*

<sup>6</sup> Pinatohua ona shajja'ajja majje jama huo-hui'ajjame aca cua ba'a: —¿A'a jiquio dejja Janineajo ba'e?

<sup>7</sup> —E'e —oya cuana cua.

Pinatohua ma shajja'ajja majje Jesosa huojea ca cua Enode que, Janinea ameshi mese que. Enode Jenosanenajo ania cua anicuaa poqui. Jamajjeya Pinatohua Jesosa, Jodio etii cuana pea'ai huoojea ca cua Enode que.

<sup>8</sup> Enode Jesosa ba majje jama cua ba'a: —E'e de, jjeya nei eyaya baña jiquio dejja Jesosa. Eyaya oya ba sa anaje ojaya esohui eshajja'ajjajji; emano'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesosaja epeejji po sa po ajja nei.

<sup>9</sup> Majoya Enodeya huohui'ajja majamaja ca nequia cua. Jesosaja oya Enode sohui saja'a jjima cua. <sup>10</sup> Jodio etii cuaa Jesosa niñeba neinei ca aña cua. <sup>11</sup> Majoya Enodeya, oja sohuinano cuaa Jesosa hue'e ca cua esoadojojji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. <sup>12</sup> Ma pojajao Jesosa nijje mimijaji majje Enode Pinato nijje jjapeequinaje. Yahuajo Pinato Enodeja epee-jji pojjeama cua.

*Jesosa Pinatohua mano mee ca'ya cua  
(Mateo 27.15-26; Macoso 15.6-15; Huani 18.39-19.16)*

<sup>13</sup> Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea dejja cuana nijje pea'ai. <sup>14</sup> Jama huohuime aca cua ba'a: —Miquianaya ¿apoijji Jesosa yenaje so'o? Miquianaya jama cuanaje ba'a: “Ohuaya ojjaña dejja cuana quea quene, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jjashahuaba taiqui ajja. Oya quea mimishi pojjeama. Joya ecua miquiaaya huohui yaña jama pojjeama. <sup>15</sup> Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'oyanaje e que. ¡Bacue! Eyaya Jesosa mano mee'yo jjima aje, capichojea'yahua jja Jesosa, de. <sup>16</sup> Jamajjeya eyaya oya cuia meeje. Majoya aje cuia mee majje pichojea meeje'yo — jamaya cua Pinato.

<sup>17</sup> Ojjaña eshequiaja Pascuajo Pinatohua oe ejeanobia nequi huoojeacuaya ca'yaninaje, Jodio cuana quea bei epojji. Jamajjeya Pinato jama cua ba'a: —Jesosa eyaya huoojeacuaya meejo'yo jiquio shejo.

<sup>18</sup> Ma esohui shajja'ajja majje ojjaña Jodio cuana quenequene neinei'ya cua; taaa cua jama ba'a: — Chojja, ¡Mashama ca oe huoojeacuaya'yocue! ¡Que-cua mee'yocue Jesosa!

<sup>19</sup> Mashama jeanobia ca cua yahuajo pishana, oya quea mase nee nee cua. Oya Shomano emeshi

mese quecuapanajji epo; ona quecua'yojji epo pea'ai. Oya quea mimishi nee nee cua.

<sup>20</sup> Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

<sup>21</sup> Ojaya esohui shajja'ajja majje ojjaña cuana janobajjima nei nei jama taaame cua ba'a: — Chojja de, ¡Jesosa ca oe quecua mee'yocue jjeya nei! ¡Acui ecueata'apeejo oe ba'ehuanasohuajeacue!

<sup>22</sup> Pinatohua jama huohuime aca o'oya cua ba'a: —¿Apiojji shai miquianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. <sup>23</sup> Majoya aje ojjaña cuana taaa o'oya cua jama ba'a: — ¡Ba'ehuanasohuajeacue oe acui ecueata'apeejo Jesosa!

Ojjaña cuana taaa majamaja cua. Quenequene neineiya cua Pinato nijje. <sup>24</sup> Jamajjeya pinato jama jjashahuabaquime cua ba'a: —E'e de, eyaya Jesosa ca quecua meejea'yahua, dejja cuana enijje quea quene cuequijojo. Eyaya ca oe Mashama cahuoojeacuaya mee'yahua.

<sup>25</sup> Majoya aje pinatohua ma ecua ojjaña taaaanaje jama jayojjaya aca cua. Jamajjeya ohuaya Mashama huoojeacuaya mee ca'ya cua; Jesosa ca ca oe huoojea ca cua acui ecueta'apeejoeme'cacajeajji emano'yojji.

*Jesosa ba'ehuanasohuajea ca cua acui ecueta'apeejo*

*(Mateo 27.32-44; Macoso 15.21-32; Huani 19.17-27)*

<sup>26</sup> Majoya sohuinano cuaa Jesosa acui ecueata'apeejji dojo mee ca cua o ba'ehuanasohuajeajji. Jesosa saja ca cua acui quea biquieya jjejojo. Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquisijji dojo ca cua acui ecueata'apee aboiji. <sup>27</sup> Ojjaña dejja cuana epona cuana pea'ai pa poquia cua Jesosajo quea yeno jjejojo. <sup>28</sup> Jesosaa epona cuana ba majje jama aca cua ba'a: —Jenosanenajo ba'e epona cuana, ja'a oe ejo pajji! ¡Miquianaja pa sa cuanijo pacue miquianajo miquianaja bacuajo pea'ai! <sup>29</sup> Quijje pishana quea camaja cuaje miquianajo. Miquianaaya jama huohuije ba'a: “Oe epona bacuama' camaja'ama ba'yani”. Sohuinano cuana cueje jiquio cuiñajji yasijke miquiana quecuua, chama'yo tii cuaje miquianajaya bobo. Jamajjeya miquianajaya ebacua yanijo quea yeno nee nee cuaje. Ebacua cuana pa neineije'yo bobimajo. <sup>30</sup> Dejja cuana quea yeno nee nee cuaje pea'ai. Joya ecua atii mano'yo sa cuani jama miquianaya cuaje. Majoya miquianaya jjashahuabaquije jama ba'a: “Eyiyo, ¡ecuana biajje oe jaabicha cuajicue ecuana cuia cuaji'yoji” jamaya miquianaya cuaje. E'e epona cuana, miquianaya ani sa po ajja cuaje quea camaja ba'e jjejojo. Jamajjeya ma pojajao quea nee nee cuaje. <sup>31</sup> Jjeya nei sohuinano cuaa eya quecuua caje'yo. Maya ca ca oe quea tai pishana. Quijje ojjaña sohuinano cuaa miquianaya quecuua jeyojeyo caje'yo, maya quea tai nee nee cuaje'yo. Jamajjeya ja'a pajji ejo; miquianajoya jja oe pa neineicue!

—jamaya Jesosaa aca cua.

<sup>32</sup> Majoya sohuinano cuaa beca siipojji dojo ca cua Jesosa nijje eba'ehuanasohuajeajji. <sup>33</sup> Majoya oya cuana poquia cua eyiyo Sapa Jjii bajjani yasi-jje. Bañaqui majje Jesosaja eme' caca ca cua acui ecueata'apeejo; ejiojjije pea'ai caca ca cua. Cacajeyo majje nequiasohuajea ca cua. Ma becanejjiji pe'a'i siipojji pea acui ecueta'apee cuanajo nequiasohuajea ca cua Jesosa pejjejo oe ebañei mijijke, pea shani mijijke. <sup>34</sup> Acui ecueata'apeejo ba'ehuanasohuajea cajje Jesosa mimia cua Eyacuiñajji nijje ojjaña nequijo jama ba'a: —Ecue Chii, ecue Chii jiquio dejja cuanaja ba jjima e'e jojo nei eya miquea Ebacula Ejja cuani. Jamajjeya ijiquio mimishi cuijea'yocue!

Majoya aje sohuinano cuaa Jesosaja daqui hui-jjiajea'yo majje hue'e ca cua oja daqui ya'yojjiya.

<sup>35</sup> Ojjaña dejja Jesosa ba ca nequia cua, Jodio etii cuaa pea'ai. Niñeba ca cua Jesosa jama ba'a: —Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequioque'yani acui ecueta'apeejo ba'e. Oya Eyacuiñajji Bacua Ejja jjabaqui majje jja ca oe jjeyahua neiya canequioque'yahua —jama niñebameya Jodio etii cuaa aca cua.

<sup>36</sup> Sohuinano cuana mimijajia cua pea'ai. Jesosa majoya quia'ajja ca cua jjonojjajja na sese e'ishijji nisho. <sup>37</sup> Jama mimijajime cua ba'a: —¡Miya Jodioja emeshi mese nei jjabaqui majje mee nei nequioque'yocue acui ecueta'apeejo ba'e jjeyahua nei!

<sup>38</sup> Jesosa ba'e sapa biajje oja bajjani etehue'yo caca ca cua jama ba'a:

*Oya Jesosa, Jedioja emeshi mese epo'yoiji*

**39** Oe siipojji pea acui ecueata'apeejo ba'e mimijajia cua Jesosa nijje jama ba'a: —¡A'a cuae miya Eyacuiñajjija Bacua Ejja nei jjaba'ajjaqui socue! ¡Ache oe nequioque'ajjaqui'yo socue; ecuanaya pea'ai pajjaja oe che nequioque meequi'yoque!

**40** Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —¡A'a jjashahuuba taiquijji, de! ¿A'a miya Eyacuiñajjijo jjashahuubaqui ajja nei nei? Jjeya se manoje'yo. **41** Eseyá mano mee ca'yani sohuinano cuaa quea mimishi nee neejojo. Jesosa ca ca mimishi'ama, de.

**42** Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejo che jjashahuuba bamequicue!

**43** Majoya Jesosaa jama aca cua ba'a: —E'e, jiquio pojjajo miya enijje eyahuasijje ba'esohuaquije'yo mano'yo majje.

*Jesosa mano'ya cua*

(*Mateo 27.45-46; Macoso 15.33-41; Huani 19.28-30*)

**44** Majoya esheque biacojjajja nequijo, shequima'po mee ca'ya cua. Quea apo nee nee po mee ca'ya cua ojjaña meshi yasijje. Quijje nei jjapojojaqui mee ca'ya cua eshequi ejjanequijje-paaquijo. **45** Eshequi quea apo nee nee po'yajo, Eyacuiñajjija equijo ba'ehuana ba'e daqui moo nei jja'isajequa cua eyiyesama neijje. **46** Majoya aje Jesosa jjanobajjima nei taaa cua jama ba'a: —Ecue Chii, ecue Chii eyaya mi que ecue dojjoshahua huoojeaje'yo. Jjeyahua mo poquijeyoje.

Jama po majjeya poquijeya cua.

<sup>47</sup> Sohuinano huoojeajji cuani meseya Jesosa mano'yajo, ba ca cua. Majoya jama cua ba'a: — E'e de, e'e jojo nei Jesosa mimishi'ama nei nei cuanaje; oya Eyacuiñajjija Bacua Ejja cuanaje, de.

<sup>48</sup> Ojjaña dejja o ba cuequi poqui'ya cua. Ese'o cuiaqueyajea ca poqui'ya cua quea yeno nee neeya jjejojo sapa cuana cuiapashijea ca poquia cua. <sup>49</sup> Ojjaña Jesosaja epeejji cuana ca ca quea huesha nequia cua. Epona cuaa pea'ai quea huesha aniya ba ca cua Jesosa onaa cuia ca'yoqui acui ecueata'apeejo ba'e. Ma epona cuana yahuajo nei jjapeequia cua Jesosa nijje, Janinea meshijo ba'e.

*Jesosa mei jjani yasijke huananobia ca cua*

(*Mateo 27.57-61; Macoso 15.42-47; Huani 19.38-42*)

<sup>50-51</sup> Oe dejja Jose bajjani quea aquiana huiso cua. Oya pea Jose, Amatea cuiñajjijo ba'e. Oya jjapee tiitiiquia cua Jesosa nijje. Oya Jodio etii cua. Jesosa mano'yo jjimahuajo, oya Jodio etti cuana nijje jjachichaquia cua. Ohuaya beca etii cuana jama huohuime aca cua ba'a: —Chojja de, eya ca iña Jesosa mano mee sa po'yo aaja.

<sup>52</sup> Jamajjeya Jesosa mano'yajo Jose poquia cua Pinato que Jesosa epoquijeyo ba'e huohui'ajja; jama aca cua ba'a: —E'e de, ¡Jesosa mo quia'yoque! Oya ca ca mano neinei'yonaje. Eyaya oya dojoje'yo ecuea mei jjani yasijke ehuananobiaqui'yoiji.

<sup>53</sup> Majoya aje ohuaya Jesosa mano'yo ba'e jjequioquea ca'ya cua acui ecueata'apeejo ba'e. Jjequioquea'yo majje bebo ca'ya cua daqui oshe

quea bojea nee neeya. Bebo majje mei jjani ai yasi-jje huananobiaa dojo ca cua mano'yo tii cuanaja ejaa jjji ajjima huasijje.<sup>54</sup> Sinecua nei, ejomishocajji epojja po jjimahuajo Jesosa huananobiaa dojo ca cua Joseya.

<sup>55</sup> Janinea meshijo ba'e epona cuana Jose quishishi poquia cua mei jjani yasijje Jesosa emano'yo baa. Jesosa mei jjanijo huana ca cua Joseya. Epona cuaa Jesosa emano nei'yo jaa ba qui ca cua shiyeshiyejo eshaquijji nisho. Majoya Joseya mei quea quem o jeacajjajja ca cua mei jjani naba capa'yo jji. <sup>56</sup> Majoya epona cuaa Jesosa jjanijo ehuananobia jaa ba majje shiyeshiyejo shaqui jjima aca cua. Jamajjeya poqui'ya cua ocuayaya equi yasijjey. Majoya acui shiye pohuipohui shiyeshiye acua aca cua Jesosaja eyami shaquijji nisho. Shaqui jjima aca cua ejomishocajji pojja jojoya. Jamatii Jodio dejja cuana ma pojajjoya chacochaco ajja cua.

## 24

### *Jesosa shequi'ya cua*

(*Mateo 28.1-10; Macoso 16.1-8; Huani 20.1-10*)

<sup>1</sup> Mecajjeahua nei nei nomico pojajjo, epona cuana poqui o'oya cua Jesosa ba o'oya. Shiyeshiye acua'ya dojo ca cua jjani jaa huasijje, Jesosaja eyami shaa nisho ihui jjima epojji. <sup>2</sup> Epona cuaa ba cañaquia cua mei jjani eca'apejo'yo cua. <sup>3</sup> Oya cuana dobiquia cua ma mei jjani dojjo huasijje Jesosa baa nisho. Dobiqui majje Jesosa chama' ba ca'ya cua. <sup>4</sup> Majoya quea mete nee nee po'ya cua Jesosa chama' ba majje. Ma mete'yoquia aje eponaa beca esohuidojiji

dejja jayojja ba ca cua o pejjejo nequi. Ojaya daqui quea oshe nee nee, quea siyo nee nee cua.

<sup>5</sup> Epona cuana quea mete nee nee cua; ecojja cahui cua quea cojja sajaja jjejojo. Majoya aje esohuidojijiya jama huohuime aca cua ba'a: —¿Yajjajo acuaeaya miquianaya sa'ajjaña Jesosa jiquiojo so'o? ¿A'a emano'yo poso? Chojja, oya shequi'yonaje. ¡Chama'yo ca jja ca jiquiojo! ¡Oya ca jja ca eshe nequi'yo! <sup>6</sup> ¿A'a jja miquianaaya Jesosaja esohui pajea'yonaje ma ohua yahuajo huohui ca cua Janinea meshijo nequiahuaa? <sup>7</sup> Jesosa yahuajo pishana, mano'yo jjimahua, jama cua ba'a: “Mimishi cuaa eya mano mee caje'yo acui ecueata'apeejo. Pea beca peejjima cahuime po majje shequije'yo” jamaya cua Jesosa mano'yo jjimahua. Jamajjeya ¡a'a quea mete pojji! —jamaya aca cua esohuidojijiya.

<sup>8</sup> Ma esohui shajja'ajja majje epona cuaa Jesosaja esohui shahuaba ca'ya cua. <sup>9</sup> Majoya aje poqui cuajicuaji'ya cua pea cuana huohui'yohua. Huohui cañaquia cua o shajja'ajjajji cuana, ojjaña cuana pea'ai Jesosa shequi'yonajejo. <sup>10</sup> Mania Madanena, pea Mania Jacoboja nae, Huana, pea epona cuana pea'ai poquia cua huohui po'yohua. <sup>11</sup> O shajja'ajjajji cuaa epona cuana ohua huohui cajje, jama aca cua ba'a: —Epona cuana, siajje mi ca cuani Jesosa eshequi'yojo miame. Miquianajaya esohui shajja'ajja sa po ajja ca iña —jamaya cuaa aca cua.

<sup>12</sup> Peno ca ca quea cuejipashi nei poquia cua mei jjani yasijje ba'ajja'yohua. Bañaqui majje mei jjani ye'e'ajja cañaquia cua ma Jesosa jaa cuajo. Ba ca cua o bebojji oe ani, oja jeajeana'yo jja oe ania cua.

—De, chama'yo Jesosa yaña, de —jamaya Peno cua. Jamaya po majje poqui o'oya cua equi yasi-jje. Poquianijo oya jjashahuabaquia cua Jesosajo. Ojaya ba jjima; jamajjeya jama cua ba'a: ¿Yajja shai po'yonaje Jesosa? —jamaya cua Peno.

*Becanejjiji pea'ai o shajja'ajjajjiya Jesosa ba ca  
cua Emao jiojjijje poquijeya*  
(Macoso 16.12-13)

<sup>13</sup> Oya pojajao tii, becanejjiji pea'ai o shajja'ajjajji cuana poquia cua Emao cuiñajji yasijke. Quea huesha pishana cua Jenosanena ebañaquijji.

<sup>14</sup> Jesosa emano'yo niñebe ca poquia cua. <sup>15</sup> O mimi poquijejo Jesosa jjanequichipiquia cua onijje. Jjanequichipiqui majje onijje poquia cua.

<sup>16</sup> Jesosa ba majje ba tai ca'yonaje, pea dejja posoya aca cuaa cua. <sup>17</sup> Majoya aje Jesosaa jama huohui'ajjame aca cua ba'a: —¿A'ya cuae nequiaa ca niñebe poquiaje so'o?

<sup>18</sup> Majoya Quiopasiya jama saja'ame aca cua ba'a: —¿A'a miquea eba ma onaa acanaje Jenosanenajo?

<sup>19</sup> Majoya aje jjaja Jesosa jama cua ba'a: —¡Huohui'ajja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo ba'e. Oya quea sohui poja nee nee cuanaje. Ohuaya Eyacuiñajjija esohui huohui canaje, de. Ojjaña dejja jjashahuabaquinaje ojaya esohuijo.

<sup>20</sup> Majoya Jodio etii cuaa, emeshi mese cuaa, Jesosa iña mee ca'yonaje, acui ecueata'apeejo que-cua mee ca'yonaje. <sup>21</sup> Ecuania jjashahuabaquinaje Jesosa Jodio dejja cuanaja emeshi mese epojiijo Eyacuiñajjija huoojea'yo pea'ajio. Oya ca ca

chama'yo tii po'yonaje, de. Pea beca peejjima cahuime oya emano'yojaa. <sup>22</sup> Jiquio pojajomecajjehua nei nei epona cuana poquinaje mei jjani yasijje Jesosa shaa nisho. Jjajjasoquinaje Jesosa chama'yojojo. <sup>23</sup> Jesosa emano'yojaa ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojji ani ba canaje jjani dojjojo ani. Jama huohuimaya aje pa pona majoya acanaje ba'a: "Jesosa ca ca emano'yo tii pojjeama jaa, shequi'yonaje ca coma" jamaya pa pona acanaje. <sup>24</sup> Majoya epona cuaa huohui cajje poquinaje beca cuana mei jjani yasijje. Mei jjani bañaqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshequi'yo ba'yo jjima tii cuanaje, de —jamaya mimia cua o shajja'ajjajji cuana.

<sup>25</sup> Majoya aje Jesosaa jama huohuime aca cua ba'a: —Miquianaya jjashahuabaqui ajja Eyacuiñajjija esohuijo. <sup>26</sup> ¿A'a miquianajaya ba jjima Eyacuiñajjija huoojea'yo ebionei camanoqui'yahua? Majoya shequi'yo majje, eyahuasijke poqui majje Eyacuiñajji ebañeijje anioqueje'yo tii tii ojjañaja Emeshi Mese epo'yojji tii tii. Jamaya yahuajo tehue ca cua Eyacuiñajjija esohuijo. ¿A'a miquiaaya pajea'yonaje pojja'a? —jamaya Jesosaa aca cuana cua.

<sup>27</sup> Majoya poquijeya Jesosaa oya cuana huohui ca poquia cua ojjaña Eyacuiñajjija esohui ojo. Ohuaya huohui coo ca cua Moisesija ojo oja tehue majoya pea esohui huohuijji cuanaja ojo oja tehue huohui ca cua.

<sup>28</sup> Majoya Emao ba cañaquia cua. Majoya aje bañaqui majje Jesosa ca jjayejj'e'ajjaquinana cua.  
<sup>29</sup> Majoya aje o shajja'ajjajji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasi-jje. <sup>30</sup> Majoya aje anioquea cua e'ijjia'ijjajji. Majoya aje anioque majje Jesosaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. <sup>31</sup> Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaje, de —jamaya o shajja'ajjajji cuaa aca cua.

Majoya aje Jesosa jjachamaqui'ya cua, de. <sup>32</sup> Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijiji peyaanaje o shajja'ajja majje. Queabihui nee eseya cuanaje Eyacuiñajji esohui shajja'ajja majje.

<sup>33</sup> Majoya aje o shajja'ajjajji cuana ocuayaya cue'ya cua Jenosanena huasijjeya mecajje tiiya. Bañaqui majje ba ca cua pea Jesosaja shajja'ajjajji cuana, 11 ejjachichaqui ani pea epeejji cuana nijje. <sup>34</sup> Pea cuaa majoya jama aca jjequia cua ba'a: —E'e jojo nei, de. Jesosa shequi'yonaje. Simohuija eba nei nei oya cuanaje.

<sup>35</sup> Majoya aje Emao huasijje poqui cuaa jama huohuime aca cua ba'a: —Ecuana poquinijo Emao huasijje, oe dejja poquinaje ecuana nijje. Oya miminaje ecuana nijje, de. Majoya ecuana ijji'a'ijjianaje ojee. Ohua pahui miji cajo ecuaaya

oya bahuejjanaje Jesosa cuanaje, de. Oya ca ca shequi'yonaje, e'e jojo nei, de.

*Jesosa ba ca cua o shajja'ajjaggi cuaa  
(Mateo 28.16-20; Macoso 16.14-18; Huani 20.19-23)*

<sup>36</sup> Jesosa jjapanaquia cua ona mimiani yiyesamajo. Jesosa jama cua ba'a: —¡Yani eya, de! ¡Quea bei oe pocue nequiana!

<sup>37</sup> Jesosa ba majje quea mete nee nee cua o shajja'ajjaggi cuana eshahuajo poso. <sup>38</sup> Jesosa majoya jama cua ba'a: —¿Yajjajje acuae nequiana quea mete cuani so'o? ¿Apiojji miquianaya jjashahuaba quehuaquiani? <sup>39</sup> ¡Bacue mo oe! Ecuea eme jjoto huejja namoja quecua huejja yani, ejiojjije pea'ai, de. Eyami nei jja iña iquio, eshahua pojjeama. Eshahua ca jja ca yamima', sama' pea'ai, de. ¡Napa'ajja socue mo, ecuea eyami; ba neinei'ajja socue mo!

<sup>40</sup> Majoya Jesosaa ojaya eme ja'a ca cua, ejiojji pea'ai. <sup>41</sup> Onaaya ca Jesosa pojjeama poso aca cua quea bihui jjejojo. Jjashahuabajequi jjima cua. Jamajjeya Jesosaa oya cuana huohui'ajja ca cua ejjashahuaba meequiviji jama ba'a: —¡Bacue eya, eyami nei; che mo bobi quiacue nequiaa! Eya ca ca eshahua pojjeama, eshahua cuana ca ca ijija'ijjia ajja.

<sup>42</sup> Majoya aje onaaya Jesosa nahuoo cuaquijo dahua quia ca cua. <sup>43</sup> Jesosaa nahuoo ijjia ca cua, ona cojja nei aniya. <sup>44</sup> Majoya ohuaya jama aca cua ba'a: —Eyaya mano'yo jjimahuua miquianaya huohuinaje pea cuaa eya quecua mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca

cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

<sup>45</sup> Majoya Jesosaa huohui ca cua Eyacuiñajjija etehue'yo ona jjabahuejjaquijji. <sup>46</sup> Ohuaya jama aca cua ba'a: —Jama tehueme'ya cua ba'a: “Eyacuiñajjija huoojea'yo ojjaña jaahuanajji manoje'yo. Mano'yo majje shequije'yo pea beca peejjima cahuime po majje. <sup>47</sup> Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epjeejji epojji. Ebionei Jenosanenajo cahuohui coo ca'yahua. Eyacuiñajji nijke cajjapeequi'yahua, mimishi cuana capajea ca'yahua. Majoya pea cuiñajji cuana huasijje capoquiahua ojaya esohui huohuiya”. <sup>48</sup> Jjeya nei miquianaaya eya banaje, shajja'ajjanaje jiquio esohui. Jamajjeya ¡a'a pajea'yojjji; huohui tiitiicue! <sup>49</sup> ¡Bacue oe, eyaya Edojjoshahua Bame huoojeaje miquiana huasijje, miquiana quea bame ba'e meeji! Ecue Chiiya yahuajo huohui canajeya jjejojo Edojjoshahua Bame huoojeaje'yo eyaya. Jamajjeya ijiquiojo tii anicue! ¡Jenosanenajo tii ishoa'ajjacue Edojjoshahua Bame nei cueje eyajo ani! Ohuaya miquianaya quea jjashahuabaqui ja'a po mee caje'yo —jamaya Jesosa cua.

*Jesosa poqui'ya cua eyahuasijje  
(Macoso 16.19-20)*

<sup>50</sup> Majoya aje Jesosaa o shajja'ajjajjii cuana dojo ca cua Betania huasijje. Bañaqui majje Jesosaa eme jeasohua ca cua, jama mimime cua ba'a: — ¡Enijke jjapee neineiquicue! ¡Jjashahuabaquicue Eyacuiñajjijo miquianaya quea ca'a epoji!

51 Majoya aje Jesosa eyahuasijje poqui'ya cua.  
52 Oya cuana Jesosajo quea bihui nee nee po'ya  
cua. Majoya aje huacuayaya cue'ya cua Jenosa-  
nena huasijje quea bihui nee nee. 53 Majoya  
aje poqui majamaja nequia cua Eyacuiñajjija equi  
yasijje Eyacuiñajji bihuiaa.

E'e de, acua. Eyaya, Nocaa tehuejeyonaje.  
Mahuisoya.

**Eyacuiñajjija Esohui  
New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ese Ejja

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

**cxc**

2014-04-23

---

PDF generated using Haiola and XeLaTeX on 21 Feb 2024 from source files  
dated 29 Jan 2022

88838088-e20d-51ca-8c91-69194f5ae678